

四庫全書

經部

欽定四庫全書

經部

春秋纂言卷二

詳校官鴻臚寺少卿臣梁憲陽

給事中臣溫常綏覆勘

總校官進士臣繆琪

校對官中書臣王瓚

謄錄監生臣黃奕遐

欽定四庫全書

春秋纂言卷一

元 吳澄 撰

春秋

杜氏曰春秋者魯史記之名史之所記必表年以首事年有四時故錯舉以為所記之名也孔氏曰不可徧舉四時為書號言春足兼夏言秋足見冬故錯互舉春秋二字名雖春秋實包冬夏未嘉陳氏曰謂之春秋者其書法以四時冠月也澄按春秋之立名由魯歷遞遷四時之序以春為一歲之始以秋為中歲之始史記一歲四時之事故舉四時之二始以名之也古者天子之太史掌記事掌治歷一官而兼二職歷以協天序於當時事以傳人治於後世諸侯雖有史掌記事而已歷則天

子所頒也晉楚最為大國各有史記一名乘一名  
檮杌不聞二國有歷也惟魯之史記名春秋而周  
歷之外別有魯歷亦名春秋歷至漢猶存是魯國  
之史不止記事又作歷矣記事宜也作歷僭也僭  
則天子何以不禁曰魯歷雖僭然奉周正朔但移  
春於歲首之為非耳夫移春於歲首則一歲之時  
自春始夏次秋次而冬終焉四時之序甚順而以  
為非何也曰在夏則可在周則不可其不可者何  
也周之歲首乃仲冬季冬不可以為春仲夏季夏  
不可以為秋也移夏之四時加於周之十二月此  
魯歷之非於天時雖不合於王正則不戾是以莫  
之禁也夫子修經因其名據其實而書之以著其  
非抑使後世知建子之正不如建寅之正於天時  
之序為順也其答顏淵為邦之問所以曰行夏之  
時

隱公 名息姑 惠公夫人孟子之姊 聲

元年

公羊氏傳曰君之始年也澄曰謂第一年也

然但謂之一則不見其有異尊其在始特立殊稱

以一年為諸年之首故變一稱元元者首也○是

年已未周平王四十九年○蔡宣公考父二十八年

○曹桓公終生三十五年○衛桓公完十三年

○晉鄂侯郟二年曲沃莊伯鮮十一年○鄭莊公

寤生二十二年○陳桓公鮑二十三年○杞武公

二十九年○宋穆公和七年○齊僖公祿父九年

○秦文公四十四年○楚武王熊通十九年

春 公羊傳曰春歲之始也澄曰經所書春蓋斗柄建

子建丑建寅之月前兩月未是春惟三月建寅乃

夏時之孟春也按一歲十二月天氣雖肇始于子而

人事則肇功于寅故唐虞夏之故授人時皆以建

寅之月為歲首商代夏周代殷改正朔以新天下之耳目而一其心故商之歲首建丑周之歲首建子漢書律歷志記商周事有殷歷周歷為據而又參之以四分三統二歷于成湯之十三年曰商十二月乙丑朔旦冬至又曰後九十五歲十二月甲申朔旦冬至冬至在商之十二月是商歷改夏之十二月為正月也于武王克商之歲曰是歲大寒中在周二月己丑晦閏月庚寅朔三月二日庚申驚蟄驚蟄夏正月之中氣也又曰周公攝政五年正月丁巳朔旦冬至而左氏傳僖公五年正月辛亥朔昭公二十年正月己丑朔皆日南至禮記記孟獻子之言亦曰正月至可以有事于上帝冬至在周之正月大寒在二月驚蟄在三月是周歷改夏之十一月為正月也商周雖改月數天之四時則不可改故商之正月猶為冬二月三月四月乃為春也周之正月二月猶為冬三月四月五月乃為春也

前代歷書至漢猶存者凡六黃帝歷顓頊歷夏歷殷歷周歷魯歷是也以非儒家書故得免於秦火周既有歷而魯自造歷魯歷雖從周王正朔然以春為一歲之始於是改建子丑寅之月為春建卯辰巳之月為夏建午未申之月為秋建酉戌亥之月為冬此魯歷之變常也夫用夏正則春為歲始用周正則歲始非春也魯以周之歲始為春而遽遷一歲十二月之時則四時紊矣夫子因而書之譏也後漢陳寵云建寅月人正夏以為春建丑月地正商以為春建子月天正周以為春考之未詳者也商周改十二月十一月為正月而已曷嘗以之為春哉周官謂建子之月為正月建寅之月為正歲而其間所謂春夏秋冬及孟仲季月一循夏時之舊月改時不改也豈非以月為王之正朔可隨世代更新時乃天之氣序一定有常而不可變易也歟尚書多方召誥多士顧命等篇所紀之月

皆周月也而不記時蓋以天時一定未嘗變易有月則時可知也漢後史文月數壹是夏正書正二三月則知其為春書四五六月則知其為夏七八九月之為秋十與十一月十二月之為冬亦然不待表其時也非若魯歷素天時之定序而月非其時故春秋必以魯所改之時加於月上以著其時之失正司馬遷史記凡書月則月上不言時書時則時下不言月合於尚書之書法

王正月

公羊傳曰先王而後正月王正月也左氏傳曰正周正月穀梁氏傳曰元年雖無事

必舉正月謹始也薛氏曰舊史之制月不繫時言月則時可知也春秋月必繫時而加王於春之首月明王正反天時也春非夏時月數猶遵乎王正也周正建子以建寅為正歲時猶用夏也魯變四時之序加春於建子舍周之舊也春秋常事不書書變常也永嘉陳氏曰周史言時皆夏時也言月



皆周月也時皆夏時於周官見之月皆周月於書見之以夏時冠周月則魯史也非周之舊也夫子修春秋每孟月書時以見魯史每正月書王以存周正也項氏曰春非春也正月非正月也澄曰元年春謂魯公元年私改之春非天時一定之春也王正月謂周王天正建子之正月非正歲建寅之正月也王者時王謂周也故左氏以周釋王既以見所書之正月為時王之所改又以見侯國之史記奉王朝之正朔也書一王字該此二義正月歲之第一月也正猶長也以一月為諸月之長故變一稱正與元年變一稱元之義同按桓文宣成襄昭哀七公皆以元年正月即位隱莊閔僖四公雖不行即位禮其日亦見羣臣是為新君歲首見羣臣之始故雖無事必存其首月不與常年同也若常年之首月有事則書無事則不書非元年之比也唯定公元年無正月者定未即位魯國無君故也

三月

公及邾儀父盟于蔑

凡書邾小邾公羊並作邾婁後不重出蔑毋結切公羊穀

梁作昧。公羊傳曰及者與也會及暨皆與也。及我欲之暨不得已也。穀梁傳曰不言邾子未爵命也。左傳曰公攝位而欲求好於邾故為蔑之盟。高氏曰隱自謂為桓而立內懼諸大夫之不已。悅外慮諸屬國之不已從而邾以附庸有不相得於是。首與邾盟杜氏曰邾今魯國鄒縣蔑姑蔑魯國卞縣南有姑城趙氏曰儀父名也魯季孫行父晉荀林父等以父為名澄曰宋公茲父齊侯祿父蔡侯考父皆名也附庸之君未爵命例書名如鄭犂來介葛廬是也其後莊十六年經書邾子克卒蓋王命以子爵改名克如楚圍既為君而改名虔棄疾既為君而改名居也凡盟例皆書曰此不日者史

文闕下及宋盟宿同盟謂以要約之辭質於神以明其信也周官有司盟之職邦國有疑則會同而盟孔氏曰盟者殺牲歃血告誓於神若有背違令神加殃如此牲也先鑿地為方坎殺牲於坎上割牲取左耳盛以珠盤又取血盛以玉敦用血為盟書成乃歃血讀書鄭氏曰盟辭書於策讀其書以告神坎其牲加書於上而埋之程子曰盟誓以結信出於人情先王所不禁後世諸侯交相盟誓亂世之事也張氏曰司盟之設聖人蓋為諸侯之仇怨不釋者設耳殆衰世之意聖人立法常關盛衰故不得已而建此官以待之也屢盟之長亂自幽厲以來惡之矣况春秋諸侯之紛紛乎陵陽李氏曰先儒謂魯侯爵而其君稱公此臣子之辭春秋從周之文而不革者按聘禮大射儀燕禮五等諸侯皆稱公而公食大夫禮又以名篇則謂君為公禮之正也

夏此所謂夏蓋建卯建辰建巳之月前二月未是夏唯六月建巳乃夏時之孟夏也

五月

鄭伯克段于鄆

左傳曰鄭武公娶於申曰武姜生

莊公及段莊公寤生惡之愛段欲立之亟請於武公弗許及莊公即位為之請制公曰制巖邑也他邑唯命請京使居之謂之京城太叔既而太叔命西鄙北鄙貳於巳又收貳以為巳邑至於廩延完聚繕甲兵具卒乘將襲鄭公聞其期命子封帥車二百乘伐京京叛段入于鄆公伐諸鄆出奔共穀梁傳曰克者何見段之有徒衆也殺世子母弟目君目君甚鄭伯之處心積慮成於殺也趙氏曰克者能勝之名非命卿例不書公子非獨段也鄆當作鄆鄭地也在緱氏縣西南十一年王取鄆劉為

邾之田于鄭乃屬周傳寫誤為鄆字京至鄆非遠  
又是鄭地段有徒衆故曰克鄆今潁川鄆陵若遠  
走至鄆即已出境無復兵衆何得言克傳又曰自  
鄆出奔共自鄆過河向共城為便路若已南行至  
鄆陵不當奔共也胡氏曰姜氏當武公存之時嘗  
欲立段矣及公既歿姜以國君嫡母主乎內段以  
寵弟多才居乎外恐其將為後患也故授之大邑  
縱使失道以至於亂然後以叛逆討之則國人  
敢從姜氏不敢主而太叔屬籍當絕

秋 未是秋唯九月建申乃夏時之孟秋也  
此所謂秋蓋建午建未建申之月前二月

七月

天王使宰咺來歸惠公仲子之貽

仲况阮切貽芳  
公

羊傳曰惠公隱之考也仲子桓之母也喪事有贈車馬曰贈貨財曰賻衣被曰襚隱為桓立故以桓母之喪告于諸侯言惠公仲子兼之也穀梁傳曰其志不及事也澄曰王之上加天者儀禮傳云臣之所天者君也周王為衆侯國之君侯國以王為天也若王朝之史記則但稱王故尚書王不稱天此侯國之史記故稱王曰天王也宰氏咺名天子之上士三命稱氏稱名如叔服劉夏與石尚趙氏曰宰咺是氏名如宰予之類王士來魯例書氏名石尚是也孫氏曰天王贈惠公則可兼仲子則不可文九年秦人來歸僖公成風之襚與此義同譏其不及事而又兼之也張氏曰啖趙劉程諸說以惠公仲子為妾繫君僖公成風為妾繫子今按惠公以去年薨而仲子之卒經無明文則亦卒于去年也何以獨歸仲子而不歸惠公乎公羊之說得之

九月

及宋人盟于宿

左傳曰惠公之季年敗宋師于黃公立而求成焉公羊傳曰孰及之

內之微者也穀梁傳曰宋人外卑者也劉氏曰盟者國之大事豈微者所尸乎苟有兩微者盟春秋固不書之趙氏曰凡盟不目內皆指公也呂氏曰隱公以諸侯之尊而下與他國之臣盟苟徇目前之利無恥也高氏曰桓宋出也公懼宋故與宋合杜氏曰宋今梁國睢陽縣澄曰宋人宋臣之一命者蓋士也宿小國風姓東平無鹽縣也杜氏謂盟以國地者國亦與盟竊謂宿微國宋之附庸猶宋邑也魯求成于宋故往就宋之境內而盟于宿爾微國非能有所利害魯宋何為使之與盟乎

冬此所謂冬蓋建酉建戌建亥之月前二月未是冬唯十二月建亥乃夏時之孟冬也

十有二月

祭伯來

祭側界切。左傳曰：非王命也。穀梁傳曰：襄內諸侯，非有天子之命，不得出會。諸侯

不外交也。澄曰：祭畿內邑，伯爵。天子六命之，卿稱邑爵。王臣出使侯國，當有王命。其來必有其事。祭伯上不言天王使來，下不言為何事，是無王命而私行也。

公子益師卒

公子氏益師，名二命之卿。魯孝公之子，不曰史，失之。海陵胡氏曰：益師字

衆父衆仲，其後春秋於外諸侯書卒書葬，與魯君夫人同於內大夫書卒而不書葬，詳畧之差等也。君之卿佐是謂股肱，故問其疾，弔其喪，贈其葬，必厚其送，終之恩。此春秋書大夫卒之旨也。高郵孫氏曰：內大夫見於經者，四十有七卒者，三十不書卒者，十有七。或弑賊，或出奔，或君不親臨，或賻贈不加。



恩不及則不卒或卒於春秋之後也

經書月六書日無據唐開元大衍歷追算正月辛亥朔大庚申冬至二月辛巳小三月庚戌大四月庚申小五月乙酉大六月己卯小傳五月辛丑在六月七月戊申大八月戊寅大九月戊申小十月丁丑大十一月丁未小傳十月庚申在十一月十一月丙子大程氏公說曰自三統至欽天正月朔或辛亥或庚戌壬子視大衍前後差一日以傳五月辛丑十月庚申考之則正月朔非辛亥故杜預遽就以辛巳為朔若從辛巳則冬至不在正月周歷雖差不如是之甚意者差閏只在今年而杜考之不詳爾周歷惟閏法多差在當時左氏已屢譏其失閏則後世自難考正今止以大衍立法經傳日月合者標其日於月下不合者則註其差云澄按杜預作長歷以追合經傳日月多是遷就故程

氏作春秋分記用大衍歷今從之附註氣朔於各  
年之後雖多不合然姑存大槩俟後世通歷者考  
焉

二年

庚申平王五十年○蔡宣二十九○曹桓三十  
六○衛桓十四○晉鄂三○鄭莊二十三○陳

桓二十四○杞武三十○宋穆八○  
齊僖十○秦文四十五○楚武二十

春

例不書月  
者但書時

公會戎于潛

左傳曰修惠公之好也戎請盟公辭  
漢孔氏曰此戎蓋帝王所羈縻居九

州之內胡氏曰費氏稱淮夷徐戎蓋徐州之戎在  
魯之東郊趙氏曰以國舉不書爵號君臣同詞劉  
氏曰戎者戎之君也不以君稱之外之  
也張氏曰書戎以外之會狄會吳放此

夏

五月

莒人入向

向舒亮切。左傳曰：莒子娶于向，向姜不安。莒而歸，莒人入向以姜氏還。澄曰：

莒子爵已姓，今密州莒縣人。謂莒大夫小國之大夫一命稱人，入謂攻破其城，兵入其國也。有兵既

入而遂滅其國者，有兵雖入而不滅其國者，向小國姜姓，炎帝之後。杜氏曰：龍亢縣東南有向城。張

氏曰：漢志向屬沛郡寰宇記屬應天府。穀執縣孫氏曰：隱桓之際，國無大小，用師皆專行。

無駭帥師入極

駭吁，措切。穀作倅，後同。無駭魯再命之大夫，凡再命則稱名三命。

則書氏書名。帥師用大衆也。極附庸小國。張氏曰：擅興大衆陵暴小國，義與入向同。

秋

八月

庚辰公及戎盟于唐

左傳曰戎請盟復修戎好也杜氏曰唐魯地高平方與縣

北有武唐亭張氏曰今單州魚臺縣也諸侯會盟皆期約行禮之日然會未有書其日者至於盟必詳其月與日以其相與約信或尋或寒皆考于此有國者之所謹也前此蔑宿之盟不書日久遠失之爾程子曰戎猾夏而與之盟非義也

九月

紀裂繻來逆女

裂公穀並作履繻音須○杜氏曰紀國在東莞劇縣張氏曰漢屬北

海郡今屬青州壽光縣澄曰裂繻紀卿紀雖侯爵  
其國削弱同於小國其卿再命稱名女在父母之  
國故稱女諸侯娶妻皆當親迎裂繻卿也而代為  
君逆非禮也公穀並云譏不親迎是也鄭氏曰諸  
侯親迎常事不書左氏以卿逆為合禮誤矣高氏  
曰詩稱大妣之家在渭之涘文王娶之親迎于渭  
蹶父之女嫁于韓侯韓侯迎之于蹶父之里魯哀公  
問于孔子曰冕而親迎不已重乎孔子對曰合二  
姓之好繼先聖之後為天地社稷宗廟之主君曷  
謂已重乎諸侯親迎自古而然唯天子之尊使三  
也公逆

冬

十月

伯姬歸于紀

伯者長女也蓋惠公之女即裂繻所逆者婦人內夫家故以出嫁為歸啖

氏曰內女嫁歸為夫人則書陸氏曰以尊卑敵公為之服故書其歸

紀子伯莒子盟于密

伯左作帛○孫氏曰紀本侯爵此稱子伯闕文也程子曰

當作紀侯某伯莒子澄按子伯二字或是侯字之誤蓋離盟非參盟也杜氏曰密莒邑城陽淳于縣

東北有密鄉

十有二月

乙卯夫人子氏薨

穀梁傳曰夫人者隱之妻也卒而不書葬夫人之義從君者也

張氏曰婦人從君故君存則葬禮未備待君薨而合祔也澄按子姓宋女也薨者上墜之聲

鄭人伐衛

左傳曰鄭共叔之亂公孫滑出奔衛衛人為之伐鄭取廩延鄭人伐衛討公孫

滑之亂也杜氏曰衛國在汲郡朝歌縣張氏曰今濬州黎陽縣澄曰衛侯爵鄭雖伯爵次國同於大

國稱人者蓋其一命之士伐者聲其罪而興師也

經書月五書日二大衍歷正月丙午朔小乙丑冬至二月乙亥大三月乙巳小四月甲戌大五月甲辰小六月癸酉大七月癸卯小八月壬申大初九日庚辰九月壬寅小十月辛未大十一月辛丑大三十日庚午霜降閏月辛未小十五日乙丑立冬十二月庚子大旦日小雪十六日乙卯長曆八月壬寅朔無庚辰

三年辛酉平王五十五年崩○蔡宣三十○曹桓三十七○衛桓十五○晉鄂四○鄭莊二十四○

陳桓二十五○杞武三十一○宋穆九卒  
齊僖十一○秦文四十六○楚武二十一

春

王二月

每歲春字之下書月必加王字以見此月數乃時王之所改定程子曰月王月也事

在二月則書王二月在三月則書王三月無事則書時書首月存天時正王朔也

巳巳日有食之

穀梁傳曰言日不言朔食晦日也公羊傳曰日食曷為或日或不日

或言朔或不言朔或朔在前或朔在後也孫氏曰凡日食言日言朔食正朔也言日不言朔失其朔也言朔不言日失其日也不言日不言朔日朔俱失也劉氏曰或不日或不言朔史之記失也若非史之記失則日食不得其正也朱子曰晦朔日月合同度同道則月食揜日而日為之食王者修德行



政用賢去姦能使陽盛足以  
勝陰則雖或當食而不食也

三月

庚戌天王崩

平王也在位五十一年世子洩父蚤  
死洩父之子林立是為桓王程子曰

崩上墜之形海內皆當奔赴魯不徃罪不書自見  
也高郵孫氏曰春秋之王十有三崩葬皆書者五  
周告崩魯會葬也崩而不葬者四周告之而魯不  
會也崩葬不見者三周不告魯不會也其一則崩  
在春秋  
之後

夏

四月

卒卯尹氏卒

尹左作君。公羊傳曰：尹氏，天子之大夫也。其稱氏，何？譏世卿外大夫不

卒此何以卒天王崩諸侯之主也。澄按：天子之公卿大夫士其生也不外交諸侯故其死也亦不赴。告春秋二百四十二年間惟劉卷王子虎以常同會盟而來赴尹氏以王崩為諸侯之主而來赴皆非禮也。故書以示譏。然劉卷六命之卿有邑有爵但書邑書名王子虎一命之下士其屬為王子但書屬名尹氏當從劉卷之例今書不書邑書名而書邑書氏者著其世世為卿也。

秋

武氏子來求賻

賻音附。公羊傳曰：喪事無求，穀梁傳曰：歸之正也。求之非也。周雖

不求魯不可以不歸魯雖不歸周不可以求之求之為言得不得未可知之辭也。交譏之澄曰：武亦

王卿之采邑稱氏義與尹氏同子者父老而以子攝行卿之事賻者以貨財助喪之禮也時周室微弱諸侯不天程子曰天王崩諸侯不供其喪故武氏子徵求于四國

八月

庚辰宋公和卒

左傳曰宋穆公疾召大司馬孔父曰先君舍與夷而立寡人寡人弗

敢忘若以大夫之靈得保首領以歿先君若問與夷其將何辭以對請子奉之以主社稷對曰羣臣願奉馮也公曰不可先君以寡人為賢使主社稷若棄德不讓是廢先君之舉也豈曰能賢光昭先君之令德可不務乎吾子其無廢先君之功使公子馮出居於鄭澄曰初宋宣公卒不傳其子與夷而傳其弟和和穆公也在位十一年宣公之子與夷立是為殤公凡諸侯之薨與魯交者來赴不書

蕘而書卒者遠之不以之同於我君而以之下同于內大夫也

冬

十有二月

齊侯鄭伯盟于石門

永嘉陳氏曰特相盟不書必關於天下之故而後書莒紀

無足道也齊鄭合天下始多故矣天下之無王鄭為之也天下之無伯齊為之也是故書齊鄭盟于石門以志諸侯之合定七年書齊鄭盟于鹹以志諸侯之散春秋之終始也春秋于隱桓莊之際惟鄭多特筆于襄昭定哀之際惟齊多特筆焉張氏曰齊國名侯爵今青州臨淄縣石門齊地在濟南府臨邑縣隱十一年之間盟而不食言者唯此石門之盟二君終身未嘗相伐蓋齊方盛疆而鄭莊

姦猾鄭仇專在于宋故鄭莊恃齊以敵之雖齊間與宋盟好而左右離間必使唯己之從是以石門之盟不寒而宋與許杞諸國交受入伐鄭莊多詐齊僖不義而疆二國相與之固列國並受其禍也

癸未葬宋穆公

穆公穀並作穆○魯往會葬故書高氏曰經書諸侯之卒者百二十

有二而書葬者八十有八蓋魯往會則書天王崩魯不會葬而葬宋穆公諸侯壞地相比王事相從必有聘問和好之事至于告終易代豈無弔恤賻葬之禮春秋之時徒以國勢之強弱私情之疏密而為之禮爾胡氏曰卒而或葬或不葬者何有急于禮而不葬者有弱其君而不葬者有討其賊而不葬者有諱其辱而不葬者有治其罪而不葬者有避其號而不葬者宋殤齊昭告亂書弒矣而經不書葬是討其賊而不葬者也晉主夏盟在景公時告喪書曰矣而經不書葬是諱其辱而不葬者

也魯宋盟會未嘗不同而三世不葬是治其罪而不葬者也吳楚之君書卒者十亦有親送於西門之外者矣而經不書葬是避其號而不葬者也怠于禮而不徃弱其君而不會無其事闕其文魯史之舊也討其賊諱其辱治其罪避其號而不葬聖人所削也

經書月五書日五大衍歷正月庚午小辛未冬至二月巳亥大三月巳巳小經二月日蝕在三月朔四月戊戌大經三月庚戌傳三月壬戌皆在四月五月戊辰小經四月辛卯在五月六月丁酉大七月丁卯小八月丙申大九月丙寅小經八月庚辰在九月十月乙未大傳冬庚戌十五日十一月乙丑小十二月甲午大經癸未在明年正月長歷巳巳二月朔庚戌三月十二日辛卯四月二十四日庚辰八月十五日癸未

四年 壬戌桓王元年 ○蔡宣三十一 ○曹桓三十八  
○衛桓十六 弒 ○晉鄂五 ○鄭莊二十五 ○陳  
桓二十六 ○杞武三十二 ○宋殤公與夷元年  
○齊僖十二 ○秦文四十七 ○楚武二十二

春

王二月

莒人伐杞取牟婁

穀梁傳曰諸侯相伐取地於是始啖氏曰先書伐國後言取邑

者取其國之邑也澄曰取者奪而有之也杞夏后氏之後杜氏曰杞國本都陳留雍丘縣桓六年淳于公亡國杞始并之遷都淳于僖十四年又遷緣陵襄二十九年晉人城杞之淳于杞又遷都牟婁杞邑城陽諸縣東北有婁鄉

戊申衛州吁弑其君完

州穀作祝後州吁同弑穀作殺後凡弑君並同不重

出○左傳曰衛莊公娶于齊曰莊姜無子又娶于陳曰厲媯其娣戴媯生桓公莊姜以為已子州吁嬖人之子也有寵而好兵公弗禁莊姜惡之石碻諫弗聽其子厚與州吁游禁之不可桓公立乃老澄按史記表年周平王三十七年丁未為衛桓公元年在位十六年州吁弑之而自立州吁不稱公子非命卿也國君之子尊與再命之大夫同故稱名下殺上曰弑完桓公名劉氏曰州吁不稱公子公子雖貴非三命不氏張氏曰衛國之禍始于莊公之寵州吁縱其好兵而不知禁公存之時妾上僭夫人失位亂根之萌久矣君臣父子夫婦之分一失其正則亂之所從生衛莊溺私愛而使內寵僭嫡嬖子害正石碻之諫足以悟矣愼而弗圖貽禍後嗣董氏云為人君父而不通于春秋之義者



必蒙首惡之名  
莊公之謂也

夏

公及宋公遇于清

左傳曰公與宋公為會將尋宿之盟未及期衛人來告亂張氏

曰乃行遇禮而還薛氏曰殺禮而野合將以伐鄭也杜氏曰清衛邑濟北東阿縣有清亭程氏曰諸侯相見而不行朝會之禮如道路之相遇非周禮冬見曰遇之遇也趙氏曰簡禮而會曰遇啖氏曰遇禮忽有邂逅相遇簡畧而行故與會禮不同時雖非相遇而從省易以遇禮相見襄陵許氏曰隱莊之間凡六書遇自閱以後有會無遇

宋公陳侯蔡人衛人伐鄭

左傳曰宋殤公之即位也公子馮出奔鄭鄭人

欲納之及衛州吁立將修先君之怨於鄭而求寵于諸侯使告于宋曰君若伐鄭以除君害君為主  
澈邑以賦與陳蔡從則衛國之願也宋人許之於是陳蔡方睦於衛故宋陳蔡衛伐鄭張氏曰宋自  
殤公立公子馮出居鄭之後馮以穆公不立已為恨有反取其國之心鄭莊又從而佐之于是宋鄭  
為仇及是衛州吁欲定其位告宋求伐鄭以除子馮之害故四國伐鄭宋為主而陳蔡同役宋殤受  
國于穆公而馮有爭位之心正當修德和民外好鄰國則其位自定而馮無所伺其隙矣况州吁弑  
逆之賊內懷見討之懼而欲納交殤公苟名其為賊告于王而討之則一舉而君臣父子之倫定今  
乃怵于州吁之邪說合陳蔡以助逆賊而宋國之人不復知君臣順逆之正理弑逆之事卒及其身  
皆殤公不能早辨于此之役也陳今陳州宛丘縣蔡今蔡州上蔡縣澄曰蔡衛稱人蓋陳宋二國君

在則雖三命二命之大夫亦降稱人衛人蓋公孫  
文仲也襄陵許氏曰擊鼓詩序以為公孫文仲將  
而平陳  
與宋

秋

翬帥師會宋公陳侯蔡人衛人伐鄭

翬音輝○左傳曰宋公使

來乞師公辭之羽父請以師會之公弗許固請而行薛氏曰師興而後翬會之也程子曰左氏以為再伐妄也再叙四國重言其罪永嘉呂氏曰州吁弑君之賊未能定其位而求寵于諸侯使宋公如夫子沐浴之意率諸侯以討罪人可也如其不能則不徇其一時之邪說以聽天下有能治之者亦可也今也徇逆賊之謀修一己之怨合四國以伐鄭四國之兵方合而翬又帥師會之亂臣賊子之

勢益張故書翬帥師而再序四國聖人之筆嚴矣  
單伯會伐宋不再序諸國以彼無大惡也登曰翬  
魯再命之大夫其後翬弒隱公  
而桓公立乃進為三命始書氏

九月

衛人殺州吁于濮

濮音卜。左傳曰州吁未能和其民厚問定君于石子石子曰

王覲為可曰何以得覲曰陳有寵于王陳衛方睦若朝陳使請必可得也厚從州吁如陳石碛使告于陳曰衛國褊小老夫耄矣無能為此此二人者實弒寡君敢即圖之陳人執之而請涖于衛衛使右宰醜涖殺州吁于濮石碛使其宰孺羊肩殺石厚于陳公羊傳曰稱人討賊之辭也程子曰衛人衆辭舉國殺之也陸氏曰凡作亂自立為君而國人殺之者皆稱人以殺言衆所共棄不君之也張

氏曰濮水名在曹衛之間受河汴二水東北至灘派分為二俱東北至鉅野入濟

冬

十有二月

衛人立晉

左傳曰衛人逆公子晉于邢宣公即位穀梁傳曰衛人逆者衆辭也立者不宜立

也高氏曰晉乃桓公之弟莊公之子于次當立又國人之所同欲而謂之不宜何也彼曰我君之子也國我之國我宜立國人亦曰彼吾君之子也國乃其國彼當立是諸侯之子不必命于天子特以公子之親衆人宜之而自立也如此則千乘之國皆可擅置其君而邦君之子皆可專有其國矣孫氏曰諸侯受國于天子非國人可得立也高郵孫氏曰晉以國人衆立宜有得立之禮聖人特于疑

似之間而明不當立之義澄曰春秋常事不書若  
所宜立則以常事經不書矣篡賊既討衛國無君  
衆人同心擇所宜立者疑于不害義矣聖筆  
別嫌明微特書于經穀梁之傳得其旨矣哉沙隨  
程氏曰尹氏立王子朝一族之私也衛人立晉一  
國之公也立晉者著晉無干位之嫌也時王政不  
及于諸侯若平世  
須王命而後可

經書月三書日一大衍歷正月甲子大丙子冬至  
二月甲午小戊申十五日三月癸亥大四月癸巳  
小五月壬戌大六月壬辰小七月辛酉大八月辛  
卯小九月庚申大十月庚寅小十一月己未大十  
二月己丑小長歷戊  
申在三月十七日

五年

○癸亥桓王二年○蔡宣三十二○曹桓三十九  
○衛宣公晉元年○晉鄂六○鄭莊二十六○

陳桓二十七○祀武三十三○宗瑒二○  
齊僖十三○秦文四十八○楚武二十三○

春

公觀魚于棠

左觀作矢○左傳曰公將如棠觀魚者臧僖伯諫曰凡物不足以講大事

其材不足以備器用則君不舉焉山林川澤之實器用之資皂隸之事官司之守非君所及也公曰吾將畧地焉遂往陳魚而觀之公羊傳曰棠濟上邑杜氏曰高平方與縣北有武唐亭張氏曰今單州魚臺縣有魯侯觀魚臺澄曰古者天子季冬之月命漁師始漁先薦寢廟隱公益非為宗廟嘗魚而往棠乃遠地漁師取魚而公往觀之特為游觀之樂耳

夏

四月

葬衛桓公

左傳曰衛亂是以殺張氏曰桓弒十四月賊討而後葬桓公名完而謚桓古不

諱嫌名也陵陽李氏曰先儒以為衛侯爵而稱公蓋罪其臣子不請於王而私自謚按齊魯侯爵而

自丁公魯公以來皆號為公則其來已久非昉于東遷之後矣周公制禮五等諸侯子曰公子孫曰

公孫宮曰公宮門曰公門未聞邾莒之邦子稱子子許宿之國孫稱男孫者也而何獨新于謚哉故

諸侯之謚例稱公其常也先儒執于秦漢以後尊君卑臣之文而不考之禮故一明之以破後世謬

諛之習

秋



衛師入郟

郟公作盛後同郟音成○左傳曰衛之亂也郟人侵衛故衛師入郟公羊傳曰

將卑師衆稱師將卑師少稱人將尊師少稱將尊師衆稱某帥師君將不言率師書其重者也杜氏曰東平剛父縣有郟鄉張氏曰今之單州任城縣也澄曰郟國名伯爵衛與郟皆文王之子郟乘亂侵衛已非禮衛又報復而入其國莒入向魯入極且不可况以師而入兄弟之國乎

九月

考仲子之宮初獻六羽

左傳曰考仲子之宮將萬馬公問羽數于衆仲對曰

天子用八諸侯用六于是初獻六羽始用六佾也程子曰考始成而祀也仲子不得為夫人故別宮以祀之成王賜魯用天子禮樂祀周公後世遂羣廟皆用仲子別宮故不敢同羣廟而用六羽也書

初獻見前此用八之僭也沙隨程氏曰夫人已配先公之廟故妾母別立宮然隱公預為桓公考仲子之宮是以妾僭妾母也婦人無武事故有羽而無干獻六羽是以妾僭夫人也

邾人鄭人伐宋

左傳曰宋人取邾田邾人告于鄭曰請君釋憾于宋敝邑為道鄭人

以王師會之伐宋入其郭杜氏曰邾主兵故序鄭上

螟

螟音冥○蟲食苗心曰螟為災故書

冬

十有二月

辛巳公子彊卒

彊苦侯切○書氏書名三命之大夫彊臧僖伯也

宋人伐鄭圍長葛

左傳曰報入郟之役趙氏曰伐國而圍邑皆書之不可偏遺也

蘇氏曰伐其國又圍其邑也張氏曰長葛鄭邑今潁昌府長葛縣宋殤公以邾鄭伐已之故報怨于鄭聲其罪而圍其邑澄曰前書莒人伐杞取牟婁一加兵即取其邑取之易也宋雖加兵于鄭之邑而取之難故圍之經年乃能取

經書月三書日一大衍歷正月戊午大辛巳冬至二月戊子小辛亥大寒三月丁巳大壬午雨水四月丁亥小壬子春分五月丙辰大癸未穀雨六月丙戌大癸丑小滿七月丙辰小甲申夏至八月乙酉大甲寅大暑閏月巳卯小九月甲申大十月甲寅小十一月癸未大十二月癸丑小辛巳二十九日長歷是年閏十二月

六年

甲子桓王三年。○晉哀侯光元年。○鄭莊二十七年。○陳

桓二十八年。○杞武三十四年。○宋殤三十四年。○齊

春

鄭人來輸平

輸左作渝。○來者彼來求我非我往求彼也。輸謂輸寫其情平謂兩國昔

有忿怨如地之不平。今悉剗削而使之平也。輸平猶曰納歛也。上年魯嘗同宋衛伐鄭。今鄭釋其怨而求和於魯。故曰來輸平。沙隨程氏曰輸如呂刑輸而孚之。輸我無欲平之意。而鄭輸其平于我。孫氏曰鄭來輸成平四年。翬會諸侯伐鄭之怨也。胡氏曰輸者納也。平者成也。公之未立與鄭戰于狐壤元年。及宋盟于宿四年。遇宋于清。其秋會師伐鄭。宋魯為黨與鄭有舊怨。明矣。鄭來納成解仇釋。

怨以利相結離宋魯之黨也永嘉陳氏謂春秋之初宋魯陳衛為一黨齊鄭為一黨今鄭先來與魯平就合齊魯之交自此以後魯合于齊鄭而離宋魯之交矣張氏曰鄭莊之納平為合黨敵宋許繼以納枋而未即求許所以為敗宋入許之權與魯隱入于其術中也

夏

五月

辛酉公會齊侯盟于艾

左傳曰始平于齊也杜氏曰春秋魯與齊不平艾秦

山牟縣有艾前山張氏曰今之襲慶府奉符縣也澄曰前此魯未嘗與齊交因鄭人來輸平之後鄭遂合齊魯之交而公始與齊盟蓋皆鄭莊謀也

秋

七月

公羊傳曰此無事何以書四時具然後為年程子曰無事書首月天時王月備而後成歲

也

冬

宋人取長葛

張氏曰宋自去冬圍長葛經年不解志在必取鄭莊不求保其土地人民

反結交于魯以為後日報復之計而與長葛于宋宗殤雖若得志而後日終受鄭莊報復感國喪師

以及其身

經書月二書日一大衍歷正月壬午大丙戌冬至二月壬子小三月辛巳大四月辛亥小五月庚辰

大六月庚戌小經傳五月庚申辛酉在六月七月  
巳卯大八月巳酉小九月戊寅大十月戊申大十  
一月戊寅小十二月丁未  
大長歷辛酉五月十二日

七年

乙丑桓王四年。蔡宣三十四。曹桓四十一。  
衛宣三。晉哀二。曲沃武公稱元年。鄭莊  
二十八。陳桓二十九。杞武三十五。宋殤  
四。齊僖十五。秦文五十。楚武二十五。

春

王三月

叔姬歸于紀

薛氏曰叔姬者何紀伯姬之妹也勝  
不從乎嫡盛禮而歸之非禮也何氏

曰叔姬者伯姬之媵至是乃歸者待年父母國也  
登曰伯姬叔姬蓋皆惠公之女伯姬隱二年歸為

紀夫人叔姬不同歸者年小而待年於國既長則歸從其嫡常事爾不當書隱公欲厚于先公之女而如歸嫡之禮以歸于紀故書之以著其非禮或謂嘉其賢或謂閔其無終故書者皆非也聖人筆削有定法豈逆計其他日之事而預書之也哉

滕侯卒

左傳曰不名未同盟也公羊傳曰不名微國也程子曰不名史闕也趙氏曰凡諸侯

同盟名于載書朝會名于要約聘告名于簡牘故于卒赴可知而紀也非此則否示詳慎也左氏云同盟薨則赴以名于理不安豈有臣子正當創巨痛深之日乃忍稱君之名禮篇所錄云寡君不祿而已春秋諸侯卒不同盟者凡五十二人九人不書名餘並書名澄按微國亦有書名者唯無可考證則舊魯史不載其名而夫子因之也杜氏曰滕國在沛丘縣東南張氏曰今徐州滕縣也



夏

城中丘

杜氏曰中丘在邾臨沂縣魯無敵國外患之警盛夏今沂州臨沂縣

興工築非人君重民力之意程子曰凡用民力興作不時害義固為罪雖時且義必書見勞民為重事也書城者完舊也書築者創始也杜氏諤曰春秋書城邑二十四城中丘為之始

齊侯使其弟年來聘

左傳曰夷仲年來聘結艾之盟也登曰年非卿非大夫特

以國君之弟其尊同于再命之大夫故名而不氏著其弟二字于上以見其屬之貴而齊侯寵用之與命卿大夫同也年若為三命之卿則書公子年若再命之大夫則但書年今于年之上加其弟字以見其非三命亦非再命也聘者諸侯遣大夫通好與國齊魯初通好而為艾之盟至此齊遣人來

聘以繼  
前好也

秋

公伐邾

左傳曰為宋討也杜氏曰公拒宋而與鄭平欲以鄭為援今鄭復與宋盟故懼而伐

邾欲以求宋故曰為宋討胡氏曰奉詞致討曰伐宋先取邾田故邾入其郛魯與邾儀父元年盟于蔑矣邾何罪可聲高氏曰著公背元年之盟也蓋宋之伐鄭公實與謀而邾乃魯之附庸宋取邾田邾不告魯而以告鄭至是公因為宋伐之自背其盟為人伐人非義之甚

冬

天王使凡伯來聘

杜氏曰凡伯周卿士凡國伯爵也汲郡供縣東南有凡城張氏

曰今濬州黎陽縣之境澄曰凡蓋周公之後封於  
凡入為王朝六命之卿加一命而爵為七命之伯  
也程子曰周禮時聘以結諸侯之好諸侯不脩臣  
職而聘之非王體也永嘉呂氏曰隱公即位已七  
年其臣未有一如京師而天子乃遣使以聘之何  
哉十二公之中魯之臣如京師者六王之臣來聘  
者八然止于宣公自宣十年定王使王季子來聘  
之後魯立五公周更四王皆無來聘之文蓋周室  
之衰尤甚于前禮文不足以結諸侯矣書來求  
者三則止于文公書來錫者三則止于成公

戎伐凡伯于楚丘以歸

杜氏曰楚丘衛地在濟陰城武縣西南張氏曰戎見

隱二年或云此戎乃已氏之戎本昆吾氏之別種周  
衰入居中國者也楚丘今拱州之楚丘縣漢為梁  
國已氏縣非衛之楚丘杜註衛地非也高氏曰此  
執凡伯也而曰伐者初戎朝于周發幣于公卿凡

伯弗賓故戎執之夫戎慕夏禮而發幣凡伯乃弗  
賓至是見執故書戎伐見戎執詞且有兵衆也○  
經書月一書日無大衍歷正月丁丑小壬辰冬至  
二月丙午大三月丙子小四月乙巳大五月乙亥  
小六月甲辰大七月甲戌小八月癸卯大傳七月  
庚申在八月九月癸酉小十月壬寅大十一月壬  
申小十二月辛丑大  
長歷是年閏十二月

八年

丙寅桓王五年○蔡宣三十五卒○曹桓四十  
二○衛宣四○晉哀三○鄭莊二十九○陳桓十  
三十○杞武三十六○宋殤五○齊僖  
十六○秦寧公元年○楚武二十六

春

宋公衛侯遇于垂

杜氏曰垂衛地濟陰句陽縣東  
北有垂亭張氏曰垂近魯地宋

殤衛宣簡禮相見以謀事也左氏以為齊欲平宗  
衛于鄭宗衛本無隙而與鄭為仇必無齊欲平宗  
遇止是二君素相與者而瓦屋之盟齊方與焉則  
平齊可知也高氏曰殤公嘗從州吁之請伐鄭以  
圖為矣州吁誅宣公立焉不可不終圖而未知宣  
公之從否故宗衛相見于垂以謀鄭十年宗衛入  
鄭蓋垂之謀也謀人之國不以禮見而陽若相遇  
春秋因實書之而貶寓焉

### 三月

鄭伯使宛來歸枋

枋音崩公穀作邠○左傳曰鄭  
請以泰山之枋易許田杜氏曰

鄭桓公周宣王母弟封鄭有助祭泰山湯沐之邑  
在枋枋在瑯邪費縣東南成王營王城賜周公許

田以為魯國朝宿之邑鄭欲以枋易許田各從本國所近之宜永嘉呂氏曰枋者鄭之邑而近于魯許田者魯之邑而近于鄭左氏言鄭以枋易許田經有來歸枋之文未見其有易許田之事也桓公即位而後鄭伯以璧假許田則假許田在桓公之世而不在隱公之世矣左氏以其事比言而謂之易也是時鄭將以結魯而非魯結鄭前年來輸平則約之以言今年來歸枋則啗之以利致惠以結魯好將為糾合之地爾雖然其歸枋也固已覲覲許田矣特以方求結于魯故姑緩之既而桓公篡立于是要其許田始取償于魯歸字有二義有以還其所有謂之歸有以易而言歸來歸枋是鄭以歸于魯非魯取于鄭也高氏曰鄭人來輸平然名輸而實不至于是歸枋急于欲得魯援先儒以為易許田非也桓二年鄭伯以璧假許田是隱公之時實未嘗易張氏曰枋在今沂州之屬縣魯鄭各

以其所近之邑相易此謀始于輸平之時先以枋歸魯以固魯之好而隱公未許其易許田也鄭莊不憚委先祖所受王邑於人所謂將欲取之必固與之者卒使魯隱間齊于宋以成敗宋入許之必計又終得許田于魯見鄭莊為小人

之雄也澄曰宛鄭大夫再命者

庚寅我入枋

張氏曰此因鄭之歸我使吏治其故地而主有之也既不以力得則當如

齊人歸我濟西田不必書入枋可也入者難辭義不當受而據有之永嘉呂氏曰來歸鄆謹龜陰田不言入蓋鄆謹龜陰我故物也此言入則非我故物也高氏曰鄆謹龜陰本我之邑歸則有之矣此特書入者以其非我之有不當入者孟子謂子噲不得與人燕子之不得受燕于子噲鄭之歸魯之入其罪均也

夏

六月

己亥蔡侯考父卒

考父宣公也宣公以周平王二十二年壬辰為元年在位三十

五年子封人嗣是為桓侯

辛亥宿男卒

不名義同滕侯

秋

七月

庚午宋公齊侯衛侯盟于瓦屋

穀梁傳曰諸侯之參盟于是始永嘉



陳氏曰有參盟然後有主盟矣春秋之初宋魯衛陳蔡一黨也齊鄭一黨也鄭有志于叛王而合諸侯于是輸平于魯齊亦為艾之盟以平魯為瓦屋之盟以平宋衛東諸侯之交盛矣張氏曰瓦屋地此宋衛欲成平于齊齊從其請而與之盟也春秋之初皆離會之盟至此而三君合以要言正可因此以講信脩睦而明年齊魯會防又明年齊魯鄭伐宋視今日誓盟之言不復顧世變之甚可勝哉言

# 八月

## 葬蔡宣公

春秋書宣公而史記世家稱宣侯蓋蔡國之史記代代皆以侯配諡乃其國之

私稱而史遷因之以禮之正當從春秋書公者為是

九月

辛卯公及莒人盟于浮來

浮來公穀浮作包口杜氏曰浮來紀邑東莞縣

北有邳鄉邳鄉西有公來山張氏曰浮來莒地今沂州沂水縣有浮來山以國君之貴下比小國之

大夫非莒人之敢敵諸侯公自失人君之體也澄曰莒小國其卿再命書名其大夫一命書人疑此

是莒當國之卿再命當稱名者以國君與大夫盟故降稱人以厭之凡國君下同大夫例皆若是其

大夫氏名不可沒者則不稱公也陸氏曰凡公與外大夫盟例不書公及齊高僕晉處父盟是也莒

小國也非大夫敢盟公公自欲與之盟爾特書公以明非大夫之罪也高氏曰莒雖小國入向伐紀

其力猶能及他人故公結此盟以求援

螟為災故書高氏曰春秋書螟者三隱二莊一僉者十有一桓一餘皆僖公之後螟食苗心僉無所不食其為災也螟輕而僉重

冬

十有二月

無駭卒

此公子展之孫夷伯展禽其後也生未三命故不氏卒乃賜氏曰展以王父之字為

也氏

經書月六書日五大衍歷正月辛未大丁酉冬至二月辛丑小丁卯大寒三月庚午大經庚寅二十一日戊戌雨水四月庚子小戊辰春分閏月巳巳大五月巳亥小巳亥穀雨經六月巳亥辛亥在此

月六月戊辰大經七月庚午在此月七月戊戌小  
八月丁卯大經九月辛卯在此月九月丁酉小十  
月丙寅大十一月丙申小十二月乙丑大長歷庚  
寅三月二十二日巳亥六月二日辛亥十四日庚  
午七月四日辛卯  
九月二十六日

九年

丁卯桓王六年○蔡桓侯封人元年○曹桓桓  
十三○衛宣五○晉哀四○鄭莊三十○陳桓

三十一○杞武三十七○宋殤六○  
齊僖十七○秦寧二○楚武二十七

春

天王使南季來聘

穀梁傳曰南氏也南氏也季字也澄曰  
天子之大夫四命稱氏稱字程

子曰王法之行時加聘問以懷撫諸侯常禮也春  
秋諸侯不修朝覲之禮王反聘之又不見答張氏

曰隱公十年之間宰咺凡伯南季三至魯庭隱公朝聘之禮不行于王室春秋詳王使之來魯讀者自知隱公之罪胡氏曰經書公如京師者一朝于王所者二卿大夫如京師者五舉魯一國則天下諸侯怠慢不臣可知矣書天王來聘者七錫命者三賜葬者四則問于他邦及齊晉秦楚之大國又可知矣王之不王諸侯之不可如此君臣上下之分易矣

三月

癸酉大雨震電

庚辰大雨雪

雨于付切○穀梁傳曰震雷也電霩也陰陽錯行八日之間再有大變高

氏曰大者非常之辭大雨震電者大雨而又震電也建寅之月而震電八日之間復大雨雪雨自上

下者震電者陽精之發雨雪者陰氣之凝杜氏曰三月今正月夏之正月微陽始出未可以震電既震電又不當大雨雪

挾卒

挾音叶公穀作俠○挾魯大夫之再命者再命例書名不氏義同無駭

夏

城郎

杜氏曰郎魯邑高平方與縣東南有郎亭襄陵許氏曰七年城中丘而後伐邾今城郎而

後伐宋高氏曰魯自受枋之後將為鄭伐宋又恐他國之有議其後者故城郎以備之

秋

七月

冬

公會齊侯于防

防公作邠。左傳曰：謀伐宋也。杜氏曰：防魯城在瑯邪華縣東南。張

氏曰：今密州諸城縣有防城。魯隱六年受輸平八年歸枋入枋志于昵鄭而仇宗于是為防之會。俾

齊僖背瓦屋之盟此謀為明年伐宋之地也。高氏曰：此齊背瓦屋之盟與公連謀為鄭伐宋也。隱公

得利則合鄭既歸枋與齊鄭併力齊之強大可以為助可以伐人故諸侯爭與之盟。宋既與之謀鄭

而魯鄭又與之謀宋也。

經書月二書日二大衍歷正月乙未小壬寅冬至二月甲子大三月甲午小四月癸亥大經三月癸

酉庚辰在此月五月癸巳大六月癸亥小七月壬辰大八月壬戌小九月辛卯大十月辛酉小十一

月庚寅大傳甲寅二十五日十二日庚申小長  
歷是年閏十月癸酉三月十一日庚辰十八日

十年

戊辰桓王七年○蔡桓二○曹桓四十四○衛  
宣六○晉哀五○鄭莊三十一○陳桓三十二

○杞武三十八○宋殤七○齊僖  
十八○秦寧三○楚武二十八

春

王二月

公會齊侯鄭伯于中丘

左傳曰為師期高氏曰將  
伐宋二國相會為師期七

年城中丘蓋  
為此會爾

夏



翬帥師會齊人鄭人伐宋高氏曰公元年及宋盟宿四年又遇于清和好  
非一日矣今一旦以兵加之始為宋謀鄭既得鄭  
利今為鄭謀宋又欲得宋利也唯知貪利不復顧  
義也程子曰三國先遣將  
致伐齊鄭稱人非卿也

六月

壬戌公敗宋師于菅

菅音奸。杜氏曰齊鄭後期故公獨敗宋師書敗宋未陳

也菅宋地劉氏曰皆陳曰戰詐戰曰敗

辛未取郟

郟音告

辛巳取防

左傳曰鄭入郟入防歸于我杜氏曰濟陰城武縣東南有郟城高平昌邑縣西

南有西防城公獨敗宋師鄭伯後至頗獨進兵以入部防得二邑歸于魯張氏曰鄭莊以齊之背宋從已魯之力也故得二邑而不取俾魯取之春秋書取著其無名而擅取之也劉氏曰經書公敗宋師取部取防豈得如傳言哉薛氏曰乘菅之勝十日而攘二邑書取我奪之于宋也取非其有者也高氏曰公以妨故翬先會伐而自將悉力以敗宋師決旬之間取其二邑魯受人不義之惠遂興兵伐同盟無罪之國以報私惠是以春秋書法如此

# 秋

宋人衛人入鄭

左傳曰鄭師入郊猶在郊宋衛入鄭程子曰鄭勞民以務外而不知

守其國故二國入之高氏曰宋又連衛以報鄭鄭幸菅之敗而不備故師還及郊宋衛已乘其虛而

入之矣春秋雖無義戰未有奇譎輕疾如宋衛之入鄭者

宋人蔡人衛人伐戴鄭伯伐取之

戴公穀作載○左傳曰宋衛既

入鄭而以伐戴召蔡人蔡人從之伐戴鄭伯圍戴克之取三師焉澄曰取猶哀九年宋皇瑗取鄭師于雍丘哀十二年鄭罕達取宋師于屈之取謂敗其兵而悉俘其衆也程子曰戴鄭所與故鄭戴合攻盡取三國之衆高氏曰宋既連兵入鄭又乘勝召蔡人伐戴戴鄭所與之微國伐之所以報鄭也鄭又伺三國之便伐而取之盡得三師之輜重馬是宋衛雖能入鄭不能弱鄭也杜氏曰三國之君在戴故鄭伯合圍之陳留外黃縣東南有戴城張氏曰戴國舊城在今開封府考城縣

冬

十月

壬午齊人鄭人入郟

高氏曰戴鄭所與也而三國伐之郟衛所與也而齊鄭入

之薛氏曰於此郟再入矣諸侯專兵而小國無以措其手足澄曰蓋自五年衛師入郟之後郟遂服

屬于衛故為衛之與

經書月三書日四大衍歷正月巳丑大丁未冬至傳癸丑二十五日二月巳未小三月戊子大四月

戊午小五月丁亥大六月丁巳小經壬戌六日辛未十五日辛巳二十五日七月丙戌大傳庚寅五

日八月丙辰小傳壬戌七日九月乙酉大十月乙卯大經壬午二十八日十一月乙酉小十二月甲

寅大二十九日壬午小雪長曆壬戌六月七日辛未十六日辛巳二十六日壬午十月二十九日

十有一年

○巳桓王八年○蔡桓三○曹桓四十五

桓三十三○祀武三十九○宋殤八○  
齊僖十九○秦寧四○楚武二十九

春

滕侯薛侯來朝

穀梁傳曰諸侯來朝植言同時也  
累數皆至也范氏曰植言謂別言

同時來不俱至若穀伯綏來朝鄧侯吾離來朝也  
累數總言之同時俱至若滕侯薛侯來朝也張氏  
曰薛夏奚仲之後國都在魯國薛縣劉氏曰王者  
之制諸侯歲相問殷相聘世相朝燕言之何譏旅  
見也非天子不旅見諸侯相朝之禮相朝者兩君  
曰大戴記朝事篇載諸侯相朝之禮相朝者兩君  
以禮相見論語所謂兩君之好是也惟諸侯朝天  
子可以旅見諸侯相朝但書時見今滕薛二國同

日行禮後書邾牟葛三國來朝亦然俱為非禮孫氏曰齊晉宋衛未嘗朝魯而滕薛邾杞來朝齊晉威也宋衛敵也滕薛邾杞土地狹陋兵衆寡弱不能與魯抗也

夏

五月

左無此二字

公會鄭伯于時來

時來公作祁黎○左傳曰謀伐許也杜氏曰時來鄭地滎陽縣

東有釐城張氏曰今屬鄭州高氏曰公既得宋地又會鄭謀許貪欲無厭也澄曰鄭莊以小利餌魯隱既與之伐宋為鄭報怨矣又將與之同伐許為鄭益地許與鄭接壤鄭之所利齊魯無與焉者也鄭伯以計鉤致齊魯之君而借其兵力吞併小國以利益於已甚哉鄭之不仁而齊魯之不知也

秋

七月

壬午公及齊侯鄭伯入許

左傳曰伐許傳于許瑕叔盈取鄭伯之旗螿

以先登鄭師畢登遂入許許莊公奔衛齊侯以許讓公公曰君謂許不共故從君討之許既伏其罪矣雖君有命寡人不敢與聞乃與鄭人鄭伯使許大夫奉許叔居許東偏使公孫獲處許西偏張氏曰許今潁昌府長杜縣高氏曰魯既為鄭敗宋師今又為鄭入許蓋由歸枋之故也澄按欲得許地者鄭之本謀遂破許國者鄭之專功特以借齊魯兵力以同伐齊以國大爵尊為主兵既入許鄭莊陽不有其功而讓于齊侯以克許非已功而不

敢受乃以讓魯魯又以克許非已功而不

以與鄭鄭即受之而不辭竟得遂其貪土地之志  
齊魯二君墮鄭之術中而為之出力也書入不書  
滅者許君既奔他國鄭雖專有其地而使許君之  
弟奉其宗廟不絕其祀也入者亡國之善辭何善  
也以為猶愈于取其土地而并絕其宗祀者爾

冬

十有一月

壬辰公薨

左傳曰羽父請殺桓公將以求太宰公曰為其少故也吾將授之矣使營菟裘

吾將老焉羽父懼反譖公于桓公而使賊弑之公祭鍾巫齊于社園館于蔦氏羽父使賊弑公立桓公而討蔦氏不書葬不成喪也公羊傳曰公薨不地不忍言也君弑賊不討不書葬以為無臣子也登



曰君薨必詳其地以示正終不地者不暇辨其正  
不正而有恐言者蓋弑也君弑臣子當戮力討  
賊以復讐故賊未討則不敢葬其不知討賊  
而遂葬者臣子之不忠孝而忘君父之讐也

經書月三書日二大衍歷正月甲申小閏月癸丑  
大二月癸未小三月壬子大四月壬午小五月辛  
亥大六月辛巳小傳五月甲辰在此月七月庚戌  
大八月庚辰小經七月壬午在此月九月巳酉大  
十月巳卯小十一月戊申大傳十月壬戌在此月  
十二月戊寅大經十一月壬辰在此月長歷壬午  
七月三日壬辰  
十一月十五日

春秋纂言卷一

欽定四庫全書

春秋纂言卷二

元 吳澄 撰

桓公 名軌史記作允惠公之子隱公之弟母仲子夫人文姜在位十八年

元年 庚午桓王九年○蔡桓四年○曹桓四十六年○衛宣八年○晉哀七年○鄭莊三十三年○

陳桓三十四年○杞武四十年○宋殤九年○齊僖二十年○秦寧五年○楚武三十年

春

王正月

公即位 穀梁傳曰先君不以道終則不忍即位也繼故而即位與聞乎弑也啖氏曰凡天子

崩諸侯薨既殯而嗣子為君未就阼階之位來年正月朔日乃就位南面而稱元年先君正終則嗣子逾年行即位禮先君遇弒則嗣子廢即位之禮桓公繼弒君而行即位禮與弒也

三月

公會鄭伯于垂

高氏曰鄭伯以知公之篡逆不自安特為好會將以求賂焉度魯亟于

會諸侯必從所欲故也夫鄭伯與隱公同盟今見其賊不能討反有所邀求欲以定其位是誠何心哉

鄭伯以璧假許田

穀梁傳曰非假而曰假諱易地也許田者魯朝宿之邑也禮天子

子在上諸侯不得以地相與也劉氏曰許田周公之邑也詩云居常與許復周公之宇其稱田何田

多邑少稱田邑多田少稱邑蘇氏曰許田所以易  
枋也以枋為未足而益之以璧爾程子曰隱之八  
年鄭伯使宛來歸枋蓋欲易許田魯受枋而未與  
許及桓弑立故為會而求之復加以璧朝宿之邑  
先祖受之于先王豈可  
相易也故諱之曰假

夏

四月

丁未公及鄭伯盟于越

高氏曰會垂之時固欲結  
鄭援以自安以垂會未可

保其必信也故又盟而位乃定焉鄭既得許田始  
與公為此盟也張氏曰越近垂地名鄭人欲得許  
田以自廣是以為垂之會桓公欲結鄭  
好以自安是以為越之盟書及內志也

秋

大水

高郵孫氏曰大者非常之辭水非常而為災或害民禾稼敗民廬居為災則書也張氏曰

陰盛惡逆之氣所感也

冬

十月

經書月四書日一大衍歷正月戊申小戊午冬至  
二月丁丑大三月丁未小四月丙子大五月丙午  
小經四月丁未在此月六月乙亥大七月乙巳小  
八月甲戌大九月甲辰小十月癸酉大十一月癸  
卯小十二月壬申大  
長歷丁未四月二日

二年

辛未桓王十年○蔡桓五○曹桓四十七○衛宣九○晉哀八○鄭莊三十四○陳桓三十五

○杞武四十一○秦寧六○宋殤十○弒○齊僖二十一○楚武三十一

春

王正月

戊申宗督弒其君與夷及其大夫孔父

穀梁傳曰孔氏父字

督欲弒君先殺孔父孔父先死其曰及何也尊及卑春秋之義也公羊傳曰孔父立于朝人莫敢致難于其君者孔父存則殤公不可得弒也孫氏曰孔父諸侯之大夫命于天子者宗孔父鄭祭仲魯單伯陳女叔是也登曰晉宗大夫再命者孔父宗大夫四命天子所命者宗穆公和立其兄宣公之

子與夷是為殤公使其子馮出居于鄭鄭莊公欲納之宋鄭屢交兵以此之故督執國政蓋黨于馮者欲弑殤公立馮而憚孔父故先攻殺孔父而後殤公可得而弑先書弑君者尊卑之序又以見孔父為君而死也高氏曰按宋世系正考父生嘉字孔父其孫畢夷因以為氏昔人名嘉而字孔者多矣鄭公子嘉楚成嘉皆字子孔

滕子來朝

胡氏曰隱公末年滕稱侯距此三歲爾乃降而稱子孫氏曰杞公爵也滕薛皆

侯也入春秋杞或稱侯或稱伯或稱子皆降也滕或稱侯或稱子稱侯正也稱子降也薛或稱侯或稱伯稱侯正也稱伯降也此蓋聖王不作朝會不常披三國者力既不足禮多不備或以侯禮而朝或以伯子而會孔子從而錄之以見其亂也澄曰隱十一年稱侯今降稱子者蓋國小財匱不能備



以七為節之禮故自降其等而以五為節也此義蓋朱子之意與孫氏意同諸家或以為貶或以為文誤或以為時王所黜俱未安

三月

公會齊侯陳侯鄭伯于稷以成宋亂

左傳曰宋殤公立十年十

一戰民不堪命孔父嘉為司馬督為太宰殺孔父弑殤公召莊公于鄭而立之以郟大鼎賂公齊陳鄭皆有賂故遂相宋公會稷以成宋亂為賂故也杜氏曰稷宋地胡氏曰春秋列會未有言其所為者獨此與襄公末年會于澶淵各書其事督弑殤般弑景皆天下大惡一則受宋賂而立華氏一則謀宋災而不討弑君之賊也張氏曰四國之君若能奉天討如隱四年之誅州吁則其亂不得成矣魯桓

弑隱方以類合三國黨惡謀以賄行相與定宋馮  
立華督而相之反易天常者得以肆志所以直書  
成亂深著四國之罪永嘉呂氏曰不書以成宋亂  
則稷之會疑于謀討督不書宋災故則澶淵之會  
疑于謀討蔡直書其所為  
而後是非善惡之實著

夏

四月

取郟大鼎于宋

戊申納于大廟

殺梁傅曰桓內弑其君外成人之  
亂受賂而退以事其祖周公弗受

也杜氏曰大廟周公廟也程子曰四國成宋亂而  
宋以鼎賂魯魯取成亂之賂器置于周公廟周公

其饗之乎高郵孫氏曰鼎自宋得之然鼎之成自郟也不啻和氏之璧是也

秋

七月

紀侯來朝

紀左作紀程子曰凡紀稱侯者皆當為紀侯來朝紀侯非侯文誤也及紀侯大夫其國

之後杞不復稱侯矣○胡氏曰齊欲滅紀紀求魯為之主非桓立而朝之也登曰齊謀并紀而鄭

助之紀國小弱為齊鄭所謀度不能自存以魯與齊鄭睦故來朝魯將求庇焉然魯桓內負弑逆之

惡而外黨弑逆之賊滅天理之人也于所厚者薄無所不薄矣又何能庇婚姻之微國哉

蔡侯鄭伯會于鄧

左傳曰始懼楚也杜氏曰潁川召陵縣西南有鄧城胡氏曰其

地以國鄧亦與焉楚自西周已為中國之患宣王  
蓋嘗命將南征矣及周東遷僭號稱王馮陵江漢  
此三國者地與之鄰是以懼也其後卒滅鄧虜蔡  
侯而鄭以王室懿親為之服役終春秋之世聖人  
蓋傷之也高氏曰左氏以為懼楚時楚雖已僭號  
尚未入侵中國何為而先自懼乎隱四年蔡與宗  
陳魯伐鄭十年又與宗衛伐鄭其積怨未解今鄭  
與齊宗魯陳皆釋去前憾故蔡與鄭于是始平于  
鄧也然至四年而蔡人復從王伐鄭  
則此會亦不足恃鄧羸姓侯國也

九月

入杞

程子曰將卑師少外則稱入內則止曰入某  
伐某高氏曰以滕紀皆來朝而杞獨不至故

也此年入杞八年伐邾夫桓弑君莫入莫伐  
而已乃入人伐人是使天下共蒙其恥也

公及戎盟于唐

左傳曰修舊好也澄曰舊好隱公二年盟唐之好也然隱公因戎之

請盟至再而後與之盟今戎不請盟而桓及之盟蓋與及鄭盟越之意同以已之負大惡而欲結好

以自固無間于內外也

冬

公至自唐

程子曰君出而書至者有三告廟也過時也危之也桓公弑立嘗與鄭齊陳會

矣皆同為不義及遠與戎盟故危之而書至戎若不如此三國之黨惡則討之矣是以為桓危之也討賊天下之大義戎或能知也張子曰春秋主魯何乃欲戎之討魯君乎蓋聖人初未嘗以主魯而廢拯救三綱之心也程子之傳精矣澄曰春秋書魯君之出而告至自此始古者諸侯出歸必朝于廟此

亦常事不當書其書者有意也桓公弑君篡立周  
失其紀天下無伯列國諸侯無有知義者庶幾求  
諸野乎使戎能如陳侯之于州吁則諸夏有所不  
如矣程子所謂危之者邪高郵孫氏曰春秋書至  
者皆至其所出之事以地至者四此年公至自唐  
十七年公至自穀定八年公至自尾十年夏公至  
自夾谷四處爾趙子以  
為魯地則至自地是也

經書月五書曰二大衍歷正月壬寅小戊申七日  
癸亥冬至二月辛未大三月辛丑小四月庚午大  
五月庚子大經四月戊申在此月六月庚午小七  
月巳亥大八月巳巳小九月戊戌大丙寅處暑閏  
月戊辰小十月丁酉大丁酉秋分十一月丁卯小  
丁卯霜降十二月丙申大長歷戊申正月八日四  
月戊申亦  
在五月

三年

壬申桓王十一年○蔡桓六○曹桓四十八○  
衛宣十○晉哀九○鄭莊三十五○陳桓三十

六○杞武四十二○秦寧七○楚武三十二○  
齊僖二十二○秦莊公馮元年○

春

□正月

桓之經自三年至八年十一年至十七年  
春首月不書王皆文闕胡氏曰以為闕文

安得一公之一十四年皆闕永嘉呂氏曰春秋授  
諸弟子其傳之也豈能無脫文哉桓不書王十四  
不書秋冬二以是知桓公之春秋多闕或曰桓無  
王明天討不加也然桓宣二公皆篡弒皆天討不  
加宣未嘗無王而桓獨無王聖人用法何乃如是  
之異况當時諸侯以篡弒得國者非獨一桓公也  
何以不去王乎若實以桓公無王而不書王則  
當始末盡然又奚元年二年十年末十年書王乎

公會齊侯于羸

羸之會蓋求昏于齊也。以國君娶夫人不由媒介而自往求焉，非禮也。

也。杜氏曰：羸齊邑，今泰山羸縣。

夏

齊侯衛侯胥命于蒲

劉氏曰：齊太公之後，東州之侯。衛康叔之後，西州之侯。胥，命也。

命相命也。古者方伯州牧命於天子，諸侯自相命，非也。高氏曰：胥命者，何相推為牧伯也。張氏曰：齊衛欲私天下之權于己，必求勢力之均者相遜相先，乃敢專之。蒲，胥命正齊桓非命伯而專征之始也。朱子曰：齊衛胥命于蒲，相命為伯也。齊魏會于濁澤，以相王相命為王也。齊致西帝于秦，秦致東帝于齊，相命為帝也。澄謂齊衛之相命為伯，猶漢末朝命不行于天下，而州牧表某人為某州牧。



也杜氏曰蒲衛地在  
陳留長垣縣西南

六月

公會紀侯于邾

紀左作杞○紀憂齊鄭之圖已而求庇于魯公因其來朝而遂與之

會也高氏曰紀懼齊親魯邾亦然

秋

七月

壬辰朔日有食之既

穀梁傳曰言日言朔食正朔也公羊傳曰既盡也程子曰

食盡為異大也高氏曰經書日食三十六而食之既者二此年與宣八年秋七月也

公子翬如齊逆女

公不親逆而使卿逆啖氏曰以

親逆禮之正也若夫邦君以爵則有尊卑以國則  
有小大以道途則有遠邇或迎之于其國或迎之  
於境上或迎之於所館禮之節也紀侯於魯以小  
大言則親之者也而使履綸來魯侯于齊以遠邇  
言則親之者也而使公子翬往是  
不重大昏之禮失其節矣故書

九月

齊侯送姜氏于謹

左傳曰凡公女嫁于敵國姊妹  
則上卿送之公子則下卿送之

於大國雖公子亦上卿送之於天子則諸卿皆行  
公不自送于小國則上大夫送之公羊傳曰諸侯  
越境送女非禮也澄曰魯桓不親迎故齊侯遠送  
其女至於魯之境按士昏禮父之親送女也不下堂

况國君之尊送女出境禮之所無也杜氏曰謹魯地濟北蛇丘縣有下謹亭

公會齊侯于謹

齊僖送其女至謹而魯桓親往受之非禮故書或者乃謂諸侯不出

疆親迎但當迎之於其館果若是則魯為得禮何以饋張氏曰齊僖愛其女越境送之魯桓之出不為親迎而為齊侯在謹特往會之僖之送桓之會皆非禮也

夫人姜氏至自齊

穀梁傳曰其不言輦之以來何也公親受之于齊侯也孫氏曰

此齊侯送姜氏公受之于謹也受姜氏于謹不以謹至者不與公受於謹也故書至自齊以正其義

冬

齊侯使其弟年來聘

左傳曰致夫人也杜氏曰女出嫁又使大夫隨加聘問在

魯而出則曰致女在他國而來則摠曰聘澄曰齊侯親送女至魯境歸未幾又使貴介弟致之見其愛女之至情之私非禮之正也

有年

穀梁傳曰五穀皆熟為有年公羊傳曰有年僅有年也大豐年也何氏曰宣十六

年大有年謂五穀皆大成熟此有年謂五穀多少皆有不能大成熟程子曰人事順于下則天氣和于上桓弒君逆理天地之氣為之謬戾今乃有年故書其異高郵孫氏曰春秋二百四十二年而書有年大有年者二而已其一桓公其一宣公桓宣大惡行何道而有年乎書有者不宜有也

經書月四書日一大衍歷正月丙寅小戊辰冬至二月乙未大三月乙丑小四月甲午大五月甲子小六月癸巳大七月癸亥小八月壬辰大朔日食經書七月壬辰朔食蓋閏差故爾九月壬戌小十

月辛卯大十一月辛酉小十二月庚寅大

四年

癸酉桓王十二年○蔡桓七○曹桓四十九○衛宣十一○晉小子侯元年○鄭莊三十六○

陳桓三十七○杞武四十三○宋莊二○齊僖二十三○秦寧八○楚武三十三○

春

口正月

公狩于郎

啖氏曰蒐狩常事不書非時及越禮則書張氏曰狩者冬獵之名當用夏時之

仲冬周正月迺其時也國之蒐狩自有常處鄭之原圃秦之具囿魯之大野乃田狩之地今不於常

所而速涉郎地所以譏也

夏

天王使宰渠伯糾來聘

左傳曰父在故名澄曰天  
王桓王也宰冢宰渠邑伯

爵糾名也天子之卿六命當書邑爵而不名此書  
名者蓋父在而子襲其邑爵世其官故於爵之下  
特書其名以見其為有父也若父在而子未襲其  
邑爵與官但攝父之職而行事則例當如下年書  
仍叔  
之子

□

□  
□

□

□ □ 杜氏曰不書秋冬首月文闕  
孫氏曰脫二時七年同此

經書月一書日無大衍歷正月庚申大癸酉冬至  
二月庚寅小三月己未大四月己丑小五月戊午

大六月戊子小七月丁巳大八月丁亥小九月丙  
辰大十月丙戌小十一月乙卯大十二月乙酉大

五年

甲戌桓王十三年○蔡桓八○曹桓五○十○衛  
宣十二○晉小子二○鄭莊三十七○陳桓三  
僖二十四○杞武十四○秦寧九○楚武三十四

春

□ 正月

甲戌

陸氏曰此下文脫  
程子劉氏義同

己丑陳侯鮑卒

左傳曰陳亂文公仲殺太子三而代之澄曰鮑文陳桓公也在位三

十八年佗桓公庶弟免桓公太子也

夏

齊侯鄭伯如紀

左傳曰齊鄭朝于紀欲以襲之紀人知之趙氏曰外相如唯此年齊侯鄭

皆譏也常山劉氏曰外諸侯相如唯此年齊侯鄭伯如紀及州公如曹澄曰如紀者朝于紀也凡國

君來朝魯則稱朝往朝他國則稱如內外辭也諸侯相朝雖有其禮然春秋之時小役大弱從彊彊

大之國必不往朝小弱之國雖敵體之國亦不相朝唯小弱者必須往朝於彊大蓋畏之也事之也

齊鄭大名以往紀而實欲以兵襲取其國紀素知齊朝之名以往紀而實欲以兵襲取其國紀素知齊



鄭之圖已故覺其謀而齊鄭之詐不得以行外相  
如不書此特書者惡齊鄭之詐也張氏曰春秋之  
初齊僖鄭莊皆小人之雄合謀同心以吞噬小國  
為事自隱二年石門之盟至桓十一年惡曹之盟  
二十年之間二國為一伐宋取郟防入郟入許今  
又相與謀紀自二君如紀之後紀侯多為計以謀  
自免於難而卒不能止齊鄭貪噬之心至莊五年  
紀季以鄆入于齊紀侯去國然後快于心小國困  
于強暴二君之罪居多澄按許近于鄭紀近于齊  
鄭欲得許與齊同謀之而卒得許齊欲得紀與鄭  
同謀之而卒得紀

天王使仍叔之子來聘

仍叔仍叔之子來聘仍叔作佗○公羊傳曰父

父在子代仕之辭也程子曰古之授任稱其才德  
士無世官周衰官人以世故卿大夫之子代其父

任事仍叔受命來聘而使其子代行也澄曰仍氏叔字此天子四命之大夫稱氏稱字者也

葬陳桓公

不書月史失之蓋陳佗篡立而葬之也

城祝丘

杜氏曰齊鄭將襲紀故高氏曰祝丘齊魯兩境上邑齊將襲紀公欲助紀而畏齊故

城此以備陸氏曰譏不時

秋

蔡人衛人陳人從王伐鄭

左傳曰王奪鄭伯政鄭伯不朝王以諸侯伐鄭

鄭伯禦之戰于繻葛王卒大敗公羊傳曰從王正也啖氏曰不言會及臣從君之辭也永嘉陳氏曰春秋之法有天子在則其諸侯稱人有諸侯在其大夫稱人王師不書書伐鄭鄭不服也伐鄭不

服而後王命不行於天下  
東周之不競鄭莊為之也

大雩

左傳曰書不時也凡祀龍見而雩過則書孫氏曰雩求雨之祭建巳之月常祀也故經無

六月雩建午建申之月非常則書謂之大者雩於上帝也程子曰雩于上帝用盛樂也諸侯雩于境內之山川爾成王尊周公賜魯重祭得郊禘大雩成王之賜魯公之受皆失也故夫子曰魯之郊禘非禮也周公其衰矣大雩歲之常祀不皆書因其非時則書之郊禘亦因事而書劉氏曰其言大何非諸侯之雩也說者皆曰成王賜魯天子禮樂禮有天子諸侯之別自伏羲以來未之有改成王者周之盛王也其惑于魯之有天子禮樂殆周之末王賜之非成王矣昔者魯惠公使宰讓請郊廟之禮于天子天子使史角往惠公止之其後在魯實始為墨翟之學使成王之世而魯已郊則惠公奚請澄

按劉氏此說蓋欲為成王解說過舉之非而已近儒亦有頗宗其說者實則不然當從程子之說為正所引惠公使宰讓請郊廟之禮今載在通鑑外紀其言龐誕無稽劉侍讀學雖極博擇則未精不免時有信奇好異之癖倘使天子之禮諸侯可以請時王可以賜則春秋時強僭之國挾勢援例請之者多矣何獨魯惠能請而他國不敢請乎陵陽李氏曰外紀所據乃姓氏雜書其出又在戴記之後不足以為證

蠡 蠡公作蠡後皆同○公羊傳曰記  
災也程子曰蠡蝗也既旱又蝗

冬

州公如曹

左傳曰淳于公如曹度其國危遂不復杜氏曰淳于州國所都城陽淳于縣也

程子曰州公不能保其國去如曹澄曰州姜姓公  
爵此人君之失國者與紀侯大去其國同但州君  
之去國則有所如紀君之去國則無所如爾凡國  
君如他國者皆朝也以畿內八命之公而朝畿外  
七命之伯蓋其國危亡將寄託於曹假朝禮以行  
實則奔也曹姬姓武王封其弟振鐸于定陶為曹  
國張氏曰曹國漢屬濟陰郡在唐為曹州今興仁  
府濟陰縣州稱公與祭公同則州必畿內之地河  
內州縣也左傳乃云淳于公杜氏云城陽淳于縣  
昭元年傳云城淳于或云因州公不反國為紀所  
并遂以淳于為

都未詳孰是

經書月一書日二大衍歷正月乙卯小巳卯冬至  
甲戌二十日二月甲申大經正月巳丑在此月三  
月甲寅小四月癸未大五月癸丑小六月壬午大  
辛亥小滿閏月壬子小七月辛巳大旦日夏至八

月辛亥小九月庚辰大十月庚戌小十一月巳亥  
大十二月巳酉小長曆正月甲申朔內無甲戌巳

丑正月  
六日

六年

乙亥桓王十四年○蔡桓九○曹桓五十一○  
衛宣十三○晉小子三○鄭莊三十八○陳厲

公躍元年○杞武四十五○宋莊四○  
齊僖二十五○秦寧十○楚武三十五

春

□正月

寔來

寔王朝一命之下士故稱名無王命而私交  
故但書曰來而不言其事也與隱元年祭伯

來義  
同

夏

四月

公會紀侯于成

成穀作邲○左傳曰紀來諮謀齊難也杜氏曰成魯地在泰山鉅平

縣東南張氏曰此與書二年朝三年會邲同旨

秋

八月

壬午大閱

張氏曰失時僭禮故書以譏澄曰天子因四時之田而教民以武事春曰振旅

夏曰菱舍秋曰治兵三時所教其法皆畧惟仲冬教大閱則其坐作進退擊刺真如戰陣以仲冬之

事行於季夏非其時也且大閱者天子之禮非諸侯之所得行為其僭禮故因失時而書之以著其

僭與上年僭  
大雩義同

蔡人殺陳佗

程子曰陳厲公蔡人也故蔡桓侯殺佗而立厲公桓侯殺佗實以私也而

書蔡人同於討賊之例見討賊者衆人之公也澄曰蔡稱人討賊辭也陳不能討而蔡能討之故以

討賊之義歸之蔡篡弑之賊人得而殺之也陳佗篡立既葬桓公陳人君之亦已逾年矣然篡賊

非可稱君故名而不爵凡篡賊而稱君者見本國之臣子與鄰國之君臣皆不能討而成之為君也

苟有一人能明討賊之義則名之為賊而不成之為君矣衛人殺州吁齊人殺無知蔡人殺陳佗是

也



九月

丁卯子同生

公羊傳曰喜有正也左傳曰以太子

按有正者謂嫡夫人生適長子也春秋十二公如

文公如成公皆嫡夫人之嫡長子其生也何以不書

凡國君世子生則必舉以世子生之禮此常事爾

唐趙氏晁善說春秋亦不過從左氏而曰太子生

多矣書子同禮備故也餘公皆不備禮記其是以

著其非然據經但書子同生何以見其禮之備與

不備蓋惟穀梁傳得聖人之意夫世適之生國統

為魯桓之子而非齊襄之子也明矣桓公十八年  
文姜始如齊而通于齊襄其時同之生已十有三  
年矣明年為魯莊公元年文姜遜于齊二年冬會  
齊侯於禚四年春饗齊侯于祝丘五年夏如齊師  
七年春會齊侯于防冬會齊侯于穀八年冬齊侯  
被弑文姜淫亂放蕩其惡播揚在此八年之內子  
同生之時未有此惡行也人見文姜後來之淫亂  
故當時有疑之者夫子志子同之生表其非齊侯  
之子而使後世無疑也此穀梁氏所謂疑故志之  
者歟齊之詩人刺魯莊公不能防閑其母其詩乃  
曰展我甥兮詩人微意亦為魯莊解釋當時之誣  
謗作此詩者君子人也况聖人視魯為父母邦寧  
不思為魯君辨白誣謗之疑乎故以大公至正之  
直筆寓別嫌明微之深意辭簡而義遠真如化工  
焉高氏曰昏禮者上以事宗廟下以繼後世也人  
疑莊公為齊侯之子審如所疑則周公之祀不傳

於魯魯之子孫乃齊之子孫豈不悖哉襄公文姜之淫亂蓋在同生之後當同之生齊魯未嘗亂也謹子同之生月日則以廟祀世系之重在此故特書之使國統著明不書其生則其事不見此之謂微而顯沙隨程氏曰文姜淫在桓公既卒之後子同之生無嫌也所以辨猗嗟之刺著明國統也薛氏曰謹莊公之生決天下之疑也

冬

紀侯來朝

左氏曰請王命以求成于齊公告不能杜氏曰紀微弱不能自通于天子欲因

公以請王命公無罷於王故告不能澄曰齊禍迫矣紀侯僕僕會魯朝魯多方求自全之計而卒不能全上無明王賢伯而彊大肆意以吞噬小弱哀哉

經書月四書日二大衍歷正月戊寅大甲申冬至  
二月戊申小三月丁丑大四月丁未大五月丁丑  
小六月丙午大七月丙子小八月乙巳大九月乙  
亥小經八月壬午在此月十月甲辰大經九月丁  
卯在此月十一月甲戌小十二月癸卯  
大長歷壬午八月八日丁卯九月二十四

七年

丙子桓王十五年○蔡桓十○曹桓五十二○  
衛宣十四○晉小子四○鄭莊三十九○陳厲  
二○杞武四十六○宋莊五○齊僖  
二十六○秦寧十一○楚武三十六

春

□二月

巳亥焚咸丘

杜氏曰焚火田也咸丘魯地高平鉅  
野縣南有咸亭程子曰古者昆蟲蟄

而後火田去莽翳以逐禽獸非竭山林而焚之也  
澄曰周之二月夏之十二月昆蟲未出固可用火  
然古禮將有田事則先焚萊此不當田  
狩之月而火田又咸丘非狩地故譏

夏

穀伯綏來朝

鄧侯吾離來朝

杜氏曰穀國在南鄉筑陽縣北張氏曰今屬襄陽府穀城縣鄧今之

鄧州澄曰二國之君皆稱名者失地之君也兩書  
朝特見之朝不同日也按二國去魯絕遠蓋以失  
國寄寓他國與魯相近故因來朝魯也

□  
□

□

□  
□  
見關秋冬義四年

經書月一書日一大衍歷正月癸酉小巳丑冬至  
二月壬寅大三月壬申小經二月巳亥在此月四  
月辛丑大五月辛未小六月庚子大七月庚午小  
八月巳亥大九月巳巳小十月戊戌大十一月戊  
辰小十二月巳亥二月丁酉大長歷是年閏  
十二月巳亥二月二十八日

八年

○丁丑桓王十六年○蔡桓十一年○曹桓五十三  
○衛宣十五年○晉侯緡元年○鄭莊四十四○陳

厲三○杞武四十七○宋莊六○齊僖  
二十七○秦寧十二○楚武三十七

春

□正月

巳卯烝

公羊傳曰烝冬祭也非常事不書此何以書

識亟也程子曰冬祭非過也書之以見五月又烝為非禮趙氏曰周雖以建子為正祭祀則

用夏時本月凡四時之祭皆用孟月若有故及日不吉即用仲月正月烝則夏之仲冬也

天王使冢父來聘

杜氏曰冢氏父字澄曰此王朝大夫之四命稱氏稱字者

夏

五月

丁丑烝

建子之月已烝矣建辰之月又再烝焉於春季而行冬祭非其時非其禮也程子曰

非時復烝者必以前烝為不備也黷亂甚矣

秋

伐邾

將早師少

冬

十月

雨雪

雨去聲○程子曰建酉之月未霜而雨雪書異也

祭公來遂逆王后于紀

祭則界切○祭國公爵王朝八命之公或是隱元年



之祭伯進爵為公或是伯之子或是二人國邑同而爵異不可詳也祭公本受王命逆后于紀而私行先至于魯故先書來而以其正事為遂事齊侯之遂伐楚公子結之遂及齊侯宗公盟並同此例程子曰祭公受命逆后而至魯先行私禮以逆后為遂事不虔王命也趙氏曰遂逆者譏不躬白於王孫氏曰桓王娶后於紀命魯主之故祭公來謀逆后之期既謀之則當復命天子天子命之逆則逆之不可專也祭公不復命于王專逆后于紀故曰遂或曰士昏禮納徵之後行請期之禮歸期有定日而後親逆重昏禮也天子之尊雖與士禮不同然亦必先知女歸之期而後可往逆也魯媒紀女為王后蓋已先報可于王矣雖已報可而未知紀國歸女之日王遽遣祭公往逆祭公不知其期故過魯問期而後往紀逆后者王命也過魯問期者非王命也故春秋書法如此魯為媒而不知

報歸女之期于王魯之慢也王未知后之歸期而遽然遣使往逆王之輕也祭公無王命而私過魯問期祭公之專也參譏之公羊傳以為祭公此來方是使魯為媒若可則就往逆果如此則輕遽尤甚疑不然也澄按此經程子一義趙孫一義或說與趙孫又微有不同今兼存之

經書月五書日二大衍歷正月丁卯大已卯十三日甲午冬至二月丁酉小乙丑大寒三月丙寅大乙未雨水閏月丙申小四月乙丑大丙寅春分五月乙未小六月甲子大經五月丁丑在此月七月甲午小八月癸亥大九月癸巳小十月壬戌大十一月壬辰大十二月辛酉小長歷已卯正月十四日丁丑五日丁丑十日

九年

○戊寅桓王十七年○蔡桓十二○曹桓五十四  
○衛宣十六○晉緡二○鄭莊四十一○陳厲

四〇杞靖公元年〇宋莊七〇齊僖二  
十八〇秦出子元年〇楚武三十八

春

紀季姜歸于京師

紀季姜即祭公所逆紀國之女為桓王后者京師天子所居也

上年祭公往逆稱王后者主王朝而言之也今歸京師稱季姜者主紀而言之也魯為之媒故書

夏

四月

秋

七月

冬

曹伯使其世子射姑來朝

射音亦又音夜○曹伯欲朝魯有疾不能行乃

使其世子代已行禮按周官言世子以皮幣繼小國之君則世子固有攝君行禮之時然必王朝大朝覲大會同諸侯皆往而已獨有疾則不得已而命世子攝行今曹之朝魯非甚急之務不可缺之禮也君既有疾則不行可也而乃遣其世子攝君父以來是果不可以已乎

經書月二書日無大衍歷正月辛卯大庚子冬至二月辛酉小三月庚寅大四月庚申小五月己丑大六月己未小七月戊子大八月戊午小九月丁亥大十月丁巳小十一月丙戌大十二月丙辰小

十年

巳卯桓王十八年○蔡桓十三○曹桓五十五卒○衛宣十七○晉緡三○鄭莊四十二○陳

厲五〇杞靖二〇宗莊八〇齊僖二  
十九〇秦出子二〇楚武三十九

春

王正月

庚申曹伯終生卒

終生曹桓公也在位五十五年世子射姑嗣是為莊公

夏

五月

葬曹桓公

秋

公會衛侯于挑丘弗遇

杜氏曰挑丘衛地濟北東阿縣東南有挑城衛侯與

公為會期中背公更與齊鄭故公獨往而不相遇也

冬

十有二月

丙午齊侯衛侯鄭伯來戰于郎

常山劉氏曰春秋之中諸侯加兵于

魯者為不少矣而未嘗有書來戰者此不言侵伐而以來戰為文則彼曲我直其義坦然

經書月三書日二大衍歷正月乙酉大乙己冬至二月乙卯小經正月庚申在此月三月甲申大四

月甲寅大五月甲申小六月癸丑大七月癸未小八月壬子大九月壬午小十月辛亥大十一月辛

己酉 小巳酉 霜降 閏月 庚戌 大十二月 庚辰 小旦日 小雪 丙午 二十七 長歷 庚申 正月 六日

十有一年

庚辰 桓王十九年 ○ 蔡桓十四 ○ 曹莊公射姑元年 ○ 衛宣十八 ○ 晉緡四 ○ 鄭莊

四十三卒 ○ 陳厲六 ○ 杞靖三 ○ 宋莊九 ○ 齊僖三十 ○ 秦出子三 ○ 楚武四十 ○

春

□ 正月

齊人衛人鄭人盟于惡曹

上年十二月三國之君來戰于郎而今年之正

月三君又使從行之大夫相與結盟以固其交永嘉陳氏曰有君在則大夫降稱人胡氏曰三國既

為郎之戰又固黨而為此盟

夏

五月

癸未鄭伯寤生卒

寤生鄭莊公也在位四十二年世子忽嗣是為昭公高氏曰昭

公不終于位五世兵革不息自入春秋考莊公之心慮知其積非必有餘殃矣

秋

七月

葬鄭莊公

高氏曰鄭忽既立不待五月而葬其父

九月



宋人執鄭祭仲

祭側界切。○祭氏仲字諸侯之卿。四命命于天子者如宋國之孔父。

也。鄭莊公娶鄧曼生忽，立為世子。宋雍氏納女于鄭莊公，生突、莊公卒，雍氏欲立其出而雍氏宗有寵于宋，莊公馮宗公誘祭仲而執之，曰：「不立突，將死祭仲。」乃以突歸鄭而立之。為君陸氏曰：「執大夫例稱人。」諸國大夫王賜之畿內邑，為號令歸國者，皆書族書字，同于王。大夫鄭祭仲魯單伯陳女叔也。是也。

突歸于鄭

突不徐國庶孽，篡立者也。自宋而歸于鄭，歸易辭也。自外入內以篡奪世嫡事。

之難也。而今則易者，祭仲挈之以歸而立之，故易也。

鄭忽出奔衛

忽係之鄭正也。鄭忽以世子嗣位，既葬其父，君鄭歷五月矣，出奔而不稱子。

位未定也百官總已以聽命于祭仲祭仲既立突而不君忽則忽無其位矣

柔會宋公陳侯蔡叔盟于折

折之設切又音舌○柔魯再命之大夫蔡

叔蔡侯之弟攝君者凡諸侯之弟攝君則稱字大夫會諸侯自此始張氏曰自去年魯與齊衛鄭為警至今年桓公欲合黨以敵之於是結宗與陳蔡要言軟血初無忠信誠懇相與之心又以大夫盟宋公陳侯故不足恃以久而桓公又與宋公屢會求以補前之失堅突之合也

公會宋公于夫鍾

夫音扶鍾公作童杜氏曰夫鍾邾地

冬

十有二月

公會宋公子闕

闕口暫切○杜氏曰闕魯地在東平須昌縣東南

經書月五書日一大衍歷正月巳酉大庚戌冬至二月巳卯小三月戊申大四月戊寅小五月丁未大六月丁丑小經五月癸未在此月七月丙午大八月丙子大九月丙午小十月乙亥大十一月乙巳小十二月甲戌大長歷是年閏正月

十有二年

辛巳桓王二十年○蔡桓十五年○曹莊二年○衛宣十九卒○晉緡五○鄭厲公突元年○陳厲七卒○杞靖四○宋莊十○齊

僖三十一○秦出子四○楚武十一○

春

□正月

夏

六月

壬寅公會紀莒子盟于曲池

紀左作祀曲池公  
作馘蛇○紀為齊

難危急甚矣魯桓切切為紀謀故屢會齊而大國  
無與同心者此會也僅能與小弱之莒偕其不能  
為助而無救于紀之亡也蓋可知矣杜氏  
曰曲池魯地魯國汶陽縣北有曲水亭

秋

七月

丁亥公會宋公燕人盟于穀丘

杜氏曰燕人南燕  
大夫穀丘宋地張

氏曰南燕姑姓國漢屬東郡今滑州昨城縣殺丘  
在今應天府穀熟縣澄曰南燕大夫一命固當稱  
人或是再命稱名之大夫以魯侯宗公二君在故  
降而稱人也左氏以此盟為魯欲平宗鄭杜氏云  
宗多責賂于鄭鄭人不堪蓋宗納鄭突多責其賂  
于鄭鄭不能償魯桓鄭莊前此本有戰郎之怨鄭  
莊既卒而突得國突見魯宗數數盟會將謂其相  
得也故釋前怨而通好于魯欲藉魯以殺宋之賂  
魯桓鄭厲皆篡賊也以氣類合故欲為鄭祈懇於  
宋以殺其賂然此盟必是魯宗燕三國別有他事  
相要約非為鄭賂之事盟也因是盟與宋公相見  
而為鄭致請焉爾宋未嘗許納故以後魯桓又與  
宋會至再  
至三也

八月

壬辰陳侯躍卒

躍陳厲公也在位七年子完不嗣其弟林立是為莊公不書葬魯不

會也

公會宋公子虛

虛去于切公作郊○杜氏曰虛宋地高氏曰宋蓋疎公而公強從之

不已祇自辱也

冬

十有一月

公會宋公子龜

左傳曰宋成未可知也故既會於虛又會于龜張氏曰虛龜皆宋地

蓋桓公欲成宋之急而屈已連往宋地與之為會故春秋詳書以譏之高氏曰公六出與宋會不憚

屈辱力為鄭請公為鄭而數出會宋宗公亦為求賂而數與公會皆非為國為民其罪均爾

丙戌公會鄭伯盟于武父

左傳曰宋公辭平故與鄭伯盟于武父遂帥師

而伐宋杜氏曰武父鄭地陳留濟陽縣東北有武父城高氏曰公自龜還遽會鄭伯而謀伐之夫宋鄭之事公何預焉而同惡相濟一至于此澄曰宋公貪得鄭賂之多而不許魯桓之請鄭厲遂忘宋立已之恩與魯結黨將為同伐之舉魯桓亦棄屢會屢盟之好乃與舊怨之鄭結盟而與舊好之宋為仇交道之翻覆不常在匹夫猶不可況國君乎呂氏曰是年書盟會之數如此見諸侯無王放恣之極也襄陵許氏曰王迹既熄伯統未興諸侯自擅無所稟命觀隱十年見兵革之亂也桓十一年十二年見盟會之亂也伯統興則諸侯有所一無復此亂矣是以君子不得已而與桓文

丙戌衛侯晉卒

穀梁傳曰再稱日決日義也范氏曰明二事皆當日也孫氏曰經未

有一日而再書者書丙戌義文也澄按盟當書日卒亦當書日若史文有關則無如之何衛侯之卒與上武父之盟同日不再書丙戌則恐後人不知衛侯之以是日卒也疑非義文蓋穀梁疑是晉衛宣公也在位十九年子朔立是為惠公

十有二月

及鄭師伐宋

丁未戰于宋

將皆微者而鄭用重師戰于宋魯鄭曲而宋直與來戰于郎同義張氏曰

鄭突借宋之力以篡國宋人責賂則背之而結魯魯桓為突比與宋會及宋辭平魯不反已遽然連



鄭以伐之故書及鄭師伐宋罪魯鄭也胡氏曰宋戰者罪在彼戰于郎是也往戰者罪在內戰于宋也

經書月五書日六大衍歷正月甲辰小乙卯冬至二月癸酉大三月癸卯小四月壬申大五月壬寅小六月辛未大七月辛丑小經六月壬寅在此月八月庚午大經七月丁亥在此月壬辰二十三日九月庚子小十月己巳大經十一月兩書丙戌皆在此月十一月己亥小經十二月丁未在此月十日壬辰不在八月在七月二十三日丙戌十一月十八日丁未  
十八日丁未  
十二月十日

十有三年

壬午桓王二十一年○蔡桓十六○曹莊三○衛惠公朔元年○晉緡六○鄭厲二

○陳莊公林元年○杞靖五○宋莊十一○  
齊僖三十二○秦出子五○楚武四十二○

春

□二月

公會紀侯鄭伯

公先與紀鄭會而後與齊宋衛燕戰者蓋齊連三國之兵將以滅紀

紀知之而求援于魯魯侯乃偕鄭伯先至紀相會以待齊兵之至及四國兵至而遂與之戰也

己巳及齊侯宋公衛侯燕人戰齊師宋師衛師燕

師敗績

穀梁傳曰戰稱人敗稱師重衆也其不地于紀也趙氏曰內兵以紀為主外兵以齊

為主蓋齊以三國之師伐紀欲滅之公與鄭救之而勝也澄曰昔鄭莊助齊謀紀者也魯桓數數為

鄭會宋繼又同鄭伐宋鄭厲德魯故助魯救紀而反其父之所為沙隨程氏曰齊有滅紀之志合四國之兵以臨之今一戰而勝故終公之世而紀不亡或謂紀侯不當主于魯桓鄭厲且弱人近死何暇論援者之賢否乎衛朔以讒得國又背殤即戎不以義舉罪不容于誅矣杜氏曰衛宣公未葬惠公稱侯以接隣國襄陵許氏曰趙氏謂凡諸侯在喪而有境外之事以喪行者稱子以吉行者稱爵志惡之淺深也

三月

葬衛宣公

張氏曰方與衛戰往會其葬怨不廢義也登按二月巳巳之戰齊紀為敵怨衛

助齊滅紀魯為紀禦齊魯衛非敵怨也故不廢會葬之禮

夏

大水

秋

七月

冬

十月

經書月四書日一大衍歷正月戊戌大辛酉冬至  
二月戊辰小經巳己二日三月丁酉大四月丁卯  
小五月丙申大六月丙寅小七月乙未大癸亥夏  
至閏月乙丑小八月甲午大甲午大暑九月甲子

小十月癸巳大十一月癸亥小十二月  
壬辰大長歷是年閏正月二月無巳己

十有四年

癸未桓王二十二年○蔡桓十七○曹莊  
四○衛惠二○晉緡七○鄭厲三○陳莊

二○杞靖六○宋莊十二○齊僖三  
十三卒○秦出子六○楚武四十三

春

□正月

公會鄭伯于曹

前年魯鄭同救紀而敗齊衛之師  
蓋虞齊衛之報怨也故為會以謀

之曹素與魯協故魯會鄭于其地杜氏曰為曹與  
會按左傳但言曹人致餼其與會不與會不可知  
也

無冰何氏曰周之正月夏之十一月法當堅冰無冰者温也

夏

五孫氏曰夏五無月者後人傳之脫漏爾豈其舊史日月之有闕文而孔子不刊正之哉

鄭伯使其弟語來盟語穀作禦○左傳曰脩曹之會澄曰是年正月魯鄭二君

會于曹而未盟故鄭伯使弟語來魯與公盟也使弟語與齊侯使弟年義同趙氏曰來盟彼欲之也

不書其誰敵者也蘇氏曰凡外大夫來盟于魯內大夫來盟于他國皆盟其君也程子曰使來盟盟

前定矣與高子不同胡氏曰來盟稱使則前定之盟也其不稱使如楚屈完齊高子則權在二子盟

不盟特未定也

秋

八月

壬申御廩災

君之在車與御者最相親近故君所親近之人謂之御御史御妻之類是

也君所親用之物亦謂之御後世所謂御食御書御藥之類及此御廩是也御廩者以貯人君躬耕藉田之米專供宗廟之粢盛而不取他用者災天火也

乙亥嘗

穀梁傳曰未易災之餘而嘗不敬也孫氏曰嘗秋祭也周八月夏六月也不時而嘗

與以災之餘而嘗不恭甚矣澄曰不俟秋而先嘗御廩災纔四日遽以災餘之米供粢盛匆遽苟簡以畢事而已

冬

十有二月

齊侯祿父卒

祿父僖公也在位三十三年世子諸兒嗣是為襄公

宋人以齊人蔡人衛人陳人伐鄭

公蔡人在衛人下○左傳曰宋

人以諸侯伐鄭報宋之戰也焚渠門及大逵伐東郊取牛首以大宮之椽歸為虛門之椽張氏曰鄭突賴宋之力得入篡國歸而背其賂宋人因此與為仇讐魯桓平之宋人不從鄭遂與魯伐宋為丁未之戰宋以鄭突入用其寵而背之且見伐積其忿怒乞師于齊秦陳衛蓋師雖四國之賦而惟宋人之為聽比于平日諸侯各帥其師以伐人者不同故書之趙氏曰凡不用我師而用彼師曰以言



用齊蔡等兵而不自交鋒也經書以者惟此與僖  
二十六年公以楚師伐齊取穀定四年蔡侯以吳  
子及楚人戰于柏舉三處而已柏舉之戰左氏所  
叙事並吳楚自戰蔡不交鋒下文吳入楚亦不言  
蔡師胡氏曰宋怨鄭突之背已故以四國伐鄭魯  
怨齊人之侵已故以楚師伐齊蔡怨囊瓦之拘已  
故以吳子伐楚蔡弱於吳魯弱于楚宋與蔡  
衛陳敵而弱於齊乃用其師故特書曰以

經書月四書日二大衍歷正月壬戌小丙寅冬至  
二月辛卯大三月辛酉小四月庚寅大五月庚申  
小六月己丑大七月己未小八月戊子大九月戊  
午小經八月壬申乙亥在此月十月丁亥大十一  
月丁巳小十二月丙戌大經丁巳在十一月朔及  
明年正月二日長歷壬申八月十五日乙亥十八  
日丁巳二十  
二月二日

十有五年

甲申桓王二十三年崩○蔡桓十八○曹莊五○衛惠三○晉緡八○鄭厲四○陳

莊三○杞靖七○宋莊十三○齊莊公諸  
兒元年○秦武公元年○楚武四十四

春

□二月

天王使冢父來求車

左氏曰諸侯不貢車服天子不私求財澄曰冢父字王

朝四命之大夫古者諸侯有功天子賜之乘車諸侯九貢有常制無有以車供王室之用者車重器也天子可以之錫下諸侯不可以之貢上也使當貢之物諸侯不供而天子之用猶不當遣使以私求况諸侯不當貢之物而可求乎哉

三月

乙未天王崩

桓王也在位二十三年世子佗嗣是為莊王莊公三年始書葬

夏

四月

己巳葬齊僖公

五月

鄭伯突出奔蔡

左傳曰祭仲專鄭伯患之使其婿雍糾殺之將享諸郊雍姬知之以

告祭仲殺雍糾尸諸周氏之汪厲公出奔蔡程子曰避祭仲而出非國人也登按凡諸侯不生

名失地則名啖氏曰君奔例名者言其失地非復諸侯也張氏曰國君失位書爵而不名者其位為未絕突以庶孽奪嫡初與權臣比而篡位又謀殺之為盜賊之計以自取亡書名絕之也高氏曰前年蔡從宋伐鄭突曷為出奔蔡曰宋人以蔡伐鄭而蔡聽命焉蔡之於突實無憾

鄭世子忽復歸于鄭

復歸者言復其位而歸也張氏曰世子忽自十一年五月

莊公卒而得位至九月奔衛五年于外乃得復歸不從衛侯朔術之例稱爵乃稱世子者忽之所以得歸者以其嘗為世子也不稱鄭伯者以其不能君也故程子曰忽稱世子本當嗣位不能保其位故不爵陸氏曰復歸之正者莫過于鄭忽

許叔入于許

許叔許莊公之弟叔字也凡諸侯之弟貳君者例稱字鄭莊公以隱十一

年入許許莊公奔衛鄭悉有許之土地矣而使許  
叔居許東偏以奉其祭祀鄭取許地逐許君使其  
君之弟攝君以奉宗廟而不得有其國是年突出  
忽歸鄭國亂許叔度鄭之力不能與已爭故自入  
其國而君之以惡入非以善歸故書入而不書歸  
也劉氏曰稱入何難也何難焉鄭亂而後入也

公會齊侯于艾

艾公作鄙穀作蒿○左傳曰謀定

地相接欲兼并之故糾合齊魯之力而同伐既入  
之後齊魯俱讓而不受乃與鄭人今鄭既不能入  
則齊魯遂為之謀以定許叔  
之位此許之所以復存也

邾人牟人葛人來朝

來朝者國君也荒裔以號舉  
君臣皆稱人牟葛號舉故其

君稱人邾附庸國當稱名以其同于牟葛二國旅  
見故亦降從二國之例而稱人也張氏曰牟國今

登州牟平縣葛古葛伯  
國今拱州寧陵縣

秋

九月

鄭伯突入于櫟

左傳曰鄭厲公因櫟人殺檀伯而遂居櫟張氏曰櫟鄭別都也在陽

翟縣今屬潁昌府按春秋書鄭伯突入于櫟自此以後十七年高渠彌弑昭公而立公子亶十八年齊人殺子亶祭仲逆鄭子于陳而立之莊十四年鄭傅瑕殺鄭子及其二子而納厲公厲公入忽躋儀之事皆不書昭十一年申無宇對楚子虔曰鄭莊公城櫟而置子元馬使昭公不立蓋大都耦國既入于櫟則鄭國之命已制于突與入其國無異忽躋儀之為君末矣不足紀也薛氏曰櫟者鄭之

大都也入於櫟將逼鄭也鄭忽反矣突因櫟以有鄭忽浸微而不見矣春秋著大都之害閔忽之不足以有立也胡氏曰制邑之死甯君京城之叛太叔皆莊公所親戒也又城櫟而寘子元何謀國之誤衛有蒲戚而出獻公楚有陳蔡不美而叛棄疾厲公既入於櫟則其國已復矣故夫子曰古者邑無百雉之城欲墮三都以張公室明強幹弱枝以身使臂之義為來世鑒也襄陵許氏曰鄭亂如此春秋弗志志突入櫟而已語曰櫟人實使鄭子不得其位言邑國之大也忽不能制突使折鄭而居之以生民心

此亂根也

冬

十有一月

公會宋公衛侯陳侯于袤伐鄭宋公衛侯上公有齊侯字袤昌氏切

公作侈○左傳曰會于袤謀伐鄭將納厲公也弗克而還穀梁傳曰地而後伐疑辭也非其疑也胡氏曰昭公之與突是非邪正亦明矣然昭公雖正其才不足以君國復歸于鄭日以微弱厲公雖篡其智足以結四鄰之援既入于櫟日以強盛諸侯不顧是非而計其強弱始疑于輔正終變而與邪穀梁傳所謂非其疑者非其疑于為義而果于為不義相與連兵動衆納篡國之公子也故書其會地而後言伐以譏也張氏曰魯桓宋莊衛朔皆以不正得國其為突謀乃水流濕火就燥獨陳侯疑之爾然寡不勝衆所以疑而遂合也

經書月六書日二大衍歷正月丙辰大辛未冬至二月丙戌小三月乙卯大四月乙酉小經三月乙



未在此月五月甲寅大經四月己在此月六月  
甲申小七月癸丑大八月癸未大九月癸丑小十  
月壬午大十一月壬子小十二月癸巳大  
長曆乙未三月十一日己巳四月十五日

十有六年

乙酉莊王元年○蔡桓十九○曹莊六○  
衛惠四○晉緡九○鄭厲五○昭公忽元

年○陳莊四○杞靖八○宋莊十四  
○齊襄二○秦武二○楚武四十五

春

□正月

公會宋公蔡侯衛侯于曹

左傳曰謀伐鄭也孫氏  
曰未能納突故復會于

此張氏曰於此又  
邀蔡黨益張矣

夏

四月

公會宋公衛侯陳侯蔡侯伐鄭

杜氏曰蔡當在衛上今序陳下蓋後

至呂氏曰會曹蔡先衛伐鄭衛先蔡蓋當時諸侯皆以一切強弱目前利害為先後不復用周班也胡氏曰王制諸侯之爵先後有序周官大司馬設儀辨位以等邦國不可亂也春秋時伯者以意之向背為升降諸侯以勢之強弱相上下蔡當先衛今序陳下者先儒以為後至也以至之先後易其序是以利率人而不要諸禮也程子曰突善結諸侯故皆為之致力屢伐鄭也張氏曰自鄭突入國之後即比魯而仇宋及其出奔乃能使魯與宋自冬及夏悉力伐鄭所謂善結也衛朔與母構兄姦

惡之雄因同惡之合陵蔡而居其上當時王政不行伯者未作小人恃強衆陵寡弱如此及桓文之興而後少抑馬王氏曰突之未出也宋嘗伐之既出也又求納之始宋不和而公以鄭伐宋及突既出而公與宋伐鄭向也相戾之深今也相用之固豈無自而然哉蓋以正繼正禮之常諸侯無所求以亂易亂國之釁諸侯有所責故利其亂幸其危貪其賄黨其邪自突入櫟公與宋公三會諸侯而再伐鄭無他馬賄故也

秋

七月

公至自伐鄭

公至亦常事書者皆譏也程子曰見其勤勞于鄭突也孫氏曰助篡奪正

踰時而返

冬

城向

向失亮切○沙隨程氏曰下書十一月而先書冬者非十月能畢工也鄭氏曰下有十一

月則此乃十月也縱是同月亦今之九月農功未畢不可興役胡氏曰八月則妨田事九月則奪農收唯十月則依于詩禮合于傳例十二月而城者時也十月十一月不時也

十有一月

衛侯朔出奔齊

左傳曰初衛宣公烝於夷姜生急子屬諸右公子為之娶于齊而美

公取之生壽及朔屬壽于左公子夷姜縊宣姜與公子朔構急子公使諸齊使盜待諸萃將殺之壽

子告之使行不可曰棄父之命惡用子矣有無父之國則可也及行飲以酒壽子載其旌以先盜殺之急子至曰我之求也彼何罪又殺之二公子怨惠公立公子黔牟惠公奔齊公羊傳曰衛侯朔得罪于天子也張氏曰朔立已五年二公子逐之必因其陵蔑天子而後得以行其志公羊氏之說必有所本傳所以莊六年王人子突救衛

經書月四書日無大衍歷正月辛亥小丙子冬至二月庚辰大三月庚戌小四月己卯大丙申春分閏月己酉小五月戊寅大旦日穀雨六月戊申小七月丁丑大八月丁未小九月丙子大十月丙午大十一月乙巳小十二月乙巳大

十有七年

丙戌莊王二年○蔡桓二十卒○曹莊七年○衛惠五黔牟元年○晉緡十○鄭厲六

昭二○陳莊五○杞靖九○宋莊十五  
○齊襄三○秦武三○楚武四十六

春

□正月桓公十八年唯元年二年十年十八年歲之首月書王九年歲首書時不書月其餘

春之首月不書王者十三

公會齊侯紀侯盟于黃

左傳曰平齊紀且謀衛故也任氏曰公十三年會紀

侯敗齊師以益其怨今乃盟之豈足以釋前憾乎張氏曰又欲納朔一動而二失也杜氏曰黃齊地

二月

丙午公及邾儀父盟于趯

及左作會趯翠執切薛左傳曰尋蔑之盟也薛

氏曰初與邾平也杜氏曰趙魯地澄按隱公元年及邾盟蔑七年而隱公渝盟伐邾桓公八年又伐邾魯邾之不通好者十有餘年矣至桓公十五年邾同牟葛朝魯既朝之後二國欲尋蔑盟而平其再伐之怨故邾來魯地受盟而公及之盟也高氏曰趙我地彼來而我及之也與蔑之盟同邾來朝魯畏疆也至是來為此盟豈非諸侯有謀邾者欲求魯之援耶

夏

公闕  
夏字

五月

丙午及齊師戰于奚

奚公作郎○左傳曰齊人侵魯疆疆吏來告公曰疆場之

事慎守其一而備其不虞事至而戰又何謁焉杜氏曰奚魯地澄曰此齊師來侵魯境而魯與之戰也

盟黃未幾而齊來侵境  
平紀之信豈可恃乎

六月

丁丑蔡侯封人卒

封人桓侯也在位二十年  
其弟獻舞立是為哀公

秋

八月

蔡季自陳歸于蔡

左傳曰蔡人召蔡季于陳杜氏曰桓侯無子故召季而立之高

氏曰季蔡侯之弟即獻舞也蔡桓侯無子未知誰  
之立也季於是避於陳今蔡侯卒國無正嗣兄終  
弟及於禮為順于是獻舞自陳歸于蔡見其順而  
易也澄曰季字也諸侯之弟貳君者例稱字何氏



曰公羊傳註以蔡季與獻舞為二人非也

癸巳葬蔡桓侯

杜氏曰稱侯蓋謬誤澄按諸儒之說皆以侯伯子男葬而稱公者為

私諡之僭今檢尋古書所載未見有子男之國君以諡配其爵而曰某子某男者劉卷天子之大夫其爵曰子而其葬亦稱劉文公彼王朝所諡豈私諡乎齊魯皆侯爵而太公之子諡丁公伯禽之子諡考公此周室盛時非東遷以後豈亦僭諡乎二公去始封之君纔一世太公伯禽之遺教猶在豈遽僭諡乎蓋公侯伯子男者五等之爵有尊卑也而公之爵為最尊故在其國雖侯伯子男亦稱曰公舉爵之尊者以稱其君臣子辭也及其死也諡之雖侯伯子男亦曰公者猶生時之稱公也聖人制禮緣人情故順忠臣孝子之情使之生死皆得稱公以尊其君也杜氏以侯字為謬誤者得之其

以蔡季為賢獨能請謚而不私謚者其說有所不通矣况季歸至葬未踰月也而遽能請謚于天子手

及宋人衛人伐邾

左傳曰宋志也杜氏曰邾宋爭疆魯從宋志背趙之盟襄陵許

氏曰正月與齊為黃之盟而五月戰焉二月與邾為趙之盟而八月伐之張氏曰桓公春與齊邾盟既而皆背之戰奚伐邾並見于一年之中反顧前日刑牲詔神棄如敵屣瀆信而不仁甚矣

冬

十月

朔日有食之

左傳曰不書日官失之也

經書月六書日五大衍歷正月乙亥小壬午冬至  
二月甲辰大丙午三日經正月丙辰在此月三月  
甲戌小四月癸卯大五月癸酉小六月壬寅大經  
五月丙午在此月七月壬申小經六月丁丑在此  
月八月辛丑大九月辛未小經八月癸巳在此月  
十月庚子大十一月庚午小朔日食經書十月朔  
食十二月巳亥大長歷丙辰正月十三日丙午二  
月四日又丙午五月五日丁丑六月六日癸巳八  
月十日  
三日

十有八年

丁亥莊王三年○蔡哀侯獻舞元年○曹  
莊八○衛惠六年二○晉緡十一○鄭

厲七子廛元年○陳莊六○杞靖十○宋  
莊十六○齊襄四○秦武四○楚武四十七

春

王正月

公會齊侯于濼

濼盧篤切又音洛○左傳曰公將有行遂與姜氏如齊申繻曰女有

家男有室無相濟也謂之有禮易此必敗杜氏曰濼水在濟南歷城縣西北入濟張氏曰濼之會不

言夫人者夫人不與行會禮也

公與夫人姜氏遂如齊

曰公下公無與字○穀梁傳

陸氏曰婦人從夫者也何夫人之仇公失為夫之道也張氏曰如齊不言及而言與者劉氏以為猶

匹夫匹婦之相與云爾夫不夫婦不婦進退制於夫人也澄曰此行公往會齊侯爾夫人欲同往公

不能制既于會見齊侯矣會禮畢而夫人又欲從齊侯至齊夫婦既同出公不可獨返國故遂與之

同如  
齊也

夏

四月

丙子公薨于齊

左傳曰文姜如齊齊侯通焉公謫之以告享公使公子彭生乘公

薨于車公羊傳曰夫人譖公齊侯怒與飲酒於其出使公子彭生送之於其乘焉拉幹而殺之張氏曰春秋書魯君見殺之例有二在內則不書地以存其實在外則不容不書其地而以上下文之特異者見之此先書與夫人姜氏如齊而明年書夫人孫于齊則桓公之不得其死昭然矣

丁酉公之喪至自齊

左氏曰其至痛之也

秋

七月

冬

十有二月

己丑葬我君桓公

左傳曰魯人告于齊曰寡君畏君之威不敢寧居來修舊好禮

成而不返無所歸咎惡於諸侯請以彭生除之齊人殺彭生澄按君弑賊不討不書葬而此書葬者蓋魯之臣子不敢讐齊襄而但指彭生為賊齊既為魯殺彭生則魯人以為賊已討矣安然而葬與正終者無異見魯之臣子忘君之讐而無復有與齊不共戴天之痛也張氏曰葬稱我君而後舉謚

趙氏以為臣子之敬辭  
不然則恐涉他國之君

經書月四書日三大衍歷正月己巳小丁亥冬至  
二月戊戌大三月戊辰小四月丁酉大五月丁卯  
小經四月丙子在此月丁酉疑差六月丙申大七  
月丙寅小八月乙未大九月乙丑小十月甲午大  
十一月甲子小十二月癸巳大經己丑在十一月  
二十六日長歷丙子四月十日丁酉當為五月朔  
己丑十二月二十六日



春秋纂言卷二



欽定四庫全書

經部  
春秋纂言卷三  
四

詳校官鴻臚寺少卿臣葉景陽

給事中臣溫常綬覆勘

總校官進士臣繆 琪

校對官中書臣王 瓚

謄錄監生臣黃奕題

欽定四庫全書

春秋纂言卷三

元 吳澄 撰

莊公

名同桓公之子母文姜夫人哀姜在位三十二年

元年

戊子莊王四年○蔡哀二年○曹莊九年○衛惠七年○魯哀三年○晉緡十二年○鄭厲八年○子儀元年○陳莊七年○杞靖十一年○宋莊十七年○齊襄五年○秦武三年○楚武四十八

春

王正月

穀梁傳曰繼弑君不即位先君不以其道終則子不忍即位也澄曰以先君之不得

正終故不忍行即位之禮

三月

夫人孫于齊

孫去聲。公羊傳曰：不稱姜氏，與弑公也。或曰：蒙前年夫人姜氏，遂如齊。

之文依前目。後凡之例，故不稱姜氏。以見今日孫于齊之夫人，即前年遂如齊之夫人也。或曰：文闕也。杜氏曰：夫人莊公母也。魯人責之，故出奔。內諱奔，謂之孫。猶孫讓而去。澄曰：夫人在齊，蓋隨桓公之喪歸魯矣。魯人以桓公之弑實由夫人，衆怒羣誚，夫人內慙不安，故出奔齊，因以遂其姦也。

夏

單伯逆王姬

單音善。後並同。逆，左作送。○公羊傳曰：天子嫁女於諸侯，必使諸侯同姓。

者，主之諸侯嫁女於大夫，必使大夫同姓。若王之澄曰：王將嫁女於齊，以尊卑不敵，不自主昏而命。

秋

魯王之故魯遣單伯往逆王姬於周俾先至於魯而後往歸於齊也單氏伯字魯四命之卿天子所命者張氏曰常事不書而此特書之斬衰而主昏固已非禮况齊乃不可同天之讎奈何為之主昏

築王姬之館于外

穀梁傳曰衰麻非所以接弁冕也仇讎非所以接昏姻也高郵

孫氏曰桓公見殺於齊仇讎未復天王遽使魯主王姬之昏莊公當辭期於得請而後已非無同姓之諸侯蓋莊公未知辭爾辭之不固與不辭同知主昏之非政築王姬之館於外孰與辭之不築也澄曰魯為王姬主昏非自今日始王姬所館固有嘗處矣蓋館於廟也時公在諒闈慮齊侯親迎若就以嘉服接見於廟則於心有所不安然又不敢辭主昏之事故特築館于外以為王姬之舍

而侯齊侯之逆因其變常而書之以譏也

冬

十月

乙亥陳侯林卒

林莊公也在位八年其弟杵臼立是為宣公按莊公與桓王同時王

名林公亦名林君臣同名也

□王使榮叔來錫桓公命

曰不書天者脫榮叔夫榮氏叔字澄曰稱

氏稱字者天子四命之大夫錫賜也蘇氏曰錫命者命之以策也衛襄公之歿王使成簡公追命之高氏曰禮諸侯嗣位三年喪畢以士服朝天子天子錫之黼冕圭璧然後歸以臨其民謂之受命桓

篡弑未嘗入朝受命王命魯主昏故追錫桓公以寵之張氏曰莊公主王姬之昏故王寵嘉其父桓公已終而遣使賜之策命若昭七年王使成簡公追命衛侯之比也桓弑隱在王法有賊殺其親之罪乃司馬九伐之所宜加王不能討又示褒嘉啖氏以為寵篡弑以漬三綱得春秋之旨矣

王姬歸于齊

張氏曰王姬來而不書至別於魯之夫人也澄曰書歸于齊魯既主昏則

同乎內女也趙氏曰凡外女歸皆以非常乃書

齊師遷紀邢鄆郟

邢音平鄆音茲郟音吾○杜氏曰邢在東莞臨朐縣東南北海

都昌縣西有蕃城郟在朱虛縣東南齊欲滅紀故徙其郡邑之民而取其地常山劉氏曰遷者迫逐之也沙隨陳氏曰土地人民盡有之曰取逐其人有其地曰遷張氏曰迫遷三邑之民不服者取其

地實以齊之民胡氏曰遷不言師其以師遷之者見紀民猶足與守而齊人彊暴用大眾以迫之也經書月三書日一大衍歷正月癸亥大壬辰冬至閏月癸巳小二月壬戌大旦日大寒三月壬辰小四月辛酉大五月辛卯小六月庚申大七月庚寅大八月庚申小九月己丑大十月己未小乙亥十七日十一月戊子大十二月戊午小長歷是年閏十月

二年

已丑莊王五年○蔡哀三○曹莊十○衛惠八  
黔牟四○晉緡十三○鄭厲九子儀二○陳宣  
公杵臼元年○杞靖十二○宋莊十八卒  
○齊襄六○秦武六○楚武四十九年

春

王二月

葬陳莊公

夏

公子慶父帥師伐於餘丘

公子慶父名魯三命之卿於發語辭餘丘小

國之近戎者其曰於餘丘猶曰於越蓋夷俗所稱杜氏曰莊公時年十五則慶父莊公庶兄於餘丘國名沙隨程氏曰書伐國也二傳以為邾邑蓋邾附庸啖氏曰按前後未有邑言伐者故仍依左氏舊說為國

秋

七月



齊王姬卒

公羊傳曰外夫人不卒此何以卒我主之也穀梁傳曰為之主者卒之也范氏

曰主其嫁則有兄弟之恩死則服之故書卒禮記白齊告王姬之喪魯莊公為之大功薛氏曰禮弓謂由魯嫁故為之服則主昏之為服自莊公始也其以說齊乎沙隨程氏曰禮於舅之妻無服外祖父母纔小功爾今以世讎而厚其喪非禮也不然外夫人卒不書

冬

十有二月

夫人姜氏會齊侯于禚

禚音灼公作郚○左傳曰禚也杜氏曰姜前與公如齊

後出奔至此始會會非夫人之事比年書會其義皆同禚齊地澄曰元年正月夫人既奔齊矣其後

復歸魯而今年冬又自魯往會也趙氏曰著姜氏齊侯之惡亦以病公也曰子可以制母乎夫死從子通乎其下况國君乎君者人神之主風化之本也不能正家如正國何若莊公哀痛以思父誠敬以事母威刑以督下車馬僕御莫不從命夫人徒往乎夫人之往也則公威命之不行哀敬之不至爾

乙酉宋公馮卒

馮莊公也在位十八年子捷嗣是為閔公高氏曰考觀宋莊伎求敗

類則穆公之不知其國與子有以知之矣

經書月三書日一大衍歷正月丁亥大丁酉冬至二月丁巳小三月丙戌大四月丙辰小五月乙酉大六月乙卯小七月甲申大八月甲寅小九月癸未大十月癸丑大十一月癸未小十二月壬子大

月內無乙酉長歷  
乙酉十二月四日

三年

庚寅莊王六年○蔡哀四○曹莊十一  
衛惠九  
黔牟五○晉緡十四○鄭厲十子儀三○陳宣

二○杞靖十三○宋閔公捷元年  
齊襄七○秦武七○楚武五十

春

王正月

溺會齊師伐衛

溺魯大夫再命者孫氏曰朔在齊  
故溺會齊伐衛謀納朔也高氏曰

衛朔奔齊齊欲納之然天王已絕朔而立公子黔  
牟為衛侯魯輒興兵會仇讎之人抗天子之命納

不義之君  
其罪大矣

夏

四月

葬宋莊公

五月

葬桓王

左傳曰緩也公羊傳穀梁傳曰改葬杜氏曰以桓十五年三月崩七年乃葬高氏曰

平王之崩求賻於諸侯然後克葬至於桓崩七年乃克葬者蓋承諸侯背叛王師傷敗之後力益不足矣夫以天下而葬一人安可緩也聖人書之以著天下臣子之罪若曰改葬則聖人明書之矣薛氏曰王升遐七年然後克葬閔王室也沙隨程氏曰周人東遷之初尚有志於歸葬已而侵削益甚

故於此  
始葬

秋

紀季以鄆入于齊

鄆戶圭切。穀梁傳曰：鄆，紀之邑也。入于齊者，以鄆事齊也。公

羊傳曰：請後五廟以存。姑姊妹左傳曰：紀於是乎始。判杜氏曰：鄆在齊國東安平縣。澄曰：紀侯無子，其弟為君之貳，而別居於鄆。前年齊取紀三邑，紀之土地無幾矣。季知紀之亡在旦夕，故先以其所居邑入于齊，為附庸之國，而存先祀也。陸氏曰：紀季以君之邑入於它國，不書曰叛，其有兄之命矣。沙隨程氏曰：紀侯迫於彊齊之暴，自度不能支，命其弟以鄆下齊，將委國而去之，不勦民以鬪，暴避賢弟以存祀，其與力屈而請降國滅而出奔者有間矣。

冬

公次于滑

滑公穀作郎。左傳曰：一宿為舍，再宿為信，過信為次。次于滑，將會鄭謀。紀也。

鄭辭以難殺。梁傳曰：次止也。有畏也。欲救紀而不能也。胡氏曰：伐而書次，以次為善救而書次，以次為譏。次於滑，譏也。澄曰：紀將亡矣，以昏姻之故，告急於魯。魯莊不能自已，故出次於滑。將會鄭伯為紀謀而祈哀乞憐於齊。鄭伯知齊之滅紀不可止也，故辭而不會。杜氏曰：滑，鄭地在陳留襄邑縣西北。

經書月三書日無大衍歷正月壬午小癸卯冬至二月辛亥大三月辛巳小四月庚戌大五月庚辰小六月巳酉大七月己卯小八月戊申大九月戊寅小丙午處暑閏月丁未大十月丁丑小旦日秋

分十一月丙午大  
十二月丙子小

四年

辛卯莊王七年○蔡哀五○曹莊十二○衛惠  
十黜牟六○晉緡十五○鄭厲十一子儀四○

陳宣三○杞靖十四○宋閔二○  
齊襄八○秦武八○楚武五十一

春

王二月

夫人姜氏饗齊侯于祝丘

饗左作享○穀梁傳曰饗甚矣澄曰何待至於

饗而後為甚哉古者飲酒之禮有三饗食燕也燕禮最輕蓋主于飲酒而食物不盛食禮次之食物甚盛而不飲酒饗禮最重飲酒如燕禮之多食物如食禮之備雖君大夫亦無行饗食燕之禮于野

者况婦人乎然此亦不足責也呂氏曰前此嘗會矣而未之享也今享矣又復如齊師矣人之為不善一縱之後如水方至莫知所極杜氏曰祝丘魯地

三月

紀伯姬卒

穀梁傳曰外夫人不卒此其言卒何也吾女也適諸侯則尊同以吾為之變卒

之也范氏曰禮諸侯絕旁蕃姑姊妹女子嫁於國君者尊與己同則變不服之例為之服大功九月啖氏曰內女為諸侯之夫人則書卒以公為之服故也孫氏曰伯姬隱二年紀裂繻所迎者內女嫁國君則服大功常事也此卒者蓋為下紀侯去國齊葬紀伯姬起義

夏



齊侯陳侯鄭伯遇于垂

襄陵許氏曰齊與陳鄭遇垂蓋謀取紀是以紀侯見

難而去也蘇氏曰鄭伯鄭子儀也桓十五年五月書鄭伯突出奔蔡九月書鄭伯突入于櫟十八年齊襄公殺子疊鄭人立子儀莊十四年突使傅瑕弑子儀而入則過于垂者子儀也然則鄭有二君矣春秋有一國而二君者鄭突與儀衛衍與剽是也突衍始終為君子儀之君鄭十有四年剽之君衛十有一年皆能君者也故春秋因其實而君之然則孰與曰皆不與也突之入也以篡衍之出也以惡儀剽雖國人之所立而突衍在焉非所以為安也故四人者春秋莫適與也皆不沒其實而已胡氏曰蘇子由以鄭伯為子儀謂春秋有一國二君其說辨其理通善發春秋之意者然而鄭伯實厲公終始能君故不沒其實非與之也惟不沒其實故出奔蔡入于櫟會于垂皆書其爵惟非與之

也故歸于鄭出奔蔡入于櫟皆書其名春秋於世子忽猶不書爵而况子儀之微者乎高氏曰或以此鄭伯為子儀非也忽世子再出奔猶不得稱子其復歸猶不得稱爵子儀雖乘間得立其為君微矣豈敢輕去國都而與諸侯會乎故知此鄭伯即突也齊恐陳鄭救紀故求結二國歡心先過於垂使紀失其援也

### 紀侯大去其國

左傳曰紀侯不能下齊以與紀季去其國連齊難也程子曰大名也

常山劉氏曰紀侯名大生名之著失地也去其國自去也澄曰諸侯失地名紀侯去其國而紀遂亡故名之紀之邢邵邵為齊所取紀季又以鄆入于齊紀之土地蓋僅有國外近郊之境而亦無人民可以自守齊又將以兵力取之故自去其國而齊遂有其地也言去其國而不言出奔某國者蓋自

逃於民伍而不復適他國  
或入山林或入河海也

乙丑齊侯葬紀伯姬

伯姬卒值紀侯去國不能自  
葬齊侯既取紀地遂葬其喪

書以閔之也啖氏曰凡內女之葬不書書者皆非  
常也胡氏曰齊襄迫逐紀侯使之去國雖其夫  
人在殯而不及葬陸氏曰葬者臣子之事非由隣國  
也齊侯并人之國而禮葬其妻是謂豺狼之行而  
為婦人之仁也

秋

七月

冬

公及齊人狩于禚

禚地且譏况越境而與鄰國之微

臣狩于彼國之地乎此四年冬公及齊人所狩之地即二年冬姜氏與齊侯所會之地也莊公於是

乎無羞惡之心矣

經書月四書日一大衍歷正月乙巳大戊申冬至二月乙亥大三月乙巳小四月甲戌大五月甲辰小六月癸酉大七月癸卯小經六月乙丑在此月八月壬申大九月壬寅小十月辛未大十一月辛丑小十二月庚午大長歷是年閏四月乙丑六月三日

五年

壬辰莊王八年○蔡哀六○曹莊十三○衛惠十一年

○陳宣四○杞靖十五○宋閔三○齊襄九○秦武九○楚文王熊黃元年

春

王正月

夏

夫人姜氏如齊師

時齊侯帥師出外而夫人往與之會也不言地師行而不次也

秋

邠黎來朝

邠公作倪。杜氏曰邠附庸國也。東海昌慮縣東北有邠城。黎來名澄曰

附庸之君未爵例稱名。其後齊桓圖霸以王命爵之為子。改國號為邠。經書曰小邠以別於邠也。

冬

公會齊人宋人陳人蔡人伐衛  
左傳曰齊宋陳蔡皆

卿也以公在故降稱人三年春齊師會魯伐衛以納朔而未克納故今又會四國之兵以納之也

經書月一書日無大衍歷正月庚子小癸丑冬至二月己巳大三月己亥小四月戊辰大五月戊戌

小六月丁卯大七月丁酉小八月丙寅大九月丙申小十月乙丑大十一月乙未小十二月甲子大

六年  
癸巳莊王九年○蔡哀七○曹莊十四○衛惠十二○黔牟八○晉緡十七○鄭厲十三子儀六

○陳宣五○杞靖十六○宋閔四○齊襄十○秦武十○楚文二

春

王正月

王人子突救衛

王人王朝一命之下士子王之子突名也一命者稱人而不得稱名

以王子之貴同於三命故稱屬稱未嘗去王今王子突子上無王字者蒙上文王子者文也蓋以官則卑而為王之人以屬則貴而為王之子故稱人而又稱名也五國伐衛納朔王命突救之欲存黔牟而拒朔也

夏

六月

衛侯朔入于衛

左傳曰衛侯入放公子黔牟于周放甯跪于秦殺左公子洩右公子

職澄曰五國之兵破衛而朔得入也朔構兄篡國天討所當加又得罪於王王當明正其罪布告諸

侯乃不能然遂使齊與四國敢抗王命而納之王  
人之救不能明示天子之命自同於列國之兵爭  
以力為強弱卒不能救而五國竟破衛納朔  
王室之不競而威令不行於諸侯可悲也夫

### 秋

公至自伐衛莊之出十有九其至之者五譏也其不至者十有四常事不書張氏曰書

至與至自唐意同王誅若行齊魯宋衛皆有當誅之罪故書至以危之

### 螟

### 冬

齊人來歸衛俘

俘公穀作寶。左傳曰文姜請之也。澄曰俘伐衛所俘獲之臣虜財。



物也五國共伐衛而齊主兵故四國所俘獲不敢  
有而悉以與齊文姜醜行自知魯人所不與故請  
於齊侯使以伐衛所俘獲之  
民物歸于魯以悅魯人也

經書月二書日無大衍歷正月甲午大戊午冬至  
二月甲子小己丑大寒三月癸巳大四月癸亥小  
五月壬申大庚寅穀雨閏月壬戌小六月辛卯大  
辛卯小滿七月辛酉小八月庚寅大九月庚申大  
十月庚寅小十一月己未大十二月己丑小

七年 甲午莊王十年○蔡哀八○曹莊十五○衛惠  
十三年○晉緡十八○鄭厲十四子儀七○陳宣  
六年○杞靖十七○宋閔五○齊  
襄十一年○秦武十一年○楚文三

春

夫人姜氏會齊侯于防

左傳曰齊志也杜氏曰防魯地文姜數與齊侯會至

齊地則姦發夫人至魯地則齊侯之志

夏

四月

辛卯夜恒星不見夜中星隕如雨

辛卯夜穀夜作昔見音現中如

字又去聲隕音尹公作實後凡隕字並同○穀梁傳曰恒星經星也左傳曰不見夜明也啖氏曰星隕如雨謂奔流衆如雨之多李陵云謀臣如雨皆言多爾澄曰恒星謂有名之經星星謂無名之衆星夜無日光則暗而星見晝有日光則明而星不見恒星不見夜明如晝故也天星之恒見者不見

則小星之無名者亦無也。隕謂自天而隕沒於地，空而不至地，如雨言衆多不可為數也。小星之無名者，隕則大星之常見者自若也。

秋

大水

無麥苗

周之秋夏之五月麥熟而黍稷梁之苗將秀大水漂盡故麥與苗俱無也

冬

夫人姜氏會齊侯于穀

胡氏曰防魯地也穀齊地也初會于禚次享于祝丘

又次如齊師又一歲而再會焉其為惡益遠矣明年無知弑諸兒其禍淫之明驗也杜氏曰穀濟北

穀城縣張氏曰今屬郟州東阿縣文姜元年以罪  
孫于齊後復宣淫自二年至今詳書於策敝苟載  
驅錄于齊風論其時世與衛之鶉之奔奔牆有茨  
諸篇皆一時之事魯衛先王之後婦行放逸同播  
其惡於萬民夫子曰魯衛之政兄弟也蓋不特周  
公康叔之盛而其世衰俗末政之陵夷亦相似也  
其後慶父亂魯齊幾取之與衛滅同時聖人以魯  
事詳於春秋而齊詩及魯事者不刪夫二南之風  
后妃不待閏而德足以化天下後世閏有家之道  
廢而亡國敗家之禍同一軌轍詩春秋之旨蓋相  
為表裏也

經書月一書日一大衍歷正月戊午大甲子冬至  
二月戊子小三月丁巳大四月丁亥小辛卯五日  
五月丙辰大六月丙戌小七月乙卯大八月乙酉  
小九月甲寅大十月甲申小十一月癸丑大十二

月癸未小長歷  
是年閏四月

八年

乙未莊王十一年。蔡哀九。曹莊十六。衛惠十四。晉緡十九。鄭厲十五。子儀八。陳

宣七。杞靖十八。宋閔六。齊襄十二。弒。秦武十二。楚文四。

春

王正月

師次于郎以俟陳人蔡人

師次之將卑而師衆也杜氏曰期共伐邲陳蔡

不至故駐師于郎以待之

甲午治兵

治公作祠。侯陳蔡不至故治兵于郎周官大司馬因秋獮而治兵以教戰此

常禮也。微者帥師在外，因有所俟，曠日持久，見師徒之不整而擅舉治兵之禮，不於獵所則非其地，不於仲秋則非其時，微者擅舉則非其人，皆非常也。故書。

夏

師及齊師圍郕

郕公作成。郕者郕叔所封，周公與郕叔皆文王之子，魯兄弟之國。

也。齊貪其地而連魯，陳蔡之兵伐之，魯莊事齊，奉命惟謹，期與陳蔡會齊伐郕，而陳蔡不至，於是魯之師獨與齊師圍郕也。魯莊志親而奉仇讎，以伐同姓不義之甚。陳蔡善於魯多矣，說者謂魯欲取郕而結陳蔡，同伐陳蔡，既不至，乃藉力於齊，按魯弱國也，安能接諸侯以伐諸侯乎？齊強國也，豈肯為魯役魯亦何敢役之哉？蓋齊欲圍郕而微兵於魯，與陳蔡爾，惟李杜二說近是。李氏堯俞曰：魯不

應與齊伐同姓之國杜氏諤曰魯兵出無名止為疆齊圍郕國畏齊之暴橫而會之也

郕降于齊師

降莫江切○欲得郕者齊也郕畏齊

也魯之與師為齊出力而已

秋

師還

還音旋後並同○見其勞民於外歷三時而後還也

冬

十有一月

癸未齊無知弑其君諸兒

左傳曰齊侯使連稱管至父戍葵丘請代弗許

故謀作亂僖公之母弟曰夷仲年生公孫無知有寵於僖公襄公絀之二人因之以作亂齊侯田于貝丘反賊遂弑之而立無知張氏曰齊襄之見弑以禍本言之則無知之亂適積漸於僖公之時而襄公之惡蹟不可揜如抗王伐衛殺魯桓公色荒禽荒暱比小人以至禍發蕭牆身殲賊手考其即位至今所書齊事無非亡國戕身之媒所謂積不善之餘殃也澄曰諸兒襄公也在位十二年明年弟小白立是為桓公

經書月二書日二大衍歷正月壬子大己巳冬至二月壬午大經正月甲午在此月三月壬子小四月辛巳大五月辛亥小六月庚辰大七月庚戌小八月己卯大九月己酉小十月戊寅大十一月戊申小十二月丁丑大經十一月癸未在此月長歷甲午正月十三日癸未十一月六日



九年

丙申莊王十二年○蔡哀十○曹莊十七○衛惠十五○晉緡二十○鄭厲十六子儀九○陳

宣八○杞靖十九○宋閔七○齊桓公小白元年○秦武十三○楚文五

春

齊人殺無知

左傳曰初無知虐於雍廩雍廩殺無知杜氏曰雍廩齊大夫劉氏曰雍廩

殺之其稱人何討賊之辭也

公及齊大夫盟于莒

常鮑叔牙曰亂將作矣奉公左傳曰襄公無

子小白出奔莒亂作管夷吾召忽奉公子糾來奔殺梁傳曰齊人殺無知而迎公子糾于魯國語韋氏註曰齊逆子糾魯莊公不即遣而盟以要之齊大夫歸迎小白于莒高氏曰此盟蓋公意杜氏曰

小白僖公庶子糾小白庶兄蒧魯地瑯琊齊縣有  
莒亭張氏曰今沂州承縣也大夫齊太宰是時齊  
無君太宰任國事故不名與文七年扈之盟趙盾  
書大夫同澄接糾與小白皆襄公之庶弟而糾為  
長齊人擇君先自長始故大夫自至魯地請糾于  
魯且觀糾之可立與否魯既要之以盟而齊大夫  
之意已不在糾矣姑狗魯而與之盟非其本心故  
歸即背之若是齊不來請魯自欲納糾則齊大夫  
安肯至魯地而受盟乎齊大夫既自至魯地請糾  
而復中變改圖背盟失信始謀之不審可罪也大  
夫不氏名者齊無君而  
以當國之大夫敵君也

夏

公伐齊納糾

納糾左作納子糾。高氏曰齊大夫  
既歸遂背蒧之盟陰召小白而不迎

糾魯始引兵伐齊而納糾方其納也小白猶未入于齊齊不受糾而公尚以莒之盟強欲納之夫頓子比燕伯失地之君內為彊臣所拒非假大援不可復其位故經書納若出奔之子則異此矣既素無位又在外焉必有君父之命乃可以還否則國人義欲奉之庶乎其可苟非此二者而隣國以兵來脅必欲其立豈王法所容乎晉納捷菑雖弗克猶貶伐齊納糾罪公也

齊小白入于齊

左傳曰桓公自莒先入澄按襄公諸兒公子糾公子小白皆齊僖公

之子襄公遭弑而無嗣則糾與小白皆可君齊齊人初欲迎糾既而當國者知糾之不如小白故拒糾而召小白先入于國而奉以為君小白之立蓋齊國公議為社稷計也則小白乃齊國之所共戴而糾特魯君之所私納故曰齊小白言其當為齊君也入者難辭雖齊大夫之所欲立然有魯兵見

伐奉糾爭國故小白亦藉莒兵護  
送而後得入齊非如歸之易也

秋

七月

丁酉葬齊襄公

賊已討而弟立  
九月乃得葬

八月

庚申及齊師戰于乾時我師敗績

乾音干○公親  
將兵納糾小白

既定猶不退師此戰書及書齊師蓋公不自戰敵  
者與齊微者戰而魯敗也杜氏曰乾時齊地時水  
在樂安界岐流旱  
則竭故曰乾時

九月

齊人取子糾殺之

左傳曰鮑叔帥師來言曰子糾親也請君討之管召讎也請受

而甘心焉乃殺子糾于生竇公羊傳曰脅我使我殺之也穀梁傳曰猶曰取其子糾而殺之云爾范氏曰言語之子糾今取而殺之魯不能救護也趙氏曰論語云桓公殺公子糾則知齊自殺之非魯殺也若實魯殺則當書云齊人使我殺子糾不應云取也澄曰趙說蓋非當從三傳未踰年之君稱子齊立小白魯亦立糾以與小白爭國書子糾以見魯莊擅立鄰國君之罪小白立而魯師還則糾乃一亡公子寄寓於魯者爾何罪而齊欲殺之乎今齊有君而魯又立糾是齊有二君矣勢固不兩立也魯兵戰敗力不敵齊故齊聲子糾爭國之罪逼魯殺之魯不能在遠殺之于生竇殺之者雖魯

從齊令也是猶齊人取之于魯魯以畀齊而殺之焉爾所以著子糾之死皆魯之罪也

冬

浚洙

公羊傳曰畏齊也張氏曰洙水在魯城北齊伐魯之道也魯雖殺子糾而猶有畏齊之心

故浚而深之以備齊師之至

經書月三書日二大衍歷正月丁未小甲戌冬至二月丙子大甲辰大寒三月丙午小甲戌雨水閏月乙亥大四月乙巳小旦日春分五月甲戌大六月甲辰大七月甲戌小丁酉二十四日八月癸卯大庚申十八日九月癸酉小十一月壬申小十二月辛丑大長歷是年閏八月

十年

丁酉莊王十三年○蔡哀十一○曹莊十八○衛惠十六○晉緡二十一○鄭厲十七子儀十

○陳宣九○杞靖二十○宋閔八  
○齊桓二○秦武十四○楚文六

春

王正月

公敗齊師于長勺

勺市若切○左傳曰齊師伐我

而公敗其師也偏戰曰敗彼未陳而我薄之也  
氏曰凡魯勝則曰敗某師張氏曰戰法定日刻期  
兩陣相向以決勝負雖敗而奔亦無多  
殺之禍偏戰則出於本意僥幸一勝也

二月

公侵宋

潛師掠境曰侵莊公僥幸得志於齊遂舉  
無名之師以掠宋境此所以召郎之師也

三月

宋人遷宿

趙氏曰徙而臣之曰遷某陸氏曰移入封內以為附庸也襄陵許氏曰遷之使

未失其國家以行其義猶有所難則是王澤之未竭也僖文以後有滅國無遷國矣澄曰使宿之民從其君遷它處宋遂有其舊都之地

夏

六月

齊師宋師次于郎

魯莊以正月敗齊二月侵宋故齊宋二國合兵報魯駐兵于郎

而未名所伐可見其師出之無名也



公敗宋師于乘丘

乘繩證切。左傳曰：齊師、宋師，次于郎。公子偃曰：宋師不整，可

敗也。宋敗齊，必還自雩門，竊出蒙臯，比而先犯之。公從之。大敗宋師于乘丘。齊師乃還。杜氏曰：乘丘，魯地。劉氏曰：齊宋揚兵，整旅經人之國，欲窺利乘，便攻取使魯人懼，疑出奇計，詐謀覆滅其軍，以自救。此輕用其衆之罪也。魯人偷得一時之勝，非弭患止亂安國使民之道。襄陵許氏曰：齊桓始入，未撫其民而輕用之，是以再不得志于魯。晉文公之入，五年而後用其民，蓋監此也。

秋

九月

荆敗蔡師于莘，以蔡侯獻舞歸。

舞，穀作武。杜氏曰：荆楚本號，後改。

為楚華蔡地獻舞蔡季名唛氏曰蔡侯失地故名  
澄曰荆之下不書其君臣者狄之也荆為中國患  
久矣宣王時已伐之入春秋遂僭稱王猾夏彌甚  
殘滅小國以廣其土地者非一也其事不聞於魯  
故不書于春秋之經蔡與齊魯宋衛陳鄭皆中國  
之望蔡見楚之浸彊前此與鄭會于鄧傳以為始  
懼楚至此蔡果首受其禍此經書荆蠻猾夏之始  
蓋荆舉兵犯蔡至莘地蔡侯祭之為荆所敗蔡侯  
師敗為荆所獲而以之歸也蔡侯獻舞哀公也留  
于楚九年至魯莊十九年卒子貽嗣是為穆公

冬

十月

齊師滅譚譚子奔莒

左傳曰齊侯之出也過譚譚  
不禮焉及其入也諸侯皆賀

諱又不至杜氏曰諱國在濟南平陵縣西南張氏曰今濟南府歷城縣澄曰滅者夷其社稷絕其宗祀也齊桓方欲圖霸而首以私憾滅小國所以為三王之罪人也諱子爵而不名者蓋是小國史策不詳其名或曰為疆大所吞雖失國而非其罪然聖筆決不以名不名而定其有罪無罪也奔不言出者國已滅矣無復有歸入之地也

經書月六書日無大衍歷正月辛未小巳卯冬至二月庚子大三月庚午小四月己亥大五月己巳小六月戊戌大七月戊辰小八月丁酉大九月丁卯小十月丙申大十一月丙寅小十二月乙未大十有一年戊戌莊王十四年○蔡哀十二○曹莊十

九○衛惠十七○晉緡二十二○鄭厲十  
八子儀十一○陳宣十○杞靖二十一○  
宋閔九○齊桓三○秦武十五○楚文七

春

王正月

夏

五月

戊寅公敗宋師于郟

郟音茲。左傳曰：宋為乘丘之役，故侵我公。祭之，宋師未

陣而薄之，敗諸郟。杜氏曰：郟，魯地。張氏曰：宋師再至，再敗魯，雖再勝國亦困於兵矣。

秋

宋大水

左傳曰：宋大水，公使弔焉。曰：天作淫雨，害於菽，歲若之，何不弔？對曰：孤實不敬，天降

之災又以為君憂拜命之辱杜氏曰公使弔之故書陸氏曰外災來告則書

冬

王姬歸于齊

左傳曰齊侯來逆共姬張氏曰即齊侯之夫人王姬是也澄曰齊桓公娶

王女以為夫人而魯主其昏故書歸同于內女不書來逆常事無譏也

經書月四書日一大衍歷正月乙丑大乙酉冬至二月乙未小三月甲子大四月甲午小丙辰春分五月癸亥大戊寅十六日六月癸巳小七月壬戌大八月壬辰小九月辛酉大十月辛卯小巳未秋分十一月庚申大己丑霜降閏月庚寅小十二月己未大長歷是年閏三月

十有二年

己亥莊王十五年崩不書○蔡哀十三○曹莊二十○衛惠十八○晉緡二十三○

鄭厲十九子儀十二。○陳宣十一。○杞靖二十二。  
○宋閔十。○弒。○齊桓四。○秦武十六。○楚文八。

春

王二月

紀叔姬歸于鄆

公羊傳曰隱之也何氏曰痛其國滅無所歸也澄曰紀無國矣而曰

紀叔姬者錄其舊也按伯姬魯女為紀侯大之夫人叔姬其娣也紀國既亡紀侯又死叔姬無所依紀季以鄆為齊附庸猶存紀之宗祀欲歸就紀國宗祀所存之處而終其身得婦人從一而終之義焉然紀侯去國九年之後乃始歸鄆者侯季之位定也惟恐齊不能容季而紀祀不可存則鄆不可依也又見其謹審遠辱之幾焉賢哉叔姬也杜氏曰紀侯去國而死叔姬歸魯紀季自定于齊而後

歸之全守節義以終婦道故係之紀啖氏曰非嫁而歸故加紀字稱紀言紀之婦也蓋紀侯去國之後死于宅而叔姬還魯至是乃歸于鄆胡氏曰魯為宗國婦人有來歸之義紀既亡矣不歸于魯全節守義不以亡故而虧婦道也夏侯令女曹奐之弟婦寡居守志曰曹氏全盛之時尚欲保終况今衰亡何忍棄之其間叔姬之風者也

夏

四月

秋

八月

甲午宋萬弑其君捷及其大夫仇牧

捷公作接左傳曰乘丘

之役公以金僕姑射南宮長萬公右敵孫生搏之  
宋人請之宋公斬之曰始吾敬子今子魯囚也吾  
弗敬子矣病之弑閔公于蒙澤遇仇牧于門批而  
殺之遇太宰督于東宮之西又殺之張氏曰仇牧  
遇弑君之賊不畏彊禦死于其難故書及華督弑  
君亂臣死不償責故不書澄曰公羊傳言莊公獲  
萬舍諸宮中數月然後歸之歸反為大夫于宋按  
萬稱名是自魯歸宋而為再命之大夫也萬有力  
無德戰敗免罪已幸矣又以之為大夫  
宋閔用人如此其遭弑也自取之也

冬

十月



宋萬出奔陳

左傳曰立子游羣公子奔蕭公子御說奔亳南宮牛猛獲帥師圍亳蕭叔

大心及戴武宣穆莊之族以曹師伐之殺南宮牛于師殺子游于宋立桓公猛獲奔衛南宮萬奔陳宋人請猛獲于衛衛人歸之亦請南宮萬于陳以賂皆醢之胡氏曰宋人醢萬則賊已討矣不書殺萬特書萬出奔陳以著陳人黨惡之罪張氏曰陳容其奔罪已大矣受賂而後歸之與所謂殺其人汙其宮而濬之之意何如澄曰陳之人當如昔年之執州吁者以執萬今乃受其奔是為逆賊之逋逃主也宋臣雖能敗賊而立君然賊既逸去後始得而誅之視石碯討州吁之義則有愧矣故不言

宋人殺萬

經書月四書日一大衍歷正月己丑大庚寅冬至二月己未小三月戊子大四月戊午小五月丁亥

大六月丁巳小七月丙戌大八月丙辰小九月乙酉大經八月甲午在此月十月乙卯小十一月甲申大十二月甲寅小長歷甲午八月九日

十有三年

庚子僖王元年○齊霸桓公五年○蔡哀十四○曹莊二十一○衛惠十九○晉緡

二十四○鄭厲二十子儀十三○陳宣十二○杞靖二十三○宋桓公御說元年○秦武十七○楚九文

春

齊侯宋人陳人蔡人邾人會于北杏

齊侯穀作齊人○左傳曰

會于北杏以平宋亂杜氏曰北杏齊地澄曰是時管仲為政四年矣教齊桓糾合諸侯以圖霸而始

為此會也按上年宋有弑君之亂蕭叔大心僅能率五族殄亂賊立桓公御說平宋亂者定御說之位也以平宋亂會諸侯其名正矣然列國僅有陳蔡小國僅有邾併宋四國而已又君不躬至而卿代行若魯若衛最近于齊而皆不會是齊桓之信未能申于諸侯也宋陳蔡以卿會君故降而稱人春秋之世以諸侯而主天下盟會由文七年扈之盟始以大夫而主天下盟會由文七年扈之盟始張氏曰宋弑君之首惡方誅嗣君新立合諸侯定宋亂陳蔡邾並來受命齊桓苟能於宋萬初弑君之時舉兵討之則不勞告諭而天下翕然宗齊矣齊桓欲合諸侯行霸事恐諸侯之未喻故未欲煩其君而使其臣來會告以平宋亂之事晉悼公合諸侯于邢丘命朝聘之數使諸侯之大夫聽命鄭伯之外齊宋衛邢皆稱人殆齊桓故事歟

夏

六月

齊人滅遂

管仲相桓公方將糾合諸侯以圖霸而前此滅譚今又滅遂不仁甚矣此孔門

所以羞稱齊桓曾西所以不為管仲也杜氏曰遂國在濟北蛇丘縣東北張氏曰蛇丘屬漢泰山郡隨鄉故遂國也

秋

七月

冬

公會齊侯盟于柯

左傳曰始及齊平也孫氏曰公不及北杏之會桓公既滅遂懼

其見討故盟于此杜氏曰柯齊之阿邑張氏曰今鄆州東阿縣魯莊自齊桓入國屢與之戰雖一再勝而齊方修軍政以圖霸魯有見伐之虞至此始及齊平公穀所載曹子之事齊桓捐小利以收魯容或有之皆霸術也但公羊言之過其實爾趙氏曰按桓公未嘗侵魯地盟後未嘗歸魯田其事妄經書月二書日無大衍歷正月癸未大乙未冬至二月癸丑小三月壬午大四月壬子小五月辛巳大六月辛亥大七月辛巳小八月庚戌大九月庚辰小十月己酉大十一月己卯小十二月戊申大

十有四年

辛丑僖王二年○齊霸桓六○蔡哀十五○曹莊二十二○衛惠二十○晉緡二十

五○鄭厲二十一○子儀十四○陳宣十三○杞共公元年○宋桓二○秦武十八○楚文十

春

齊人陳人曹人伐宋

左傳曰宋人背北杏之會諸侯伐宋取成而還澄按北杏

之會齊侯在以定宋君之位而宋即背之蓋假仁義非誠心故人心不予也張氏曰伐宋用陳曹皆宋之鄰不勤遠國簡便之規撫也程子曰齊自管仲為政莊十一年而後未嘗與大衆也其賦於諸侯亦寡矣終管仲之身息養天下厚矣至於秦晉使之不競而已不彊致也是以其功卑而易成

夏

單伯會伐宋

伐宋之役齊止用近宋之陳曹而不煩遠兵然魯方從霸故齊雖不微于

魯而魯自遣單伯以兵往會也張氏曰魯自盟柯已平于齊而未從其役故因齊討宋命上御率師

往會示從霸之意齊桓方興理勢當從固異於羣  
會宋殤黨亂賊伐無罪矣故書會伐而不再叙諸  
也國

秋

七月

荆入蔡

左傳曰蔡哀侯娶于陳息侯亦娶焉息媯  
過蔡蔡侯止而見之弗賓息侯聞之怒使

謂楚文王曰伐我吾求救于蔡而伐之楚子從之  
敗蔡于莘以蔡侯歸蔡哀侯為莘故繩息媯以語  
楚子楚子如息以食入享遂滅息以息媯歸生堵  
敖及成王未言楚子問之對曰吾一婦人而事二  
夫縱弗能死其又奚言楚子以蔡侯滅息遂入蔡  
張氏曰息之亡蔡之入皆哀侯致之蔡自會鄧懼

楚之後非但不為徹桑土綢繆牖戶之謀而以婦人之故再召楚師始則身虜繼以國破楚熊賁興兵以悅婦人是時齊桓之業未成遂致其橫行淮漢侵及中國也澄曰齊雖圖霸力未能以帖荆十年荆方敗蔡而虜其君今又破蔡而入其國春秋屢書痛中國之不競也

冬

單伯會齊侯宋公衛侯鄭伯于鄆

鄆傳曰宋服故也

杜氏曰鄆衛地張氏曰今濮州鄆城縣澄曰春齊陳曹三國之人伐宋其夏魯單伯方往會伐時宋已成而三國還師單伯不及至宋境矣故冬而單伯復會齊宋之君以結成而衛鄭之君亦來會也此衣裳之會之一齊霸蓋略定矣若陳蔡曹邾已歸齊者不復與會蓋齊之霸政務簡便不欲煩諸



也侯

經書月一書日無大衍歷正月戊寅小庚子冬至  
二月丁未大三月丁丑小四月丙午大五月丙子  
小六月乙巳大傳甲子二十日七月乙亥小八月  
甲辰大癸酉大暑閏月甲戌大九月甲辰小旦日  
處暑十月癸酉大十一月癸卯小  
十二月壬申大長歷是年閏五月

十有五年

壬寅僖王三年○齊霸桓七○蔡哀十六  
○曾莊二十三○衛惠二十一○晉緡二

十六○鄭厲二十二○陳宣十四○杞共  
二○宋桓三○秦武十九○楚文十一

春

齊侯宋公陳侯衛侯鄭伯會于鄆

左傳曰齊始霸也張氏曰傳謂

始霸指諸侯始定而言然魯未信服自後宋人猶或主兵衛鄭未免復叛蓋齊霸駸駸而定而諸侯之心猶未一也劉氏曰伯則主諸侯諸侯莫先焉此年伐鄭宋序齊上明年伐鄭宋亦序齊上齊之未主諸侯明矣然則齊始霸在十六年九國盟于幽之時自此始為諸侯主矣襄陵許氏曰十三年十四年會至是又會三合諸侯而不盟以示慎重是以盟則衆信莫敢渝也

## 夏

夫人姜氏如齊

張氏曰文姜播惡齊襄之世不如齊八年矣至此復如齊桓公欲求

魯好以定霸業而不之非襄陵許氏曰郵之會魯尚未從桓公未能比近無以示遠務求合于魯是以受文姜以昭親親而齊魯之交卒合然而禮坊一弛夫人復啓越竟之恣遂成如莒之姦

秋

宋人齊人邾人伐邾

邾公作兒。左傳曰：諸侯為宋伐邾，張氏曰：小邾宋之附

庸不服。宋桓公為宋伐之，宋序齊上，蓋齊桓霸體未全正。此役為宋而興，亦猶伐宋之師，邾人為道而序鄭之上也。劉氏曰：此齊桓之師，何以不先諸侯，猶未成乎霸也。明年會幽為九合之始，九者始于幽終于淮，澄按九合之數，說各不同，故朱子以為九當作糾。杜氏諤曰：齊桓內不能率諸侯以朝天子，外不能攘夷狄以救中國，為宋討一附庸以求其服，從斯德之小乎。

鄭人侵宋

左傳曰：鄭人問之而侵宋，張氏曰：問諸侯伐邾而侵宋，不誠服齊而背二鄭之

會鄭之反覆於齊楚之間，蓋始于此。

冬

十月

經書月一書日無大行歷正月壬寅小丙午冬至  
二月辛未大三月辛丑小四月庚午大五月庚子  
小六月己巳大七月己亥小八月戊辰大九月戊  
戌小十月丁卯大十一月丁酉小十二月丙寅大

十有六年

○癸卯僖王四年○齊霸桓八○蔡哀十七  
○曹莊二十四○衛惠二十二○晉武公

稱三十八年○鄭厲二十三○陳宣十五○  
杞共三○宋桓四○秦武二十○楚文十二

春

王正月

夏

宋人齊人衛人伐鄭

左傳曰宋故也孫氏曰鄭背

伐之齊序宋下者與伐鄭義同張氏曰伐鄭不止為宋而已蓋鄭不服則諸侯之心未一也襄陵許氏曰中國諸侯宋為大既為之服鄭又為之報鄭宋蓋自是與齊為一宋親而中國諸侯定矣

秋

荆伐鄭

左傳曰鄭伯自櫟入緩告于楚楚伐鄭及櫟孫氏曰桓未能救中國也張氏曰蓋齊

霸未定楚之威侵及中國自桓二年鄭已懼楚會鄭至此三十餘年而後受兵楚之威不輕用蓋如此師氏曰自桓公之立而荆為中國患矣十年敗蔡師十四年又入蔡今復伐鄭而桓不能討聖人

詳而書之  
以罪桓也

冬

十有二月

公會齊侯宋公陳侯衛侯鄭伯許男曹伯滑伯滕

子同盟于幽

左穀無公字許男下左無曹伯字○齊自北吉以後屢合諸侯有會無盟

者諸侯之心未一也至此而鄭服始合九國之君而為此盟此桓公糾合諸侯一匡天下之始自入春秋以來所未嘗有之事也諸侯尊桓公為霸而主盟然桓公執謙未敢專主盟之權故曰同盟同者列國相與盟而莫適為主及二十七年再盟于幽齊亦未專主盟也至僖二年宋江黃盟貫齊始

為盟主而自此以後不復書同矣杜氏曰陳國每盟會皆在衛下齊桓始霸楚亦始彊陳介於二大國之間而為三恪之客齊桓因而進之班在衛上終於春秋滑國都費河南緱氏縣幽宋地

邾子克卒

克邾儀父也蓋齊桓請命于王爵之為子而儀父改名克也子瑣嗣

經書月二書日無大衍歷正月丙申大辛亥冬至二月丙寅小三月乙未大四月乙丑小五月甲午大六月甲子小七月癸巳大八月癸亥小九月壬辰大十月壬戌小十一月辛卯大十二月辛酉小

十有七年

甲辰僖王五年崩不書○齊霸桓九○蔡哀十八○曹莊二十五○衛惠二十三○

晉武三十九○鄭厲二十四○陳宣十六○杞共四○宋桓五○秦德公元年○楚文十三

春

齊人執鄭詹

詹公作贍。詹者鄭再命之大夫。鄭嘗再會鄆，又背之而侵宋。今雖盟幽

然其心必又有不誠服于齊者，故齊執其大夫。不知當時指何罪而執之。左氏以為鄭不朝也。孔氏曰：齊以不朝責鄭，鄭命詹詣齊謝罪。齊人執之，襄陵許氏曰：宋大鄭小，齊桓蓋德宋而威鄭。文王之興大邦，畏其力小，邦懷其德而桓反之，是以為霸道也。至於宋襄執節之虐，則桓不為矣。

夏

齊人殲于遂

殲，公作濊。左傳曰：遂因氏領氏工。妻氏須遂氏饗齊，戊醉而殺之。齊人

殲焉。澄曰：殲者，盡殺之之辭。齊桓霸事方興，而以疆大吞小，弱滅遂而慮遂之遺民不服，故遣齊之民戍守其地，以無罪滅遂，固已失遂人之心矣。而齊之戍遂者，或又凌蔑其舊民，故遂人憤怒而盡



殺之也張氏曰不言遂人殲齊戍而書其自殲所以伸遠人復讎之志而著桓公不仁以至於自殲其衆也襄陵許氏曰齊師滅譚譚子奔莒著其君不誑也齊人滅遂齊人殲于遂著其民不歸也孟子謂霸者以力服人非心服也力不贍也荀子謂桓詐邾龍莒并國三十五則所滅蓋不盡書書滅譚滅遂上下

一見之也

# 秋

鄭詹自齊逃來

常山劉氏曰詹為鄭卿見執於齊不能自辨以理取直而歸反如匹

夫之逃越在他國斯可賤也蘇氏曰詹之義當身任齊責以紓國患而逃遁自免書逃來賤之也胡氏曰齊桓始霸同盟于幽而魯首叛盟受其逋逃虧信義矣張氏曰執叛國大夫逾歷三時不令其

服罪而去致防閑弛慢國囚亡逸齊之罪也竊身  
逃竄同于苟免之匹夫無大夫之行失節辱國詹  
之罪也為逋逃主以取  
伐於霸主魯之罪也

冬

多麋 麋鹿之大者魯地所有昔不如是之多而今  
為災則書有有域是也以無為異則書無  
無冰是也麋者常有之物惟其多則書之

經書月無書日無大行歷正月庚寅大丙辰冬至  
二月庚申小三月己丑大四月己未小丁亥春分  
閏月戊子大五月戊午小旦日穀雨六月丁亥大  
七月丁巳小八月丙戌大九月丙辰小十月乙酉  
大十一月乙卯小十二月  
甲申大長歷是年閏六月

十有八年

乙巳惠王元年○齊霸桓十○蔡哀十九○曹莊二十六○衛惠二十四○晉獻公

侂諸元年○鄭厲二十五○陳宣十七○杞共五○宋桓六○秦德二○楚文十四

春

王三月

日有食之

孫氏曰不日不朔日朔俱失也呂氏曰史失之春秋無由追攷也

夏

公追戎于濟西

戎即隱公桓公與之盟者追謂於其已退而躡其後以追之也戎入

魯境魯將禦之而戎邁退故魯莊以兵遠追逐之至於濟水之西也孫氏曰僖二十六年齊人侵我

西鄙公追齊師至鄆先言侵而後言追此不言侵伐者明不覺其來已去而追之也

## 秋

有蠶

穀梁傳曰一有一亡曰有蠶射人者也公羊傳曰記異也何氏曰以有為異也杜氏曰蠶

短狐含沙射人張氏曰蠶能含沙射水中人影中之輒病或至于死江淮以南水濱有之魯所無也

## 冬

### 十月

經書月二書日無大衍歷正月甲寅大辛酉冬至二月甲申小三月癸丑大四月癸未小五月壬子大日食沈括謂春秋日食三十六淮南衛朴能推算三十五猶不得莊十八年三月者一杜預長歷

三月癸未朔不入食限劉孝孫以為五月壬子朔食與大衍歷合經書三月閏差也六月壬午小七月辛亥大八月辛巳大九月辛亥小十月庚辰大十一月庚戌小十二月己卯大

十有九年

丙子惠王二年○齊霸桓十一○蔡哀二十○曹莊二十七○衛惠二十五○晉獻

二○鄭厲二十六○陳宣十八○杞共六○宋桓七○秦宣公元年○楚文十五

春

王正月

夏

四月

秋

公子結媵陳人之婦于鄆遂及齊侯宋公盟

公子結魯

三命大夫魯因受鄭詹之逃疑得罪于齊霸故命公子結與齊宋二君會鄆而盟冀以釋前罪而鄆之巨室有嫁女為陳人之婦者結以庶女媵之因有盟鄆之便而送其女於鄆然後與齊宋盟春秋以其不敬君命故先書其私事而反以君命之正事為遂事例與祭公來遂逆王后于紀同結以私家之鄙事參會霸之大盟不惟不足以釋齊之怒而又以重魯之罪是以致齊之來伐也

夫人姜氏如莒

夫人自齊襄既弑之後八年不出因十五年又一至齊蓋假托國事

以愚其昏懦之子莊公不能制因此又復縱恣故于今如莒也婦人既嫁不踰境父母沒不得歸寧

雖兄弟之國且不  
可往况往它國乎

冬

齊人宋人陳人伐我西鄙

魯之臣送己女為媵而  
遂與霸主大國之盟不恭

也是以聲其罪而伐之陳亦以結媵其國人之婦  
而輕慢霸主故與齊宋同興問罪之師結不知禮  
而為私為公兩失歡好  
禮之不可不謹也如是

經書月二書日無大衍歷正月己酉小丁卯冬至  
二月戊寅大三月戊申小四月丁丑大五月丁未  
小六月丙子大七月丙午小八月乙亥大九月乙  
巳小十月甲戌大十一月甲辰小十二月癸酉大

二十年  
丁未惠王三年○齊霸桓十二○蔡穆侯盼  
元年○曹莊二十八○衛惠二十六○晉獻

三○鄭厲二十七○陳宣十九○杞共七  
○宋桓八○秦宣二○楚堵敖熊麇元年

春

王二月

夫人姜氏如莒

此年書夫人往它國以姦而魯莊  
若周聞知昔年猶可諉曰年未長

也今既年長矣而如此其不子也甚矣哉

夏

齊大災

張氏曰天火曰災書大志其甚  
也齊人來告魯往弔之故書

秋



七月

冬

齊人伐戎

戎穀作我○張氏曰齊桓于是有安諸夏之志戎在徐州之域最近于魯故先

治之也

經書月二書日無大衍歷正月癸卯大壬申冬至  
閏月癸酉小二月壬寅大三月壬申小四月辛丑  
大五月辛未小六月庚子大七月庚午小八月己  
亥大九月己巳小十月戊戌大十一月戊辰小十  
二月丁酉大長歷  
是年閏十二月

二十有一年

戊申惠王四年○齊霸桓十三○蔡穆  
二○曹莊二十九○衛惠二十七○晉

獻四〇鄭厲二十八卒〇陳宣二十〇杞  
共八〇宋桓九〇秦宣三〇楚堵敖二

春

王正月

夏

五月

辛酉鄭伯突卒

突鄭厲公也在位二十八年子捷嗣是為文公張氏曰突鄭莊公之

尊子莊公既歿奪忽之位其後雖為蔡仲所逐旋入于櫟卒取鄭國故不復著忽壘儀之在位以其不能君也論者以為突始終能君夫篡弑竊國之人而春秋終始君之且記其卒于位所以著小人

肆志亂賊得終王法不行而世之所由亂也

秋

七月

戊戌夫人姜氏薨

夫人桓公之夫人莊公之母也

冬

十有二月

葬鄭厲公

經書月四書日二大衍歷正月丁卯小丁丑冬至二月丙申大三月丙寅小四月乙未大五月乙丑

大六月乙未小經五月辛酉在此月七月甲子大  
八月甲午小經七月戊戌在此月九月癸亥大十  
月癸巳小十一月壬戌大十二月壬辰小  
長歷辛酉五月二十七日戊戌七月五日

二十有二年

己酉惠王五年○齊霸桓十四○蔡穆  
三○曹莊三十○衛惠二十八○晉獻

五○鄭文公捷元年○陳宣二十一○杞惠  
公元年○宋桓十○秦宣四○楚堵敖三

春

王正月

肆大眚

眚公作省○肆謂縱放之也○眚謂過誤而  
犯者○虞書言眚災肆赦○眚固可赦而不言

大聖人雖至仁然救人之罪亦必有所劑量於其  
間不一槩也○今書肆大眚則是罪之大而不當赦

者亦救之譏其  
惠姦佚罰也

癸丑葬我小君文姜

高氏曰婦人無爵何謚之有先王之制但取夫之謚冠於

姓之上以明所屬詩所謂莊姜宣姜共姜經所書宋共姬是也豈有不繫其夫而別自為謚者哉夫人姜氏弑逆淫亂之人得罪於宗廟國人之所不容今也云亡雖以母子之故不忍棄絕則莫之足矣又迫於大義不敢加以夫之謚別為之謚曰文而不復繫於桓公將以掩其惡也然而棄天罔民壞先王之制則其罪又不若從其夫之謚耳自是魯國從而效尤凡夫人之死皆為之別立謚後世因循不改大失春秋之旨矣沙隨程氏曰婦人之謚從夫文姜別作謚以其得罪於先公也其後或妾母借稱夫人或雖正嫡亦不能從夫謚者著禮之變也

陳人殺其公子御寇

御上聲。穀梁傳曰言公子而不言大夫公子未命為大

夫也其曰公子何也公子之重視大夫孫氏曰春秋之義非天子不得專殺二百四十二年無天王殺大夫文書諸侯殺大夫者四十七古者諸侯之大夫皆命于天子諸侯不得專命也大夫有罪則請于天子諸侯不得專殺也大夫猶不得專殺況世子母弟乎春秋之世國無小大其卿大夫士皆專命之有罪無罪皆專殺之其無王也甚矣陳人殺其公子御寇者譏專殺也稱君稱國稱人雖有輕重其專殺之罪則一也胡氏曰殺而稱君者獨出於其君之意而大夫國人有不與焉如晉侯殺其世子申生之類是也稱國者國君大夫與聞其事而不請于天子如鄭殺其大夫申侯之類是也稱人有二義其一國亂無政衆人擅殺而不出於其君則稱人如陳人殺其公子御寇之類是也其

一弑君之賊人人之所得討背叛之臣國人之所同惡則稱人如衛人殺州吁鄭人殺良霄之類是也澄曰公子言其屬也非稱其氏也屬之下單稱名與再命之大夫同故穀梁以為公子之重視大夫

夏

五月

孫氏曰春秋未有以夏五月首時者此蓋五月之下文有脫事爾或曰書時之首月而四

訛為五也

秋

七月

丙申及齊高侯盟于防及高侯盟蓋求昏于齊也  
高侯齊三命之卿當國者  
豈吾微者可與之盟哉孰及之公也  
趙氏以為凡盟不目內皆指公也

冬

公如齊納幣

穀梁傳曰納幣大夫之事也公親納幣非禮也趙氏曰昏禮有六一納采

二問名三納吉四納徵納徵即納幣也五請期六親迎親迎即逆女也春秋獨書其二以納幣方契成逆女為事終舉重之義也啖氏曰魯往它國納幣皆常事不書凡書者皆譏也它國來亦如之孫氏曰按桓六年九月丁卯子同生公十四歲即位又二十四年如齊逆女年三十七始昏者文姜制之不得以時而昏爾故母喪未終如齊納幣圖昏之速也澄曰魯莊受制于母年長而不得娶母既



死急於娶故於喪制中屈己與齊大夫盟而求昏  
馬齊之許未堅而公自如齊納幣納幣非公所當  
自行也程子曰齊疑昏議故公自行  
行納幣後二年方逆齊難之也

經書月三書日二大衍歷正月辛酉大壬午冬至  
二月辛卯小經正月癸丑在此月三月庚申大四  
月庚寅小五月己未大六月己丑小七月戊午大  
乙酉夏至八月戊子小經七月丙申在此月九月  
丁巳大丙戌處暑十月丁亥大丙辰秋分閏月丁  
巳小十一月丙戌大丁亥霜降十二月丙辰小長  
歷癸丑正月二十三日  
丙申七月九日

二十有三年

庚戌惠王六年○齊霸桓十五○蔡穆  
四○曹莊三十一卒○衛惠二十九○

○晉獻六○鄭文二○陳宣二十二○杞惠二  
○宋桓十一○秦宣五○楚成王○顏元年

春

公至自齊

至之者譏之也譏其不當親往納幣也

祭叔來聘

祭音債○祭者周畿內之國隱之時爵為伯桓之時爵為公叔者公之弟貳君

者也例稱字畿內之國王臣也不當外交諸侯而祭國入春秋以來至今凡三交魯矣伯之來公之來來下不書其事蓋伯與公君也行兩君相見之禮是朝魯也王臣外交通問且不可況以畿內之國朝畿外之諸侯烏可哉故不書曰朝而但曰來祭叔臣也蓋以臣禮見公然當時有介弟攝君行禮之事若不書聘則或疑其為攝君而行朝禮也故書來聘者見其奉君命以聘而非攝君事以朝此春秋別嫌明微之意若夫王臣私交之非禮則或朝或聘其罪一也

夏

公如齊觀社

公求昏於齊而齊之許未愆於是公屈尊親往納幣以致請而未得齊之

諾欲再往齊致請而無名遂托觀社以行夫社者諸侯祭其土示之常事未聞鄰國之君往觀之者

如齊而曰觀社此何禮哉按春秋外傳載曹劌之言曰齊棄太公之法觀民於社君為是舉而往觀

之非故業也又按襄二十四年齊社蒐軍實使客觀之蓋齊俗每因祭社則蒐軍以旉示威衆而聚人觀之故公得託此為名以如齊也程子曰昏議尚疑故以觀社再往請議後一年方逆蓋齊難之

公至自齊

其譏與前納幣之至同

荆人來聘

按前書敗蔡入蔡伐鄭單書荆此於荆下加人字者啖氏曰若言荆來聘則似

舉州皆來故加人字以成文爾無定意也陸氏曰凡以號舉者皆稱人君臣同辭張氏曰楚自四五  
年來先加兵於鄭蔡而聘使至魯用遠交近攻之術

公及齊侯遇于穀

昏議猶未定故又遇於穀以致請

蕭叔朝公

蕭附庸國今徐州蕭縣叔蕭君之弟貳君者攝君行朝禮朝公者朝公于穀也

朝聘當廟受于野非禮也介弟攝君而朝又行朝禮於野蕭之朝魯之受皆非也交讒之

秋

丹桓宮楹

穀梁傳曰禮天子諸侯黜至大夫倉士註丹楹非禮也何氏曰楹柱也丹之者

為將娶齊女欲以誇大示之

冬

十有一月

曹伯射姑卒

射音亦。射姑莊公也在位三十一年卒。世子翬嗣。踰年而庶子赤篡立。

是為僖公史記世家赤作夷

十有二月

甲寅公會齊侯盟于扈

遇穀以請而齊猶難之故又盟以要其信而後許也

夫求昏者可求則求不可則已許昏者可許則許不可則卻魯欲求齊婚不以媒妁往覘其可不可公乃自與齊高侯盟以求之未得齊諾而公遽請納幣是與強委禽者同也躬納幣而猶未諾則又

往觀社以請觀社以請而猶未諾則又遇于穀以請遇穀之後宜若可矣又必盟于扈而後可焉何其難之甚也二國之昏姻不以禮不以義如此哀姜之不終也宜哉杜氏曰扈鄭地在滎陽卷縣西北孫氏曰扈齊地

經書月二書日一大衍歷正月乙酉大戊子冬至二月乙卯小三月甲申大四月甲寅小五月癸未大六月癸丑小七月壬午大八月壬子小九月辛巳大十月辛亥小十一月庚辰大十二月庚戌大甲寅五日

二十有四年

辛亥惠王七年○齊霸桓十六○蔡穆五○曹僖公赤元年○衛惠三十○晉

獻七○鄭文三○陳宣二十三○杞惠三○宋桓十二○秦宣六○楚成二

春

王三月

刻桓宮桷

穀梁傳曰天子之桷斷之榿之加窳石馬諸侯之桷斷之榿之大夫斷之士斷

本刻桷非正也杜氏曰刻鏤也桷椽也澄曰于榿斷之外又加刻鏤之功丹楹刻桷者以齊女將歸見于禰廟故示此

華靡以夸之也

葬曹莊公

曹羈嗣位而葬其父也

夏

公如齊逆女

親迎常事不書公納幣越三年而後得親迎則非常也故書

秋

公至自齊

納幣之久而後親迎親迎以非常而書故至之以示譏也

八月

丁丑夫人姜氏入

孫氏曰公親迎于齊不俟夫人而至失夫之道也婦人從夫者

也夫人不從公而入失婦之道也澄曰凡卿為君逆夫人本非禮也猶且以夫人同至公親往逆而不與同至夫人後公而入蓋夫人難之以要公也公羊謂夫人與公有所約而後入所謂有所約者杜氏曰為以孟任故蓋公嬖孟任必與公約不復嬖孟任而後入也入者非順易之辭有阻難之意焉張氏曰見莊公不夫哀姜妬忌之情矣



戊寅大夫宗婦覲用幣

覲音迪。大夫宗婦者同宗大夫之婦也。覲見也用。

幣以幣為贄也。凡見必用贄。卿贄以羔，大夫贄以鴈，士贄以雉。婦人之贄，榛栗棗脩而已。夫人姜氏既入莊公，欲夸寵之，故使同宗大夫之婦用幣為贄以見也。

大水

陰盛所致也。

冬

戎侵曹

侵曹蓋納赤也。

曹羈出奔陳

杜氏曰：羈蓋曹世子，微弱不能自定。按上年十一月曹莊公射姑卒，今

年三月而葬，則羈以世子嗣位，葬其先君。至今年冬在位期年矣。為戎所逐而出，不書爵而書名，義

與鄭  
忽同

赤歸于曹

赤曹僖公名蓋曹莊公之庶子魯之弟也歸者易辭為戎所納故易義與突歸

于鄭同但彼先書突歸而後書忽出蓋祭仲在宋挈突以歸而後忽出此則魯避戎兵出而赤乃得歸也張氏曰羈繫于曹與鄭忽同明其正也赤不繫國庶孽也赤以庶逐適戎以裔謀夏天子方伯不能正

郭公

郭國名或云即號也公爵畿內八命之國也公下文缺或云公字疑是亡字書郭亡義與

梁亡同劉氏曰齊桓公之郭問父老曰郭何故亡曰以其善善而惡惡也公曰若子之言乃賢君也何至於亡父老曰郭君善善不能用惡惡不能去所以亡也考其時與事或然

經書月二書日二大衍歷正月庚辰小癸巳冬至  
二月己酉大三月己卯小四月戊申大五月戊寅  
小六月丁未大七月丁丑小八月丙午大九月丙  
子小經八月丁丑戊寅在此月十月乙巳大十一  
月乙亥小十二月甲辰大長歷是年  
閏七月丁丑八月三日戊寅四日

二十有五年

壬子惠王八年○齊霸桓十七○蔡穆  
六○曹僖二○衛惠三十一卒○晉獻

八○鄭文四○陳宣二十四○杞惠  
四○宋桓十三○秦宣七○楚成三

春

陳侯使女叔來聘

女音汝○左傳曰始結陳好也  
杜氏曰季友相魯原仲相陳二

人有舊故女叔來聘季友冬亦報聘高郵孫氏曰  
諸侯之大夫天子賜之邑使之歸國則書氏書字

鄭祭仲魯單伯陳女叔是也澄曰女氏叔字天子  
所命四命之大夫陳三恪也其初公爵故有四命  
孤之

夏

五月

癸丑衛侯朔卒

朔惠公也在位三十一年魯不會  
故不書葬其子赤嗣是為懿公

六月

辛未朔日有食之鼓用牲于社

穀梁傳曰鼓禮也  
用牲非禮也澄謂

日食者陰盛陽微  
鼓聲以助陽氣

伯姬歸于杞

高氏曰凡內女書歸若時君之女則加于字以別之此伯姬蓋桓公未歲

所生之女于今殆二十有餘歲失時而後嫁也陸氏曰不言逆者夫自逆常事不書澄以他書攷證

蓋歸於杞惠公

秋

大水鼓用牲于社于門

左傳曰凡天災有幣無牲非日月之眚不鼓

冬

公子友如陳

杜氏曰報女叔之聘

經書月二書日二大衍歷正月甲戌小戌戌冬至二月癸卯大三月癸酉小四月壬寅大五月壬申

大庚子穀雨六月壬寅小庚午小滿經五月癸丑  
在此月閏月辛未大日食經書六月朔置閏下同  
也七月辛丑小旦日夏至八月庚午大九月庚子  
小十月己巳大十一月己亥小十二月戊辰大長  
歷癸丑五日  
月十二日

二十有六年

癸丑惠王九年○齊霸桓十八○蔡穆  
七○曾僖三○衛懿公赤元年○晉獻

九○鄭文五○陳宣二十五○杞惠  
五○宋桓十四○秦宣八○楚成四

春

公脫  
春字

公伐戎

張氏曰為追于濟西之恥報怨也襄陵許  
氏曰隱桓世有戎盟至於莊公戎始變淪

我是以有濟西之役於此伐戎義  
已勝矣齊魯伐戎而中國崇也

夏

公至自伐戎

襄陵許氏曰以伐戎至大伐戎也杜氏謂曰伐戎無譏也所以至者公出

師于外踰時而返必書至以危之

曹殺其大夫

劉氏曰稱國以殺而不名者大夫無罪而君殺之也張氏曰曹伯赤殺之

也豈於羈赤出入之際或不附戎而殺之若鄭厲殺原繁傅瑕與高氏曰除羈之黨惡其內應也澄曰大夫不書氏名被殺者無罪也惟此年曹殺大夫僖二十七年宋殺大夫文七年宋人殺大夫三條爾其他縱或無罪必有被殺之因是亦罪也縱或有罪亦當告之天子侯國不得專殺也

秋

公會宋人齊人伐徐

張氏曰徐嬴姓國國近齊魯今徐州彭城境也澄曰穆

以後徐僭稱王徐國雖小但春秋之前已嘗僭稱王號今見楚彊則服於楚國與宋鄰必與宋有惡齊桓為宋伐之故命宋主兵而序齊上齊宋蓋皆卿也以公在故降稱人胡氏曰按書伯禽嘗征徐戎則徐為魯患舊矣是年春公伐戎狄又伐徐者必徐與戎合兵表裏為魯患也故雖齊宋師少而公獨親行

冬

十有二月

癸亥朔日有食之



經書月一書日一大衍歷正月戊戌小癸卯冬至  
二月丁卯大三月丁酉小四月丙寅大五月丙申  
小六月乙丑大七月乙未小八月甲子大九月甲  
午大十月甲子小十一月癸巳大十二月癸亥小  
食日

二十有七年

甲寅惠王十年○齊霸桓十九○蔡穆  
八○曹僖四○衛懿二○晉獻十○鄭  
文六○陳宣二十六○杞惠六  
宋桓十五○秦宣九○楚成五

春

公會杞伯姬于洮

洮音滔○陸氏曰參譏之沙隨  
程氏曰與二年夫人姜氏會齊

侯于禚之事同高氏曰婦人無相會之禮伯姬既  
歸於杞復來與公會是與文姜齊襄無異也杜氏

曰洮魯地張氏曰洮溝  
在濟州今濟南府也

夏

六月

公會齊侯宋公陳侯鄭伯同盟于幽

左傳曰陳鄭服也張氏曰

再舉同盟之禮以申霸令而一諸侯之心也魯宋陳鄭偕至而衛獨不來故明年伐衛澄曰同盟者齊桓猶未專主會也

秋

公子友如陳葬原仲

原仲陳大夫原氏仲字禮臣既没不名故稱字猶管夷吾

稱管仲也按無會葬鄰國大夫之禮季友與原仲有舊欲往會其葬以大夫不可私行出境請于公而公命之行故書公子友如陳無以異於常時奉君命而使者大夫無私交公之遣行友之會葬原氏之受皆非禮也恭譏之

冬

杞伯姬來

趙氏曰譏無父母而來凡內女稱來不

來故書爾高氏曰伯姬春方出與公會而冬又來何其不安于杞也而杞伯不能制其妻如其國何

莒慶來逆叔姬

此亦是桓公之女昏姻失時年近三十而始嫁也大夫娶公女公不

自主而使大夫主之凡書者譏尊卑不敵而公自主之也莒慶莒國之卿再命稱名莒無三命之卿

此其上卿也高氏曰叔姬者伯姬之妹皆非莊公之女伯姬歸于杞不以叔姬娣而以適莒慶者卑杞故也不曰逆女而曰逆叔姬以別卿為君逆者也慶不名者莒小國無三命卿與齊高固異

杞伯來朝

高氏曰致伯姬也杞伯不能制其內縱伯姬之數出又來朝而致之其卑弱可知

知矣

公會齊侯于城濮

杜氏曰城濮衛地張氏曰齊欲討衛而會魯於此定其交而後

加兵於人所以見其謀之審也

經書月一書日無大衍歷正月壬辰大己酉冬至二月壬戌小三月辛卯大四月辛酉小五月庚寅大六月庚申小七月己丑大八月己未小九月戊子大十月戊午小十一月丁亥大十二月丁巳大

二十有八年

乙卯惠王十一年。齊霸桓二十。蔡穆九。曹僖五。衛懿三。晉獻十一。

○鄭文七。○陳宣二十七。○杞惠七。○宋桓十六。○秦宣十。○楚成六。

春

王三月

甲寅齊人伐衛衛人及齊人戰衛人敗績

左傳曰

伯廖賜齊侯命且請伐衛以其立子頹也齊伐衛敗衛師數之以王命取賂而還高氏曰初為邈奉子頹犯王而不克齊衛興兵助頹犯王而齊為霸主不能奔救及鄭伯既納王王乃錫齊侯命使討之於是乎伐衛曰伐者討得其罪也然既敗衛乃取賂而還嗟夫齊侯以能尊王室霸諸侯而所

為乃若是沙隨程氏曰齊侯自去年巳會公于城濮則駐師於衛地久矣而曰三月甲寅伐衛衛受子頹之奔王命齊侯伐之則齊侯待於城濮為有禮矣及衛人不服而戰則前乎甲寅之日其伐未果也是宜以衛人主兵張氏曰衛嘗受盟于幽前年同盟不至伐不服罪乃以齊來伐之日而急擊之然不能敵齊節制之師而敗以衛為主罪之不地於衛都也澄曰前年冬齊侯出會魯于衛地矣今年春伐衛稱人者蓋齊侯待於城濮但遣微者往伐意欲以不戰屈之也而衛不服罪敢與齊戰輕躁寡謀不量其力自取敗衄也

夏

四月

丁未邾子瑣卒

瑣在位十二年其子蕞蒞嗣

秋

荆伐鄭

左傳曰楚令尹子元以車六百乘伐鄭入于桔柣之門衆車入自純門及遠市縣門

不發楚言而出子元曰鄭有人焉胡氏曰子元無故伐鄭是凌弱暴寡之師也澄曰齊霸已盛而楚猶敢伐其與國恃其疆而不畏齊也

公會齊人宋人救鄭

宋人下公有邾婁人三字口左傳曰諸侯救鄭楚師夜遁

鄭人將奔桐丘謀告曰楚幕有烏乃止穀梁傳曰善救鄭也胡氏曰得救急邠鄰之義桓公攘外寇安中國之事見矣澄曰齊宋皆卿壓於公故稱人張氏曰是時楚文王卒成王幼子元伐鄭師出無

名故鄭人示以閒暇而不敢入聞諸侯之救而適  
適時桓公攘楚之計未定楚政適亂然自若敖蚡  
冒至于武文兵制尚在其後二年之間殺子元而  
授政令尹子文復修國政故召陵之師雖舉而楚  
之君臣非此時比故僅能使  
之受盟終不足以大服之也

冬

築郿

郿音眉公作微。築者創始造邑也夏時之  
冬用民力之時魯之冬則是建百建戍之月

未可用民力也杜  
氏曰郿魯下邑

大無麥禾

此於冬後總記一年之事夏秋之間既  
無麥秋冬之間又無禾禾黍稷稻粱也

大無者言全無也蘇氏曰是歲未嘗有水旱螟蟲  
之災而書大無麥禾劉向曰土氣不養稼穡不成



也沈約宋志言吳孫皓時嘗有之苗稼豐美而實不成百姓以饑闔境皆然連歲不已此所謂大無

也  
麥禾

臧孫辰告糴于齊

辰穀作臣。外傳魯語曰魯饑臧文仲言於公曰夫為四鄰之

援固國之艱急是為鑄名器藏寶財固民之殄病是待今國病矣盍以名器請糴于齊公曰誰使對曰國有饑饉卿出告糴古之制也辰也請如齊公使往從者曰君不命而請之其為選事乎文仲曰賢者急病而讓夷居官者當事不避難在位者恤民之患是以國家無違我不如齊非急病也在上不恤下居官而惰非事君也文仲以幣圭與玉磬如齊齊人歸其玉而予之糴劉氏曰君子之為國也務農重穀節用愛人則倉廩實不知為此事至而憂之以急病讓夷為功何其末歟澄曰臧孫氏

辰名魯世卿三命古者一年耕必有三年之食三年耕必有九年之食故雖饑而民不害者蓄積多而脩先具也是年冬大無麥未而臧孫即往告糴于齊見魯之無政事而財用不足也張氏曰一年不熟而上下相顧無以粒民重臣自往告糴若不遇齊桓則魯之民必至轉死於溝壑矣

經書月二書日二大行歷正月丁亥小甲寅冬至二月丙辰大甲申大寒閏月丙戌小甲寅二十九日三月乙卯大旦日雨水四月乙酉小丁未二十三日五月甲寅大六月甲申小七月癸丑大八月癸未小九月壬子大十月壬午小十一月辛亥大十二月辛巳小長歷是年閏三月甲寅三月晦日

### 二十有九年

丙辰惠王十二年○齊霸桓二十一○蔡穆十○曹僖六○衛懿四○晉獻十

二○鄭文八○陳宣二十八○杞惠八  
○宋桓十七○秦宣十一○楚成七

春

新延廐

穀梁傳曰冬築鄆春新延廐其用民力為已悉矣孫氏曰大無麥未告糴於齊則民

饑矣延廐雖壞未新可也莊公不愛民力若此澄曰新有故而修之也延廐馬閑也

夏

鄭人侵許

張氏曰許鄭世讎也然許自盟幽之後不與齊桓之會鄭人侵之或齊之命與

自後許始從中國襄陵許氏曰許以近楚未會諸侯故鄭侵之以求好焉

秋

有蜚

蜚音吠。公羊傳曰記異也何氏曰惡臭之蟲南粵所生非中國所有書有言本無也澄

曰書螟書蚤止言螟蚤為災則書也。蟬曰生麋曰多。蜚曰有不常多而今多不常生而今生不常有而今有也。鸛鶴亦昔無而今有書來者以其自它國而來也。蜚蚘他處所有而此地今自生其有非自彼來故穀梁以爲一有一亡是也。

冬

十有二月

紀叔姬卒

啖氏曰內女為諸侯之夫人則書卒以公為之服也。禮諸侯絕菴服惟適國君

者為之服大功九月尊卑敵故也。許嫁為夫人者亦然其為媵及嫁大子公子大夫則不書。澄按叔姬婦也。自隱公厚於先君之女以夫人之禮而歸之於紀自此以後魯紀二國之待叔姬叔姬之所

以自待其身皆與伯姬同春秋備書之以見魯之過於厚而非禮也然則此蓋莊公以為姑而為服大功之服也與叔姬莊十二年歸于鄆此卒于鄆也紀滅而猶繫之紀者蓋國亡無所倚托雖寄寓於鄆以待死其為紀國夫人伯姬之姊則如初也

城諸及防

杜氏曰諸防皆魯邑張氏曰諸今密州諸城縣縣又有故防城及者別二邑也

澄曰但言城諸防則似于邑然凡書土功雖時非善之也書之於農隙愈於非時者爾於春夏書譏可知也其間亟興土功而亟書之者不繫乎時與不時皆貶也若此前年冬築郟大饑而告糴此年春新延廡於是又城諸及防豈不為亟而譏之乎

經書月一書日無大衍歷正月庚戌大巳未冬至二月庚辰小三月巳酉大四月巳卯大五月己酉

小六月戊寅大七月戊申小八月丁丑大九月丁未小十月丙子大十一月丙午小十二月乙亥大

三十年

丁巳惠王十三年○齊霸桓二十二○蔡穆十一○曹僖七○衛懿五○晉獻十三○鄭

文九○陳宣二十九○杞惠九○宋桓十八○秦宣十二○楚成八

春

王正月

夏

師次于成

左無師字○師少將卑師衆也張氏曰成魯地地譜今泰山鉅平縣東南趙氏

曰魯蓋欲會齊圍郭至成待命閉郭己降不復行爾

秋

七月

齊人降鄆

降美江切鄆音章。杜氏曰鄆紀附庸國東平無鹽縣東北有障城小國孤危

不能自固蓋齊遂以兵威脅使降附趙氏曰降服而為附庸也常山劉氏曰不書鄆降而曰降鄆齊肆強力脅而服之也高郵孫氏曰鄆降于齊師是時齊魯之師相會圍鄆鄆不降我而獨降齊非齊師能使之降鄆自降爾齊人降鄆非鄆欲降也齊降之爾

八月

癸亥葬紀叔姬

魯之往葬皆以正夫人禮

九月

庚午朔日有食之鼓用牲于社

孫氏曰書鼓用牲者譏其用牲爾非

謂九月不鼓也

冬

公及齊侯遇于魯濟

濟上聲。左傳曰謀山戎也以其病燕故張氏曰簡禮以

議軍旅之事杜氏曰濟水歷齊魯界在齊為齊濟在魯為魯濟蓋魯地襄陵許氏曰齊桓伐鄭伐徐皆以宋人主兵與公會城濮而後伐衛與公遇魯濟而後伐戎以是知桓公之霸不自恃也用兵行師每資武于宋桓取策於魯莊其治國也一則仲父二則仲父用人之能以為能集人之功以



為功遂能力正  
天下澤被生民

齊人伐山戎

公羊傳曰此齊侯也趙氏曰伐山戎當書齊侯獻戎捷當書齊人交互致

誤爾程子曰蓋互錯一字杜氏曰山戎北狄

經書月四書日二大衍歷正月乙巳小甲子冬至  
二月甲戌大三月甲辰小四月癸酉大五月癸卯  
小六月壬申大七月壬寅小八月辛未大九月辛  
丑小經八月癸亥在此月十月庚午大日食經書  
九月置閏不同也十一月庚子大閏月庚午小十  
二月己亥大長歷是年閏二月癸亥八月二十三  
日

三十有一年

戊午惠王十四年○齊霸桓二十三○  
蔡穆十二○曹僖八○衛懿六○晉獻

十四。○鄭文十。○陳宣三十。○杞惠十。  
○宋桓十九。○秦成公元年。○楚成九。

春

築臺于郎

何氏曰：四方而高曰臺。禮天子有靈臺，以候四時。登高

望遠，人情所樂動而無益於民者，雖樂不為也。劉氏曰：去國而築臺是樂而已矣。譏厲民也。

夏

薛伯卒

薛侯爵，今稱伯。降班而告終也。小國無可攷，不知其名。

築臺于薛

杜氏曰：薛魯地。

六月

齊侯來獻戎捷

侯字當從趙氏作人齊之將伐戎也嘗與魯莊過于魯濟以謀之伐

而得勝故使人獻捷于魯以嘉其謀之中也

秋

築臺于秦

杜氏曰東平范縣西北有秦亭張氏曰寰宇記范縣今屬濮州亭尚存莊公一

歲三築臺政所謂及是時般樂怠教者

冬

不雨

蓋歷建酉建戌建亥之月凡三月無雨也

經書月二書日無大衍歷正月己巳小己巳冬至二月戊戌大三月戊辰小四月丁酉大五月丁卯

小六月丙申大七月丙寅小八月乙未大九月乙丑小十月甲午大十一月甲子小十二月癸巳大

三十有二年

己未惠王十五年○齊霸桓二十四○蔡穆十三○曹僖九○衛懿七○晉獻

十五○鄭文十一○陳宣三十一○杞惠十一○宋桓二十一○秦成二○楚成十

春

城小穀

范氏曰小穀魯地孫氏曰曲阜西北有小穀城永嘉薛氏曰莊公六年後無麥苗大

無麥禾螟康或蜚相繼而有大水者三中君尚當少警而公之侈心日起因娶而觀社丹楹刻桷告糴之時有築郛之役次年新廡城諸防去年三築臺而不雨今春又城小穀平歲猶不可况薦饑而輕用民力乎澄按左傳云城小穀為管仲也而杜氏注謂公感齊桓之德故為管仲城私邑且釋此

地名為在齊之濟北穀城縣唯泰山孫氏以為在魯之曲阜西北胡氏曰孫魯人也而終身學春秋其攷此詳矣高氏曰先儒以小穀為齊邑魯為管仲城之若然聖人亦當異其文而繫之齊且公雖感齊桓之私豈肯為管仲城邑乎昭十一年傳云齊桓城穀而寘管仲焉齊自有穀如文十一年公及齊侯盟于穀宣十四年公孫歸父會齊侯于穀此齊穀也非魯之小穀沙隨程氏曰齊地別有穀在濟北有管仲并非小穀也文十七年宣十四年盟會者乃濟北之穀也

夏

宋公齊侯遇于梁丘

左傳曰齊侯為楚伐鄭之故請會于諸侯宋公請先見于

齊侯張氏曰齊不以霸主自居以梁丘近宋而先之也梁丘在濟州昌邑縣西南高氏曰梁丘宋地

齊侯將會諸侯為鄭謀楚而宋公先過於梁丘宋  
序齊上者地主也用兵則以主兵者為先盟會則  
以主盟者為先若相遇則以地為賓主  
皆非其地莫適為主則序以爵而已

秋

七月

癸巳公子牙卒

左傳曰初公築臺臨黨氏見孟任從之生子般公疾問後于叔牙對

曰慶父材問於季友對曰臣以死奉般公曰鄉者牙曰慶父材成季使以君命命僖叔待於鍼巫氏使鍼季醜之歸及遠泉而卒公羊傳曰公病召季子曰牙謂我曰魯一生一及君知之矣慶父也存季子曰是將為亂乎俄而牙殺鍼成季子和藥而飲之公子牙今將爾將而誅焉誅不避兄君臣之

義也行誅乎兄隱而逃之使若以疾死然親親之道也沙隨程氏曰牙叔孫氏之祖也左氏以為欲立慶父而季友醜殺之時公年四十有五距薨時尚一月苟以是誅牙則慶父何為尚執國柄而二傳以為將弑公又不近理蓋是見閔公不書即位考例不合故為是異說牙實善終也高氏曰左氏具載季友殺叔牙之事考之於經全不寓微意以此言之公子牙蓋自卒爾

八月

癸亥公薨于路寢

書月書日謹之書其所詳凶變也路寢正寢也公病遷居正寢

而於正寢終焉禮也

冬

十月

己未子般卒

己未公穀作乙未般音班。左傳曰子般即位次於黨氏共仲使圍人葦

賊子般成季奔陳立閔公孫氏曰子般莊公太子未踰年之君也莊公未葬故名不薨不地者降成

君也此與襄三十一年秋九月癸巳子野卒義同沙隨程氏曰般之卒書日辰書名與襄三十一年

子野同蓋亦令終也文十八年冬十月子卒不書日辰不名則故可知也先儒謂君薨子名既葬稱

子然景王既葬矣王子猛猶名是此例不通也胡瑗謂子般非遇弑信然高氏曰新君未踰年稱子

莊公薨般既立不幸而卒三傳皆以為慶父所殺考之於經所書與子野同若以子般為被弑則子

野亦豈被弑乎惟文十八年書子卒而不名者乃被弑也何則既書子卒即書夫人姜氏歸于齊蓋



文公既薨子赤為宣公裏仲所弑而弑君之賊自立哀姜不能容自歸於父母之國也子般子野皆非被弑而子般特以哀姜慶父之故疑若為其所弑爾春秋別嫌明微深辨乎疑似之際豈有實弑其君而全不寓意哉乃區區曲為之諱乎

公子慶父如齊

沙隨程氏曰公薨子般卒慶父以國統未定請於霸主而國人立閔

公高氏曰若以慶父弑君而出奔則聖人豈不著其出奔之罪乎知此非出奔也蓋公薨子卒繼嗣未定慶父雖有僥倖之心而身為國卿加以公子之貴有嫌疑之避於是如齊告難蓋以桓公始霸謀定其君及自齊歸魯已立閔慶父始有篡弑之意故明年齊侯使仲孫湫來省難而仲孫謂不去慶父魯難未已也澄按諸說誤謂慶父弑般故有以此為出奔齊者亦有以此謂自托於齊者竊詳

閔二年慶父哀姜弑閔公慶父不容於魯國遂出奔莒哀姜於齊親也亦有所憚而不敢歸齊逃罪于邦竟不免於死齊桓霸令如此設使慶父實弑子般果何所恃而遽敢如齊乎齊桓亦何所顧惜何所阿徇而不問其罪乎以此知子般之非弑也不然齊桓寬縱於般之弑而嚴察于閔之弑何其用刑之頗也因左傳事逆失實誤以子般為被弑遂使魯臣虛負縱賊之罪霸主亦受佚罰之誣得孫胡程高四家一正前誤則見齊桓霸令之光明無可譏者矣

狄伐邢

狄北狄杜氏曰邢姬姓周公之胤國在廣平襄國縣張氏曰今邢州龍岡縣狄前此

雖未見於經然自伐邢而滅衛三年之間塗炭兩國首以伐書著其疆已高氏曰謂之伐者當時諸侯素不能治自正故也襄陵許氏曰春秋戎先見荆次之狄次之而荆暴於戎狄又暴于荆當惠王

世戎狄荆楚交伐諸國使無齊  
袒攘服定之將伊于何底哉

經書月三書日三大衍歷正月癸亥大乙亥冬至  
二月癸巳小三月壬戌大四月壬辰小五月辛酉  
大六月辛卯小七月庚申大八月庚寅小經七月  
癸巳在此月九月巳未大經八月癸亥在此月十  
月己丑小十一月戊午大經十月己未在此月十  
二月戊子小長歷是年閏三月癸巳七月四日癸  
亥八月五日巳  
未十月二日

春秋纂言卷三